

كنت حمار.. وأشياء أخرى

مشاهد شخصية في منتهى الجهورية

هسام منصور



لكل جديد وقديم وكل ما هو نادر
من من كتب ومجلات ومجلدات

تابعوا موقعنا

#دوده_الكتب

اضغط علي اي جزء من الصورة
للدخول الى الموقع



تابعوا على التلجرام

t.me/book100100



هشام منصور

كنت حمار.. وأشياء أخرى

مشاهد شخصية في منتهى الجهورية



الكرمة

لمزيد من المعلومات عن الكرمة: facebook.com/alkarmabooks

حقوق النشر © هشام منصور ٢٠١٩

الحقوق الفكرية للمؤلف محفوظة

جميع الحقوق محفوظة. لا يجوز استخدام أو إعادة طباعة أي جزء من هذا الكتاب بأي طريقة من دون الحصول على الموافقة الخطية من الناشر.

منصور، هشام.

كنت حمار.. وأشياء أخرى: مشاهد شخصية في منتهى الحمورية / هشام منصور - القاهرة: الكرمة للنشر، ٢٠١٩.

٢٣٢ ص: ٢٠ سم.

تدمك: 9789776467842

١- الأدياء العرب

٢- منصور، هشام، ١٩٨٤ - ... - المنكرات

١- العنوان

رقم الإيداع بدار الكتب المصرية: ٢٣١٣٥ / ٢٠١٧

٢٤٦٨١٠٩٧٥٣١

تصميم الغلاف: أحمد نبيل

إهداء

إلى البطلة الأسطورية، اللي سوبر مان جنبها عيّل عبيط
ما يسواش مليم، الإنسانية اللي عملت مني بني آدم مرّة واتنين وتلاتة
وعشرة وألف، ولسه بتعمل مني بني آدم... أمي.
باحبك يا مديحة، باحبك حب أكثر مما هو ممكن بشريًا.

إلى الملكة، حب حياتي وعمري، حب كل أيامي السابقة والحالية
والجاية، اللي كافحت معايا سنين من غير حتى ما تكون في
حياتي... حب عمري.

إلى كل النساء في حياتي، اللي عملولي حاجة حلوة، ووقفوا جنبي،
واستحملوني، وهمّ كثير الحقيقة.
إهداء ليكم كلكم من كل قلبي وعقلي.

إلى أكبر صراع نفسي في حياتي، المرحوم والدي،
اللواء أ.ح. صدقة فهمي منصور.

إلى كل حد أذاني متعمدًا، وحاول يوقعني... خد بوسة في الهوا.

وأخيرًا، إلى الحمار، هذا الكائن البريء من كل حماقاتي،
هذا الكائن البرنس.



المحتويات

- تمهيد ١١
- 1# لما ما حلققتش شنب البلوغ ١٥
- 3# لما اتجوزت عُرفي ٢٣
- 5# لما ما إديتتش لأبويا سيجارة ٤١
- 7# لما ما كُنتش باشرب ميه ٥٣
- 9# لما فتشت في الماضي ٥٧
- 11# لما غنيت «ما تخافيش» لبنت البواب من البلكونة ٧٣
- 13# لما افتكرت إن البنت حياتها سهلة، والمُزة على
الأخص ٨١
- 15# مع جوماننا، وغيرها ٨٧
- 17# لما كنت «أونكل كمال خطيب ماما» ٩١
- 19# لما افتكرت إن أبويا ما بيحبنيش ١٠٣
- 21# لما ما كُنتش باسامح ١١٣

- ١٢٣ 23# لما اتخانقت
- ١٢٩ 25# لما افكرت الدولفين صاحبي
- ١٣٣ 27# لما ركبت مع أحمد
- ١٣٩ 29# لما صدقت
- ١٥٧ 31# لما خفت من الوحدة
- ١٦٧ 33# لما بطلت أحب نفسي
- ١٧٧ 35# لما افكرت إني حبيبت مرة واحدة
- ١٨٧ 37# لما فقدت الأمل
- ١٩٩ 39# لما افكرت إن مفيش حُب
- ٢١٣ 41# لما افكرت إني اتجنت
- ٢١٩ 43# لما كنت باهرب
- ٢٢٣ مؤخرة
- ٢٢٥ شكر خاص وواجب

تمهيد

وأنا طفل صغير، كان حلمي إنني أكتب كتاب أحكي فيه قصص زي اللي باقراها، بس وقتها ما كانش عندي أي حاجة أحكيها غير قصص سلسلة ملف المستقبل، ورجل المستحيل، وأفلام الكارتون اللي شُفتها.

لما كبرت، اكتشفت إن حياتي ما كانتش بعيدة أوي عن الأفلام دي، وطلعت أكبر فيلم كارتون فيها.

ده أول كتاب ليّ في حياتي، أتمنى عزيزي القارئ إنك تتقبله قبول ميريام فارس في مدرسة طبري الحجاز بنين، أو قبول ميريام فارس بصفة عامة، ويكون حلو كده وخفيف على قلبك، وتستفيد منه أي حاجة.

للي ما يعرفنيش، أنا شاب عنده ٣٥ سنة، عمل كل حاجة غلط في حياته غير إنه ي... أقولك على حاجة؟ هاكون صريح معاك، أنا عملت كل حاجة غلط في حياتي!

أحب أعتذر في البداية عن أسلوبى المتنقل بين الفصحى
والعامية، هي بتروح وتيجي لوحدها، ساعات بتطلب كده،
وساعات بتطلب كده، فيه أوقات مش بيسعفني فيها غير جملة
عربية فصحي، وفيه أوقات تانية هتلاقيني باكلمك كأنك واحد
صاحبى قاعد جنبى.

الكتاب ده كتبه على مدى خمس سنين، كل شوية باقف وما
باقدرش أكمله، كل شوية أغير عمري اللي مكتوب فوق ده،
وهتحمس غالبًا وانت بتقرأ بالاختلاف وفرق التفكير.
ينقسم هذا الكتاب إلى عدد من الأحداث، مواقف، مشاهد،
أجزاء... أي هباب بقى، المهم إن كل جزء من دول منفصل عن
التانى، ومتصل في نفس ذات الوقت.

إذا استطعت، عزيزى القارئ، أن تربط كل هذه الأحداث
ببعضها البعض، فستعرف من أنا، ودي مش بالضرورة حاجة
مهمة بالنسبة لك، بس إنت مشكورًا اشتريت الكتاب، فلازم
أحسسك إنك أخذت حاجة بفلوسك، فهمت أنا مين وبتاع،
لعله يكون حاجة مفيدة ليك بأي شكل من الأشكال، وتلاقى
ولو جزء من نفسك في.

أتمنى من كل قلبى إنك تستمتع عزيزى القارئ.
ياااه! كبرت يامه وبقيت باقول «عزيزى القارئ»! هيبويه دنيا!
حلوة «عزيزى القارئ» دي، محسسانى إنى مهم واسمى
«محسن» وبالبس بدلة وكده.

كلمة صغيرة: الكتاب ده حطيت فيه قلبي ودماعلي، وهو
ليس بأي شكل من الأشكال ادعاء للعمق، ولا دعوة للتفاهة،
ولا محاولة لأي حاجة في الدنيا، هو فقط بعض مشاهد من حياة
ممکن تقول إنها خيالية لا تمت للواقع بصلة، هو سجل لمعارك
كثيرة دخلتها مع نفسي ومع غيري، في خيالي برضه.
أنا قلبي توقف عن العمل تمامًا في ٢٠٠٣، ورجع تاني! غالبًا
ربنا كان بيقلولي «لسه ما خلصناش»!



1#

لما ما حلققتش تشنب البلوغ

كنت حمار لما افتكرت طنط نادية هتفضل تبوسني وتحضني
بعد ما بلغت، أو بمعنى أصح، بعد ما بانت عليّ أعتى علامات
البلوغ!

طنط نادية كانت البلونداية الوحيدة في عيلتي، وفي مصر
الجديدة تقريبًا. خلّي بالك البلوند كان شاحح جدًا في أوائل
التسعينيات، وما كانش فيه غير شيرين رضا وسبعة كمان مثلاً،
واتنين منهم أكسجين.

طنط نادية دي بقى، كانت أحلى ست في العيلة كلها، والبوسة
والحضن منها ليّ، حتى وأنا طفل، كانوا بينقلوني لمجرة تانية،
فيها سعادة وبهجة، والهوا فيها مشبع بالحشيش الأفغاني غير
المطبوخ اللي لونه فاتح شوية ده.

لما طنط نادية كانت بتحضني وتديني بوسة، كنت -زي البنات

ما يقولوا - باحس إن مفيش غيري في الدنيا، وإني الولد الوحيد
في العالم، وإني على قمة أعلى جبل. إحساسي وهي حاضناني
كان بالظبط كأني ملك العالم ومعايا الخاتم بتاع «لورد أوف ذا
رينجز»، وميكس ثقة في النفس، ساويرس على أبو هشيمة كده.
بس للأسف! كل أحاسيسي الجميلة الشفافة دي اتهدمت،
لما تركت الطفولة، وبلغت.

كنا بنتقابل في بيت جدتي وجدي الله يرحمهم، كل يوم
جمعة. العيلة كلها بتتلم على سفرة تيتة المليئة بكل مالذ وطاب،
وكل ما هو مميت ومليء بالكوليسترول واليورانيوم المشع،
بداية من المحشي المسد للشرايين اللي مرمي فيه حته شغت
أو دهنة عشان تدي طعم، وحتى الفراخ البانيه اللي حجمها
يقارب مساحة بلد في حجم كينيا، ويمكن تقريبًا كانت نفس
شكلها على الخريطة كمان.

طنط نادية ما كانتش بتيجي كل أسبوع طبعًا، وده اللي كان
بيزود عندي الشوق والمشاعر المرهفة، كانت بتيجي تقريبًا مرة
كل شهر أو شهرين، ولما كانت بتشوفني بتفتح دراعاتها عشان
أجري عليها وأحضنها، وتقعّد تبوس فيّ. وإحساس حضنها كان
خليط من الراحة النفسية بتاعة وجود حسن حسني في أي فيلم،
ودفء إسعاد يونس، والأمان بتاع مدرعات الجيش، يعني تخيل
مدرعة جيش سايقاها إسعاد يونس! اللي هو أقصى درجات
الاطمئنان. كنت مليان بمشاعر الرومانسية الطفولية البريئة،

وأه كانت بريئة بجد، ما كنتش أعرف أي حاجة عن الجنس
والكلاشات والسبانكينج مثلاً ساعتها، وتقريباً لسه ما أعرفش
برضه، فياريت أي حد ينورني في الموضوع ده!
«هشومة حبيبي»، بصوت طنط نادية، كانت كلمة السر ومفتاح
السعادة اللي بيعجي بعده كل أشكال السعادة الدنيوية لطفل عمره
ما بين ١٠ و ١٢ سنة. كانت من أوائل الكراشات في حياتي، الله
يمسيها بالخير.

إذ فجأة انقطعت أخبارهم فترة حوالي ٨ شهور، ٨ شهور
حاسس بالوحدة والبُعد عن مصدر الجمال الوحيد في حياتي،
كنت «عايش ومش عايش» قبل ما عمرو دياب يعرف معناها،
كنت باشوف طيفها في كل حطة وكل شارع بامشي فيه مع أهلي،
أسمع اسم «نادية» أتنفض، أشوف واحدة شعرها أصفر، من
السبعة التانيين، في الشارع أطلع أجري وراها، وطبعاً كان فيه
عدد مش قليل من الستات اللي لاقوا طفل صغير بيجري عليهم
وهو بينده بصوت له نزعة سؤالية: «طنط نادية؟ طنط نادية؟»،
وهمّ يتدوروا ويبصولي ويقولوا بكل كليشيهية الأفلام العربي
في السبعينيات: «لا يا حبيبي».

إذ فجأة برضه، رجعوا، ورجعوا بنفس الفجأة اللي اتقطعت بيها
أخبارهم، في خلال الفترة دي عزيزي القارئ، كنت أنا وصلت
سن البلوغ اللي بيحصل للأسف فجأة وبدون سابق إنذار، بتصحى
من النوم تلاقى نفسك بلغت كده خلاص، نهاية حقبة زمنية بريئة،

وبداية حقبة أخرى كومبليكيته، وطبعًا طلعتي الشنب القدر بتاع البلوغ ده، وجبهتي امتلأت بالحبوب الناتجة عن التغيرات الهرمونية، وشكلها بقى مزدحم أكثر من ترابيزة بلياردو تناثرت عليها الكور بسبب واحد كحُول ما بيعرفش يكسر.

اللي أذكره جيدًا إن بلوغي اتأخر حوالي شهرين ثلاثة عن بقية زملائي في الفصل، فكنت كل يوم باروح المدرسة وأسمعهم بيتحاكوا عن قصص بلوغهم في صمت وقلق وتوتر، وأذكر جيدًا جُملة زي: «إمبارح يلا حلمت إنني بافرتك «سيلين ديون»»، وعمري ما فهمت ليه ما باحلمش زيهم إنني بافرتك حد! وليه «سيلين ديون» على الأخص! وأذكر إنني بعد الجملة دي حسيت بالغبرة وعدم الانتماء، وفضلت بعدها كل يوم أحاول أفكر حلمت بيايه، وأتفحص ملابسي الداخلية جيدًا كل يوم، ولكن دون جدوى، إلى أن جاء الحلم، وجاءت معه العزلة العاطفية من طنط نادية.

- طنط نادية هتبقى هناك؟

قُلْتُها بصوت يملأه الشغف والتغيرات الهرمونية، وأنا أنظر إلى أمي نظرة شاب حالم، يطوف حوله شبح الفنان حمدي الوزير، داخل عربية أبويا الـ ١٢٨ حمراء اللون، يوم جمعة صيف بعد الصلاة.

قالت أمي بصوت يعلوه نبرة التوتر:

- إن شاء الله.

لم أفهم توترها حين ذلك، ولن أنسى المشهد الذي تلاه.
صوت جرس الباب البيانو العتيق على باب بيت جدتي،
وصوت ضربات قلبي المتسارعة يملأ المكان كـ«صاب ووفر
جي بي إل» في سيارة «بولونيز» أمام «مجدي كلاريون»، ثم
يُفتح الباب، وأرى جدتي تفتح الباب بابتسامة عريضة وتفتح
ذراعيها عشان تحضني، وأنا أدفعها بعيداً، وأدخل مسرعاً إلى
الصالون لأرى حبيبتي، طنط نادية، ملاك جالس على الصالون
المُدهب. جريت، فتحت سبرينت من بتوع أحمد فتحي بتاع
الأهلي لما مش بيهمه هوّ معاه الكرة ولأ لأ بس بينطلق، لحد
ما وصلت لها، وبارمي نفسي عليها، ولكن لدهشتي، استوقفتني
يدها الممدودة للسلام عليّ من بعيد، يمكن عمري ما شفت إيد
بني آدم ممدودة بهذا البُعد! كانت كأنها أحد «الفانتاستيك فور»،
المطاطي اللي فيهم ده، وكان ذراعها اتمدت لعدة أمتار كوسيلة
للدفاع عن النفس، وكأنها كانت قاعدة في الصالون وذراعها
اتمدت للأنتريه عشان ما أقربش منها!

- إزيك يا هشام؟

قالتها بصوت متحفظ وديستانت، ويمكن كان فيه نبرة قرف
كمان، فنظرت في دهشة إلى ذراعها الممدودة، وفي استغراب
إلى ذراعتي المفتوحة، ولم أكن أصدق ما حدث، ما فهمتش
سبب التغيير المفاجئ في المعاملة، دي كانت أول مرّة في
حياتي أبقى ريجيكتيد كده، تلاها صوت انكسار قلبي المدوي،

كصوت انكسار طقم كوبايات شربات كان محمول على صينية
بأيدي مرتعشة.

- إزاي حضرتك يا طنط؟!!

قُلْتُهَا وأنا تملأني الدهشة والاستغراب والارتباك الشديد،
قليلاً ما كنت أعرف، أن هذا هو شعور كل رجل يتعامل مع أي
امرأة في جميع أنحاء العالم.


فضلت واقف مستنيها تغير رأيها، تعوضني، تقبلني، تودع
حبي البريء حتى، بس للأسف! ما حصلش!

جريت على الحمّام وأنا باحاول أخبي دموعي، وبصيت
لنفسي في المراية، وحاولت أفهم إيه السبب، بصيت لشتب
البلوغ الحقيير اللي مخلي شكلي كأني تاجر بانجو شاب في
مقتبل عمره، وبصيت للحبوب اللي مخلية شكل وشي شبه
سلسلة جبال البحر الأحمر اللي ورا البحر في العين السخنة
وشرم دي.

حطيت نفسي مكانها، أي حد في الدنيا داخل عليه كومبو
الحبوب التي يعلوها قطرات عرق أطفال قذر، وهذا الشنب
البلوغي المبهم، هيقرّف! وقرفت من نفسي أكثر منها، وفهمت إن
مفيش حد ممكن يبوس ويحضن هذا الشيء المقرز، ولا يطرطر
عليه حتى.

ساعتها أخذت القرار، وعقدت العزم، إني دائماً بعد كده
هيكون شكل وشي مضبوط ونضيف وريحتي دائماً حلوة.

ده أول درس في حياتي: النسوان بتقرف فشخ، والجزء الأكبر
من جاذبية الرجل في اهتمامه بالـ«hygiene».
يمكن كل اللي عارفيني كويس دلوقتِ عارفين إني عندي
هسهس النضافة الشخصية والريحة، ومدمن بيرفيومز ومزيلات
وعطور وصابون وشاور جيل ومسك وعنبر وأي حاجة تخليني
طاهر وعذب الرائحة، وأهم دلوقتِ عرفوا ليه.
عشان كنت حمار لما خسرت حب طفولتي، حتى وأنا مليش
أي ذنب في تغيراتي الهرمونية المدمرة!



3#

لما اتجوزت عرفي

هوَّ الموقف ده بالذات ما يكفيش فيه كنت حمار واحد، لأنني
كنت سلسلة من الحماقات المتصلة، فأعتقد إنني في هذا الموقف
كنت حمير كثيرة!

مبدئيًا، كنت حمار لما افكرت إنني هالاقى «حب حياتي»
في شرم الشيخ، إلا لو كنت بقى وزير خارجية في مؤتمر مثلاً،
بس المواطن العادي اللي زيي، صعب!

هوَّ لو فيه حد فعلاً فيه بيني وبينه كيميا وتفاهم في شرم الشيخ،
فهو بتاع الولعة في أي كافيه في نعمة باي، غير كده، مبدأ إنك
تكون في أجازة لطيفة في مكان لطيف وتقابل شخصية لطيفة
وتكتشف إن هيَّ فيها كل حاجة كنت بتدور عليها، والقدر شاء
إنكو تتقابلوا في الرحلة دي، هوَّ كفته بمية البطيخ. وده مبدئيًا لأنك
لما بتكون في مكان لطيف بتقضي وقت لطيف، فإنت مش بتكون

على طبيعتك، والكلام ده ينطبق على باقي الناس. في الأجازة على البحر إنت بتكون شخص جميل، لذوذ، حنون ومحنين على نفسك، وبتشر منك علوقية عاطفية، نسخة منك بس ألطف وأروش وأهدى، ناهيك طبعًا عن التحفز الجنسي في الأجازة. ثبتلي بالدليل إن الشخص في الأجازة بيكون متحفز جنسيًا أكثر من أي وقت تاني، بسبب راحة البال يمكن، وروقان الأعصاب، ويمكن ده السبب إن الأزواج اللي عندهم مشاكل يسافروا، عشان يغيروا جو، ويبعدوا عن الضغوط، ويحاولوا يستعيدوا الأيام اللي هوّ كان فيها وحش، واللي هيّ كانت فيها سافلة!

شخصيتك الحقيقية هيّ في بيتك، في مكانك الطبيعي، في وسط الأسبوع، في شغلك. شخصيتك في الأجازة دي نسخة مدبلجة من شخصيتك الحقيقية، ولا تمت لك بأي صلة، وتحت أي ظرف ما ترتبطش بأي علاقة وإنت في أجازة، وحتى هتلاقي أي اتنين اتقابلوا في أجازة دايمًا يقولوا جملة: «كنا تحفة مع بعض في الأجازة، مش عارف لما رجعنا إيه اللي حصل، واتغيرت / اتغير ليه؟!»، والدنيا بتخري في عينيهم فجأة. عشان بكل بساطة، شخصياتكو في الأجازة مش حقيقية، اعتبروها بوكيمون، أفاتار، بس مش إنتو.

«لوبا» بقى كانت روسية ملحدة، كعادة الروس طبعًا لا يؤمنون بأي شيء غير ثلاثة أشياء، الثانية ستبهرك: الفلوس، والسكس، والفودكا.

قابلت «لوبا» في إطار رومانسي لذيذ، كنت على البحر مع
أعز أصدقائي، أحمد عماد، وقررت إن الدنيا حر فسخ، وإني
عايز أنزل البحر، وأحمد كعادته كان شخص ثقيل المؤخرة
جدًا، وما بيتحركش بسهولة، زي الزواحف بالظبط، فنزلت
لوحدي، وقعدت أعوم أعوم أعوم، أعوم أعوم أعوم، أعوم
أعوم أعوم... (باحاول أشوف هتزهقوا بعد كام أعوم)، فتعبت
وقررت إني أريح شوية وأسند على الكور المربوطة بحبل، اللي
بتحدد حدود المنطقة اللي ممكن تعوم فيها، قال يعني أم الكور
دي هي جوهر الأمان والسر الأساسي للحفاظ على الأرواح
في الميه! بس تمام. غطست راسي في الميه وطلعت، وبابص
حوالي، علمًا بإني عادة بالبس نضارة وما باشوفش كويس من
غيرها، فالبص حوالي ده كان حركة روتينية مش أكثر، وإذ فجأة
خبطني شعاع حارق من أشعة الشمس في عيني، حاولت أبص
أعرف مصدر الحرقان ده جاي منين، لقيت على أد ما بصري
جاب، صاروخ، مزة فسخ، فسخ يعني، بلونداية رفيعة وطويلة،
لابسة نضارة شمس تلفزيونية الحجم، وقاعدة على المربعات
الزرقا مع بيضا الطافية اللي بتعمل لسان صناعي جوه الميه دي،
ونضارتها التلفزيونية دي هي اللي كانت سبب انعكاس أشعة
الشمس على وشي.

شاء القدر إنها تاخذ بالها من تأثير الحرقان على عيني
والارتباك اللي حصلني بعدها، فبصيت عليها لقيتها بتضحك

وبتعملي باي باي، ومن كم مزازتها أذكر جيداً إنها لما ضحككتلي
كان رد فعلي إني بابص ورايا، وبابص عليها تاني، وباشاور على
نفسي في حركة معناها: «حضرتك بتضحكيلي أنا، مش صديقك
الروسي الفحل، أو دولفين معدّي ورايا؟».

شاء القدر برضه إنها تومئ لي بالإيجاب، هوّ القدر كان برنس
بصراحة في الفترة دي! ولقيتها فجأة قامت وقفت، وراحت ناطة
في الميه بكل سلاسة، دبوس نزل براسه في الميه بدون ذرة
طرطشة، وبدأت تعوم ناحيتي، وأنا ما زلت في حالة الدهشة
وعدم التصديق، وهي بتقرب ناحيتي ابتديت أشك إنها ممكن
تكون فعلاً جايالي، فبشوية خبث رجالي مهروش جداً، رُحت
ضارب ضربتين في الميه، وبعدت عن الناس اللي كانوا حواليّ
في البحر، واتجهت إلى مكان أكثر انعزاًلًا وقريب من الشط ومن
مكان أحمد، وبابص عليها لقيتها مكملة ناحيتي بأداء عبد اللطيف
أبو هيف في عبوره للمانش.

فجأة لقيت الصاروخ طالعة من الميه قدامي بالتصوير البطيء،
وعن قرب كانت أكثر مزازة بكثير، وعندها بربور صغير كده نازل
من مناخيرها بسبب البحر، لو كانت أي حد تاني كان ممكن يقلل
منها، بس هيّ مزازتها كانت تسمحلها بربور البحر الشهير، وهيّ
أدركت سريعاً البربور وشدته بإيدها في حركة تلقائية وراحت
ناطراه لورا بثقة تحترم، وراحت بصالي وقايلالي بكل ثقة:
- بريفييت.

- مالك؟

- بريفييت.

ما فهمتس وقتها بصراحة إيه «بريفييت» دي، بس لما حسيت بثقتها وهي بتقولها لتاني مرّة، أدركت إنها بتحاول توصلي رسالة بلغة مختلفة، بتحاول تـ«كومينو كيت»، سفينة فضائية بتبعث إشارة. اكتشفت لاحقاً إن «بريفييت» دي يعني «هاي» بالروسي. سألتها في محاولة بائسة للتواصل:

- دو يو سبيك إنجليش؟

- نو.

في اللحظة دي أدركت إنني أمام اختيارين لا ثالث لهما: يا إما أدرك إن دي حدود علاقتنا وخلاص كده وأقصر الشر وأطلع أقعد مع أحمد، يا إما أحاول أستغل الاستلطاف وأطلع منها بأي شبه علاقة طالما هي مُقبلة كده، وأنا معجب الحقيقة، كلب كلب يعني!

التفت وبصيت بصة سريعة على أحمد، لقيته قاعد بيبيش ويلعب في صوابع رجليه، وده الحقيقة حسملي الاختيار، ومش في الموقف ده بس، عامة، بقت أي خروجة نسوان ليها الأولوية بالنسبة لي!

طلعتها من الميه، وقلت نقعد بره كده شوية ونشوف بقى هتهيب إيه عشان نتواصل مع بعض. وكانت الشكوك لا تزال تساورني، ولكن الشكوك كلها انتهت لما طلعت وطلبت مني

إني أنشغلها ضميرها في أداء ناهد شريفني جدًا. ما كانتش سهلة هي برضه، عارفة هي بتعمل إيه مع شاب مصري فيه شعاع حب وهرمونات يبشروا من عينيه، وفيه كلمات «باحبك» دقيقة جدًا بتخرج من مسامه في اللحظة دي.

نشفتها بفوطتي في أداء تحسسي متحرش سيكا، وفي نفس الوقت مدي فيس إن ده العادي بتاعي وكده، وإني بانشف نسوان على البحر طول اليوم وزهقت من الموضوع أصلاً. وقعدت أكارك معاها في موضوع الروسي ده، وشوية إشارات على شوية تغيير في مخارج الألفاظ يمكن الكلمة اللي باقولها تشبط في أي كلمة روسي عندها، وأحمد الحقيقة ساب رجليه وكان يبساعد. ووقتها كنت لسه راجع من بيروت، فقعدت أفرجها على الصور، وفجأة وهي بتتفرج على الصور من الكاميرا، لقيتها حطت راسها على كتفي!

الجدير بالذكر هنا إني كنت بقالي سنة ما لمستش بنت، ولبنان كانت كارثة عشان رُحت في وقت بعد فترة اضطرابات ما، والناس ما كانتش بتنزل من البيت أصلاً، وكانت مأساة وأحلام كثيرة اتحطمت في السفرية دي، والعملية كانت ناشفة من الآخر، وحيواناتي المنوية تكاد تقفز من السعادة، فبمجرد لمس راسها لكتفي، أنا وقعت!

أخذنا تلفونات بعض، الأرقام يعني مش قصدي إننا بدلنا التلفونات، واتفقنا معاها إننا هننزل بالليل نروح نعمة، وهنكون

معها عشان الشباب البايط ما يعاكسوهاش وأي كلام طبعًا.
وعدينا عليها فعلاً في الأوتيل، وقعدت أدور عليها في اللوبي،
ما لقيتهاش! أكلم الرقم اللي ادتهولي، ما بيجمعش! أطلب من
الريسيبشان أكلم أوضتها، ما بتردش! أدور عليها حتى في بوفيه
العشا، مفيش! ابتديت أفقد الأمل، وبان عليّ الإحباط! بصيت
حواليّ بصة أخيرة سريعة بائسة، ولسه هامشي، لقيت واحدة لسه
معدية من قدامي، وقفت وميلت راسها كده وبتشبه عليّ، بس
دي لابسة نضارة وبهدومها، فقلت أكيد مش هيّ، وبعد كده قلت
لنفسي ما هو أنا ما أعرفش روسيين كتير عشان فيه واحدة فيهم
تشبه عليّ في الأوتيل اللي هيّ نازلة فيه، ما تبقاش جحش بقى.
رُحتلها وسألتها:

- «لوبا»؟

قالتلي:

- ضااااا («آه» بالروسي).

الإفيه كان إن إحنا الاتنين سُفنا بعض من غير نضارات النظر،
وإحنا الاتنين بنبس نضارات نظر، فهيّ كانت قدامي بقالها ربع
ساعة مثلاً وأنا مش هارشها، وأنا كنت قدامها وفاكراني مجرد
واحد عمّال يفرك في اللوبي، وجدت الموضوع ده كيوت جدًّا
في وقتها، بس قليلاً ما كنت أعرف برضه إن القدر كان بيحاول
يحمي المغفل اللي هوّ أنا.

رُحنا نعمة، واتمشينا الهويني، نلاعب بعض، ونهزر، ونحاول

ننطق كلمات في لغاتنا ونضحك على طريقة نطقنا، وأقولها يعني
إيه «كوباية» بالروسي وههههه وكده، ويعدّي واحد رفيع جنبي
فأعمل نفسي إني باحميها منه عشان أكبر في دوري، وأحسها
إن حياتها في خطر من غيري، وتتعلق بيّ أكثر، وهبل كثير لحد
ما فرهدنا وقعدنا في كافي. ودي كانت اللحظة الحاسمة بالنسبة
ليّ، اختيارها للكرسي اللي هيّ هتقعد فيه كان بمثابة تأكيد لكل
الإشارات الجنسية اللي هيّ بتبعتهالي من الصبح، وقد كان.
أحمد طبعًا دخل قعد في حته لوحده وساب جنبه مكان لتلات
بني آدمين عشان تمدد جنبه تقريبًا، بس تجاهلته.

قعدت جنبي، ولزقت فيّ أوي، وأنا أحب الحاجات دي
بصراحة، أحب الست المباشرة المتقربة الودودة. وأذكر جيدًا
ال نظرة في عينين أحمد ليّ، نظرة بداخلها سلو كلاب (تصفيق
بطيء)، وأنا مبتسم له بفخر. واستمرينا في المكاركة ومحاولة
تطويع لغة الإشارة في التفاهم، ونجحت في إني أعرف عنها
تفاصيل أكثر، زي إنها مُطلقة من زوج روسي برضه، كان يعمل
بسم الله ما شاء الله عليه في تجارة المخدرات، تقدرُوا تقولوا
إنها كانت بنت ناس يعني وما اتمر مطتش كثير!

إلى أن انتهى اليوم الجميل ده، واتجهنا إلى العربية. وإحنا
بنعدّي الشارع أنا كنت جنبها، وكانت فيه عربيات كثيرة ماشية
بسرعة، فتحت إيدي في محاولة إني أمسك إيدها بس من غير
ما أتجه ناحية إيدها فعليًا، سبت إيدي مفتوحة كده في المطلق

وكأني باطلب من القدر يكمل جميله. والمفاجأة كانت إنني
لقيت أيدها اتحطت في أيدي، وقفلت عليها فشح قفلة بوابات
محطات الفضاء، تقريباً نفس الساوند إيفيكت، أو كأني عليّ
ليها فلوس، في حركة رومانسية رخيصة هزت كياني من جوه.
وصلناها بعربية أحمد للأوتيل بتاعها، ولما نزلنا عشان نسلم
عليها قتلها إنني مسافر بكرة، فلقيتها اترمت في حضني ولطعتلي
بوسة بالتصوير البطيء على خدي، وراحت واخدة موبايلي
وكاتبالي كل بياناتها في روسيا بالكامل، بتاريخ الإصدار، وخذت
مني إيميلي، واتفقنا هنتكلم. وراحت تسلم على أحمد، فهمم
بها كأنه هيبوسها، راحت مادة أيدها تسلم عليه على بُعد متر
من وشها، في إشارة صايعة منها إن مفيش بوس، وكأنها بتقوله
بأداء مصري: «لحد هنا وستوب».

نظرت إلى أحمد المحطم نفسياً، وتذكرت قصتي مع طنط
نادية، وصعب عليّ شوية الحقيقة، ولكن سرعان ما تجاهلت
مشاعره، ونظرت إلى «لوبا»، وأدركت إنها حب حياتي في هذه
اللحظة، سافلة معايا، ومؤدبة مع المجتمع، حتى لو المجتمع ده
أحمد أعز أصدقائي، ومتناسياً تماماً إنها روسية وملحدة وكانت
متجوزة تاجر مخدرات، وعقدت العزم إنني أشحنها على مصر
في أي كونتينر.

لما رجعت القاهرة توصلنا عن طريق سكايب والإم إس إن
نشات، وأقنعتها بالنزول إلى مصر والزواج مني، والبت بصراحة

ما كدبتش خبر، شهر وكانت عندي في البيت ومقعدتها قدام أمي
وجدتي اللي كانت عايشة في الشقة اللي تحتينا، وبقول لأمي:
- أنا هاتجوزها.

من الجدير بالذكر برضه إن وقتها كانت فيه حوادث كثيرة
في الجرايد من نوع: «زوجة روسية تختطف الأطفال والفلوس
وتهرب من زوجها إلى بلدها»، وأمي كعادتها متدينة جدًا،
وشخصية قلقة جدًا، وجدتي الله يرحمها ست متدينة جدًا،
بس بتحب الواد اللي يلعب بديله ومنتشر. وأذكر جيدًا إن أمي
وجدتي كانوا قاعدين قدامي أنا و«لوبا»، وأمي كانت قاعدة
بتبتسم لـ«لوبا» وبتفحصها في نفس الوقت، وجدتي كانت شبه
بتحرس بيها ومنبهة إن حفيدها علق الصاروخ ده!
قالت لها أمي:

- ويلكام ويلكام!

وقالت لها جدتي وهي بتحدفلها بوس في الهواء:

- إنتِ عسل، عسل، قلّها يا هشام إنها عسل!

ردت «لوبا»:

- سبائسيبا («شكرًا» بالروسي).

وأنا كالعادة كنت بأسألها:

- مالك؟

قعدنا نتناقش كثير أوي في إجراءات الجواز، وأمي تحاول

تعقلني، ومفيش طبعًا.

اتجوزنا عند المحامي بتاع جدتي، على وعد إنه هيوثق عقد
الزواج في السفارة الروسية، حسب إجراءات الزواج من أجنبية
اللي ما كانش عندي أدنى معلومة عنها.

بعد الإمضاء تعالت الزغاريد والسعادة، و«لوبا» طبعًا مش
مستوعبة مدى سهولة وسماحة الجواز في الإسلام، أو شاكّة
إننا كلنا عبّط بس خايفة تتكلم، وأنا كنت بدأت الحلم الجنسي
في دماغى خلاص، ومبسوط إن اللي باعمله حلال وهيسيسيه
ويا ألف سبايسيا.

روّحنا البيت، وقالتلنا أمي:

- ألف مبروك.

وجدتي:

- إنتِ عسل، قلّها إنها عسل، يلاً هاتوا عيال عينيهم زرقا بقى.

وطبعًا أنا:

- عن إذنكو.

بس يا سيدي، قصدي يا عزيزي القارئ، ودخلنا الأوضة،
وطلعنا بعدها بشهر تقريبًا، أكلنا ودخلنا تاني. طلّعت فيها كل
الكبت اللي كان عندي، أنا فاكر إنني طلّعت من الأوضة رفيع
فشخ ودقني طويلة، و«لوبا» طلّعت من الأوضة خاسة جدًا
وعلى كرسي بعجل تقريبًا.

لعلك، عزيزي القارئ تاني، تتساءل: ما هي طلبات
«لوبا» للزواج؟ أجيبك بكل ثقة: طلباتها الوحيدة للجواز

كانت دولاب تحطه في أوضتي عشان هدومها، وبلاي ستيشان. دولاب وبلاي ستيشان! شفتوا حلاوة كده؟ ياختي جماله حلو! وأنا طبعًا ما خلصنيش برضه، وجبتلها خاتم ودبليت و فستان، واتعشنا في أعلى مكان في مصر وقتها، الـ «Revolving Restaurant» في فندق «جراند حياة»، المكان اللي كنت باخد فيه كل اللي باحبهم. وبعد كل خروجة أو هدية أجيبها لها، البنت الحقيقة كانت بتحسّسني إني جبتلها يعني اللي ما يتجاش، ومش حارمها من حاجة، وبتعوضهولي حب وحنان ولحظات متعددة من النشوة بدون فاصل وبدون أدنى مجهود أو تدخل مني.

الروسيات برضه عارفين همّ بيعملوا إيه!

والدي الله يرحمه كان عايش وقتها في بيت تاني لانفصاله عن أمي، فكلّمته قتلته إني هاتجوز واحدة روسية بعد ما كنت اتجوزتها ولكن كنوع من التمهيد، ولقيته دخل في شمال جدًا، وكانت من أسوأ المكالمات في حياتي مع أبويا، واتخانقنا تاني أكبر خناقة في تاريخنا في هذه المكالمة، وزى أي شاب تافه، كنت بالومه إنه بيقف في طريق سعادتي، وهوّ كان بيهزّاني عشان إزاي ما اتجوزش واحدة من ديننا وأخلاقنا وثقافتنا، وبعد المكالمة دي انقطعت علاقتي بأبويا لفترة تتجاوز الشهر، وباعترف إنه كان نوع من أنواع عقوق الوالدين اللي ندمت عليه أشد الندم لاحقًا، إلى أن قررت إني آخذها وأروح أزوره.

برضه أبويا الله يرحمه كانت نفسه حلوة، وسعادته في إنه
يكون حواليه ستات جميلات وفي حضرة وصحبة الجمال،
كان طالع لابنه بالظبط!

خبطنا على الباب، ومتوقع إنه هيلطشني بالقلم كعادته لما
يكون غضبان عليّ، فتح الباب، وبصلي بقرف، ولسه هيفتح بقة،
بص جنبي ناحية «لوبا»، وابتسم.

أبويا:

- أهلاً أهلاً، مش تقولوا إن إنتو جاينين؟

قالها وهو يفتح الباب على مصراعيه ويدخلنا الشقة.
أنا:

- قلت أعملها مفاجأة.

دخلنا، وقال أبويا وهو يعدل من وضعية الكراسي التي يرغب
في أن نجلس عليها:

- أنا لسه ضد موضوع الجواز ده، يا ابني أحسنك تتجوز
واحده زينا ومننا!

وهنا «لوبا» الخبيثة، التي تعلم جيداً صراعي مع والدي علي
زواجي منها، راحت لا طعاه بوستين علي خدوده، وأنا مش فاهم
رد فعل أبويا هيكون إيه، لقيته بصلي فجأة وقالني:

- يلاً ربنا يباركلكوا، ابقى علمها بقتين عربي وكلمها عن
الإسلام وكده.

بس كده خلاص، قعدنا نهزر، وجينا نمشي مسك فينا شوية،

وما سابناش غير بعد وعود كثيرة إننا هنجيله تاني، ويا ريتني كنت
قعدت، لأسباب كثيرة هتفهمها بعدين عزيزي القارئ.

* * *

بعد رجوع «لوبا» لروسيا لاستكمال دراستها، والعديد
من الخناقات اللونج ديستانس، ابتديت أفوق شوية، وأدرك
الاختلاف الرهيب اللي بيننا. إحنا بكل الأشكال ما كناش
نافعين غير جنسيًا. مبدئيًا: هي كانت روسية، ده لوحده حوار
رهيب في الاختلاف واللغة والحياة اليومية. ثانيًا: زوجها
السابق، على حسب كلامها في الآخر، كان تاجر مخدرات
روسي ينتمي بشكل من الأشكال إلى المافيا الروسية. قلقت
شوية بصراحة، وحسيت بالمنافسة، وحسيت إنني لازم أبقى
خطر زيه، هو أنا أقل من المافيا في إيه؟ وابتديت أحكيها عن
خناقات مدرسة «يحيى الرفاعي» مع مدرسة «طبري الحجاز»
والحاجات دي، وأهول فيها فشخ، وإزاي بعد كل خناقة كانت
فيه جثث قدام كل مدرسة، وهي بتصدق زي المغفلة طبعًا،
وبتقلق من مصر شوية. وغير كل ده، كل صحابها في روسيا
كانوا من الذكور، ومش من النوع بتاع هننزل نقعد في «كوستا»
والجوده، لأ يا معلم! الخروج في روسيا عبارة عن إنها بتروح
لصحابها الذكور دول في بيتهم، وبيقعدوا يسكروا وياخدوا
فودكا في حقن شرجية لحد ما يتدرمغوا ويصحوا مش فاكرين
حاجة، وأنا قاعد هنا بقى ماسك وردة، ومشغل حماقي، وبافكر

فيها بقي، وباصص للسقف والنجوم وكده، عته طبعًا! كانت حياة غريبة أوي، وكانت أول مرّة أدرك إن اختياراتاتي اختيارات واحد مندفع وجحش!

الموضوع ما هديش، بالعكس، الخناق فضل يزيد يزيد لحد ما وصلت لمرحلة إنني أدركت كلام أبويا، وفهمت إن الحوار ده خارج الجنس عمره ما هينفع. بس كنت باحبها، حب جنسي وشكلي بحت، باحب شكلها، وباحب اللي بتقدمهولي في أوضة النوم، والمطبخ، والكنبة اللي بره. المهم يعني، كنت فاكر إن ده الحب الحقيقي وكده!

لكن السبب الأساسي اللي خلّاني مش عايزها فعلاً كان موقف بعينه، وقتها أبويا الله يرحمه كان اتشخص بسرطان المخ، وما كنتش فاضيلها خالص، وكنت ندمان ومتأثر لأسباب كثيرة هاشرحها لاحقًا.

في يوم من الأيام رجعت البيت من عند أبويا، وكنت باحاول آخذ منها أي دعم نفسي، لقيتها طبطبت على كتفي لمدة ثانيتين، ولقيتها بتقولي بالإنجليزي اللي كانت ابتدت تتعلمه شوية: - لما أبوك يموت، مين هياخذ شقته؟

قالتها كده زي ما هيّ، بدون لف أو دوران أو كسوف أو أي ابن تيت! قالتها كده بكل بجاحة، وعملية فجّة! قالتها وفصلتني من أي حاجة كنت لسه حاسسها ناحيتها! حاولت أفهمها إنه عيب وما يصحش ومش وقته، هاجمتني وقالتي:

- لو إنت ما أخذتهاش، حد من إخوانك هياخذها، وأنا مش

هافضل عايشة طول عمري في أوضتك!

قفلت معاها الكلام، وسفرتها على بلدها، واتلخمت في أبويا

حتى وفاته الله يرحمه.

بعد وفاة أبويا بشهر، قرّرت الانفصال.

يمكن كان إحساس بالذنب، يمكن فُقت أخيراً وقدرت أواجه

كل حاجة وحشة شايفها فيها، يمكن حسيت إني باكرهها، وإنها

كانت السبب إني ضيَّعت أغلى وقت في حياة أبويا معاها، أو

يمكن كل ده على بعض.

هيّ طبعا كانت ضد الموضوع جدّا، و متمسكة بإمبراطور

الكبت الجنسي اللي جابلها دولاب وبلاي ستيشان وكافة شيء،

و فضلت تحاول إننا نرجع، وأنا بارفض، وندمان على كل لحظة

قضيتها معاها بعيد عن أبويا لحد النهارده، ولما رفضت أرجعها

قعدت تهددني بإنها هترفع قضايا عليّ وتاخذ فلوسي، قال يعني

كان معايا فلوس! كانت عبيطة والله! وأنا قتلها أعلى ما في

موسكو اركبيه!

لعبت معايا لعبة الفتاة المصرية الأصيلة بتاعة «أنا حامل»

وكده، وأنا ما كنتش مصدق بصراحة، بس لما لقيتني اهتميت،

قالتلي إنها هتعمل إجهاض عشان توجع قلبي. وأعتقد إنه اتوجع

شوية، حتى لو ما كانش الموضوع حقيقي، بس كنت أصغر من

إني أفهم وجعه وأحسه حقيقي.

بعدها على طول كلمت المحامي عشان أسأله نتطلق رسمياً
إزاي، قالي إنه نسي يروح السفارة ويوثق الجواز! ما عرفتش
أهزأه ولا أحضنه الحقيقة، وقفلت معاه وأنا حاسس إنني رجعت
حر ولكن بلا أب! وقفلت على نفسي شوية كثير بعدها، أو في
سفر على طول وصرمحة في حواراي وبارات أوروبا ومحاولات
نسيان أبويا، ونسيان «لوبا». وأدركت برضه بعدها بسنين إن
الوقت اللي بتضيعه في محاولات النسيان، عمره ما بيرجع!

* * *

من الآخر يعني كنت حمار لما مشيت ورا إحساسي!
وكنت حمار أكبر لما افكرت إن واحدة روسية في شرم
الشيخ ما بتكلمش عربي، ولا إنجليزي أساساً، هيّ الإنسانة
اللي ممكن أقضي بقية عمري معاها، ودي اللي هتبقى أم عيالي
وبتاع، لأسباب كثيرة فشخ، أولها سبب بسيط جداً اكتشفته لاحقاً،
ألا وهو إنني ما أقدرش أقضي بقية عمري مع واحدة مش فاهمة
إفيهاش فيلم «إشاعة حب»!

كنت حمار إنني انشغلت عن أبويا في آخر أيام حياته، بواحدة
كانت مستنياه يموت عشان عايزة شفته!



5#

لما ما إديتش لأبويا سيجارة

علاقتي بأبويا من أغرب العلاقات في حياتي، وأكثرها تأثيرًا عليّ وعلى تفكيري وعلاقتي مع الناس (*).

شخصيته كانت كومبو مرهق نفسيًا لأي ابن: رجل شديد وصارم وقاسي وأحيانًا مفترى، على أب حنون وعاطفي ومليء بالشجن والأحاسيس الأبوية. شخص في بعض الأحيان معترض على إرادة ربنا، وشخص في أحيان أخرى في قمة الورع والخشوع. صعيدي أصيل ذو مبادئ كلاسيكية، على شخص متفتح فكريًا وليبرالي للغاية... حاجات كثيرة وعكسها. يمكن الحاجة الوحيدة الثابتة فيه إنه كان نزيه ونضيف ويُشهدله في القوات المسلحة بعفة اليد والالتزام والانضباط، شفتها وسمعتها من زملائه في حياته وبعد وفاته.

(*) حُذف الكثير من هذا الفصل لأسباب سأشرحها لاحقًا في حياتي.

كم الإرهاق النفسي اللي مرّيت بيه في وجوده وغيابه، كان أكبر من أي حاجة واجهتها في حياتي، لأسباب كثيرة أوي، بس أولها كان العنف.

أبويا كان عنيف جدًّا، وردود فعله عصبية وقاسية، والموضوع في أغلب الوقت كان بيصل لحد الضرب، سواء ليّ، أو لإخواتي، أو حتى لأمي.

يمكن المشكلة الأساسية مع العنف من الأب، إن المشاهد كلها بتتحفر جوه دماغك، وبتكون صعبة النسيان إلى الأبد، مهما كبرت بتفضل فاكرها.

ما كانش عنده أي مؤشرات على الضرب، أو قيود، بمعنى إنه كان ممكن يحصل في أي وقت وفي أي حته، وبدون سابق إنذار، وبدون ما تدرك حتى خطأك كطفل. اللي هوّ يا معلم إديني سبب واضرب عادي، بس أبقى فاهم ليه. زمّر بس.

كانت علاقة غريبة، وكان قادر إنه يخلّيها أغرب وأغرب بطرق على النقيض تمامًا من العنف، زي مثلاً إنه ياخذني نتمشى لوحدنا، يحكي لي قصص حياته وهوّ صغير في البلد، حكاياته مع أبوه، يجيبي عصير وآيس كريم وحاجة حلوة، ويقول لي إنه بيحبني، أو يقعدني معاه في البلكونة ويحكي لي قصص الأنبياء بطريقته العظيمة وبصوته اللي عمري ما هنساهم، أو زي مثلاً أول أجازة ليّ من الجيش بعد تجنيدي، ويتفتح الباب ويكون أول واحد، أول وجه مبتسم على الباب من وسط كل

الأهالي المنتظرين، ونروّح مع بعض وهوّ سايق ساعتين في عز ما غضاريف ضهره كانت بتشتكي وفترة علاجه لفقرات ظهره، أو مثلاً لما كنت باكسبه في الشطرنج وأنا عندي خمس سنين وأقوله: «فزتك يا بابا»، كان يقعد يضحك كثير على «فزتك» دي، وإزاي إني مش باعرف أقول «كسبتك»، وهوّ وشه منور بالفخر إن ابنه الطفل كسبه في لعبة ذكاء. والحقيقة إني عمري ما هاعرف هل أنا كنت عبقرى فشخ وأنا عندي خمس سنين عشان أكسبه في الشطرنج فعلاً، ولأ هوّ اللي كان بيسيبنى أكسب عشان يديني ثقة في نفسي، ويعلمني إزاي أكسب، عمري ما هاعرف! كل اللي أعرفه إن ماتش الشطرنج مع أبويا كان من أكبر المتع في حياتي، أكبر يمكن من حاجات كثيرة دلوقت.

لك أن تتخيل عزيزي القارئ حجم الصراع النفسي الذي تولّد عندي، عندما يكون عندك هذا الكم من الذكريات الجميلة المحببة، وهذا الكم من الذكريات المؤلمة مع نفس الشخص، الذي لا تستطيع التحكم في حبك الفطري له، بتعيش حياة أبعد ما تكون عن السلام الداخلي.

أزمة انعدام الثقة اللي عندي تجاه أي حد في حياتي بيقولي إنه بيحبني، يمكن كان سببها إن الريفيرينس الأهم في حياتي، اللي هوّ أبويا، كان ريفيرينس مضروب. الريفيرينس ده بيقول حاجة مهمة جدًّا، إنت ممكن تكون بتحبني وقادر على إيدائي عادي جدًّا.

كان صعب عليّ جدًّا إنني أصدق إن حد بيحبني، وكنت محتاج أدلة وبراهين كثيرة أوي. وأصبح المقياس الوحيد لحب أي شخص ليّ هو فقط تحمله لأخطائي مهما كبرت، وعدم إيدائي. إذا فعلت هذا فقط، فأنت تحبني.

دلوقتِ وأنا باقول كده، أدركت إن يمكن فيه أوقات كثيرة في حياتي كنت باغلط متعمدًا، في محاولة لكشف مدى حب الشخص اللي قدامي ليّ، وقدرته على تحملي.

* * *

فاكر كويس أوي آخر مرّة أبويا ضربني فيها، وفاكر إنني كنت كبير نسبيًا، ١٧ سنة مثلاً.

فاكر إنني ما اعرفش بالظبط حصل فيّ إيه، بس ما سكتلوش، وقعدت أزعق فيه وأزقه، كأني باتخايق مع واحد في الشارع، كنت غضبان عليه غضب سنين كثيرة أوي، وعمّال أزعق فيه بصوت عالي وقوي، لدرجة إن إخواتي وقرابي صحبوا على صوتي ودخلوا يحوشوني من عليه.

دي كانت آخر مرّة أبويا وأمي اتخانقوا بسببنا، وما رجعتش يعيش معانا بعدها، فضل يعيش في شقته، وكنا بنتناوب الزيارات عليه أنا وأمي وإخواتي، وأذكر جيدًا ثقل الزيارات دي على قلبي! أذكر إنه كان حرفيًا بيتوسّل إليّ إنني أبات معاه، وأنا كنت بارفض، وبتحجج بالشغل أو بأي حاجة، سنين طويلة بادور على أي عذر إنني ما أباتش عنده.

في الزيارات القليلة اللي كنت باروح فيها عنده، كان بيبقى طائر من السعادة، مش عارف يعمل إيه ولا يجيبي إيه ولا يأكلني إيه، مش عايز يقعد من كتر ما هو بي فكر عايز يعمل إيه تاني، وأنا ما كنتش شايف ده في وقته، كنت إلى حد كبير بارد جدًا معاه، وما كنتش شايف إني بارد، كان منطقي بالنسبة ليّ إني مش عايز أشوفه، مش عايز أفكر، أو يمكن حتى مش عايز أشوفه منهزم، ما كنتش عايز أشوفه وحيد، ومش عايز أشوفه عامة، وخايف منه، باستنى اللحظة اللي هاودعه وأخرج فيها من الباب بفارغ الصبر وأتفس الصعداء، كأن حجر جاهلي كبير من بتوع تعذيب المسلمين الجدد اتشال من على صدري.

* * *

الدرس القاسي دايماً في أي مشاكل مع الأهل، هوّ إنهم في الأول وفي الآخر هيفضلوا أهلك، وهيفضل شعورك الفطري تجاههم موجود!

أكثر مكالمة تلفون لن أنساها بعد خناقتي معاه على «زوجتي الروسية»، كنت في الشغل ونزلت أشرب سيجارة، لقيته بيتصل، قبلها كنت مش بارد على مكالماته لما بيتصل، باحلقله، مقاطعه، حاجات كثيرة مش قادر أصدق إني عملتها معاه. في المكالمة دي كان ألطف شخص على وجه الأرض: «إزيك يا هشام، واحشني»، «مش هتيجي تشوف أبوك بقي؟»، «نفسي أشوفك يا هشام». كلام كتير لسه بيرن في دماغني، وبيخرط قلبي بمخرطة

ملوخية كل ما أفكره، وأفكر ردودي الباردة عليه: «إن شاء الله»،
«ربنا يسهل»، «حاضر»، «معلش مشغول شوية بس في الشغل».
السبب الأساسي في إن المكالمة دي مميزة، هوّ إن بعدها بأسبوع
كلمني، وقالني بصوت واهن:

- هشام، الحقني يا هشام، أنا تعبان!

رديت عليه رد واحد:

- خمس دقائق وهاكون عندك.

أقسم بالله وبدون أي مبالغة أنا مش فاكر أنا لبست إيه ولاء
كنت سايق إزاي، كل اللي فاكره إن الموضوع كله أخذ سبع
دقائق من نهاية المكالمة لحد ما كنت عنده، في مشوار عادة
بياخذ خمسة وأربعين دقيقة، وأحب أعتذر لأي حد ممكن
أكون كسرت عليه أو لبسته في عمود، كنت مشغل الانتظار بتاع
العربية، اللي هوّ المفروض إنه يعتبر الإشارة الدولية لو إنت
مشغله وإنت سايق لأن عندك «emergency» أو حالة طارئة،
وكنت حرفياً باطلع فوق العربيات.

كان معايا مفتاح، فتحت الباب ودخلت ومش عارف أتوقع
إيه، لقيته واقف في الصلاة، بيضحك، وبيقولي «إزيك يا هشام»،
ولا بس رجل واحدة من البنطلون ونص القميص، وضحكته
معووجة شوية، كان أصيب بشلل نصفي!

ساعدته يكمل لبسه وهو مبتسم وعمّال يهرّج، وأخذته ورُحنا
المستشفى، ومن هنا ابتدت رحلة اكتشافنا منها إنه كان مصاب

بجلطتين في المخ، وورم خبيث في المخ برضه، علمًا بأنه لحد
قبل الاكتشاف ده بأيام معدودة، كان بيسوق، وبيخرج، وبيهرج،
وبيحضر ماتشات الزمالك كصديق مقرب لأعضاء مجلس الإدارة
في أواخر الألفينات، كان عايش عادي، كان صخرة بمعنى الكلمة.
اللي باعتبره أسوأ غلطة في حياتي، واللي كانت مسيبالي عقدة
ذنب رهيبة، هيّ إني ما كنتش قادر أروح أشوفه في المستشفى،
ما كنتش قادر!

ما كنتش عارف، ما كنتش متحمل، كان أصعب مشهد عليّ في
الدنيا إني أشوف أبويا في سرير مستشفى، وبيصارع السرطان!
كان المفروض أبقى جنبه كل يوم، وأمسك إيده وأقوله «ربنا
يقويك»، بس كده، ما كانش مطلوب مني حاجة تانية، حتى لو
الموضوع كان صعب ومؤلم كان لازم أدوس على نفسي، لازم،
كان لازم يعني، وحتى لو كان أب عنيف أو قاسي!

فيه أوقات هتعددي عليك هيبقى صعب عليك تعمل حاجة
معينة لشخص معين، هتبقى موجهة، هتبقى مش قادر ومش
عارف، بس لازم تعملها، لازم تعمل التصرف السليم اللي مفيش
من وراه أي ندم، مهما كان حجم الألم اللي هيبجي من وراه،
صدّقني يا اللي بتقرأ الكتاب ده، لازم والله!

ربنا ما يوريكوا يعني، المرض ده في مرحلة ما بيخلي شكل
الشخص فعلاً يضايق أي حد بيحبه! يمكن ده السبب الأساسي
في إني ما كنتش باقدر أروح.

أذكر إنني لما رُحلتله في إحدى المرّات، كان السرطان استولى على جسده تمامًا، وكان حرفيًا أشبه بمومياء من المومياءات الموجودة في القاعة الأساسية بالمتحف المصري، وده مش تشبيهه كالعادة، دي كانت الحقيقة. اتخضيت، وقفت قدام السرير مش مصدق إن ده أبويا، والله ما مصدق، كان فيه حد جنبه وقاله إن أنا جيت. وشه شبه نور، وصوته طلع سنّة، وحاول يتكلم وهوّ بيستجمع قوة من ورا ضعف عظيم، في مشهد لو قعدت أوصف فيه أقسم بالله ما هاقدر أوصفه في مليون كلمة!

قال:

- هشام.

من المرّات القليلة اللي هتسمع فيها اسمك ورد فعلك يكون إنك تنهار في البكاء، لما تسمعه بصوت أبوك وهوّ بييموت. بكيت! ورُحت جنبه عشان طلب إنني أقربله، مش مجمع إن هذا الجسد الواهن يحمل داخله روح أبي، ذلك الكيان الذي عهدته صلبًا، وعمّال أعيط وأقوله:

- معلش يا بابا! إن شا الله أنا! معلش يا بابا!

وهوّ يقولي وهوّ بيحارب عشان يخرج النّفس:

- بعد الشر عليك! بعد الشر عليك يا حبيبي!

كان بيخرج النّفس بالعافية، بس ما قدرش يمنع نفسه إنه يقول «بعد الشر عليك يا حبيبي»! لحظات فوق احتمال البشر! رفع ذراعه وحطها على أيدي، وحاول يخلّيني أقربله، فنزلت

بسرعة بوشي جنب وشه، لقيته بيحاول يقولي حاجة في ودني
مش قدام الناس.

ما سمعتش أول مرّة.

قلته:

- قول تاني، معلش يا بابا ما سمعتش.

وقربت أكثر، سمعت همسه وهو يقول باستعطاف واحد ييموت:

- هشام، سييلي سيجارة.

رفعت راسي وبصيتله، باتأكد إنه فعلاً يقول كده، لأسباب

كثيرة أوي، أولها إنه ما كانش عارف إني باشرب سجاير، ولو

كان عرف كان فشخني حرفياً، وده من واقع تجربة مع أخويا،

وطبعاً حالته الصحية.

سرحت لجزء من الثانية، أيدي اتمدت على جيبي وعيني مش

بتتشال من عليه، ورجعت مكانها تاني، وقلته:

- مش هينفع يا بابا إنت تعبان!

وهو يتحايل عليّ، وأنا أحاول أقنعه وأنا باعيط إنه

ما يستحملش، لحد ما وقت الزيارة خلص، ومشيت في اليوم

ده، أقل ما يقال يعني إني مشيت مختلف!

أبويا الله يرحمه مات بعدها بأسبوع!

تاني يوم الصبح بابص في المراية لقيت شعرة بيضا، أول

شعرة بيضا في حياتي.

* * *

ابتديت رحلة من غياب السلام الداخلي في حياتي، انتهت
عند الكتاب ده، وخصوصًا الفصل ده بالتحديد، اللي قعدت
أكتب فيه على مدار ٥ سنين، وكل مرّة ما باقدرش أكمله.

أشيل وأحط، أكتبه تاني من الصفر، وألاقيه طلع بنفس الكلام،
بنفس الترتيب، بيطلع هوّ هوّ كل مرّة بنفس المشاعر، اللي
حاولت قدر ما استطعت إنني أشيل منها كثير.

بعد سنين من... تقدر تقول كده «التخبط»، قدرت أوصل
للاستنتاج العقلاني والأخير، المريح نفسيًا: أبويا ما كانش
وحش أو شرير، بس كان فاقد القدرة على التحكم في ردود
أفعاله، لسبب ما أيّا كان، نفسي، طبي، الله أعلم. وأنا كابنه،
وباحبه غصب عني، الموضوع كان مسبلي أزمة نفسية كبيرة:
إزاي حد ممكن يحب حد أوي كده، ويأذيه أوي كده؟ إزاي؟!
مش منطقي! دا أنا طفل حتى مش هاعرف أحمي نفسي منك!
الموضوع أثر فيّ أكثر من أي حاجة في الدنيا، وقدام نفسي
يا إما كنت باحاول أكرهه عشان أسهّل الموضوع، يا إما كنت
باحاول أدور على تفسير. وفضلت سنين أدور لنفسي على
سبب مقنع يبررلي أفعال أبويا، يبررلي ليه أبويا ما كانش الأب
المبتسم الروش زي اللي باشوفهم عند صحابي في البيت
وبييجوا يهرجوا معانا دول.

اللي أنا متأكد منه، أو اللي اتأكدت منه لاحقًا يعني، إنه كان
بيحبني، وشه في سرير المستشفى حاجة ما تشرحش، حاجة

مش هيفهمها غير اللي مر بيها، بس خدت سنين كتيرة أوي
عشان أصدق، وخدت سنين أكثر في الندم إنني ما فهمتش ده
بدري شوية!

هافضل طول عمري شايف الحلو في أبويا بس.

أبويا كان ذكي، وعظيم، وراجل.

وكان تعبَان.

زي أي حد فينا.

درس واحد مفيش غيره: سامح أي حد من أهلك قبل فوات
الأوان، لو مش أهلك مش مهم، ما تسامحهمش، براحتك،
يتحرقوا، ده مستوى من التسامح مش هدفي هنا دلوقت، حلو
إنك تسامح كل الناس، بس أنا باحاول أبقى محدّد هنا، اللي
أقدر أقول هولك بثقة: سامح أبوك، وأمك، وإخواتك، وقلهم
إنك بتحبهم، إلحق اللي عايش منهم!!

لو كل الأدلة بتقول إن شخص ما بيحبك، وفيه أفعال تانية
بتقول عكس كده، الأفعال دي في الأغلب بتكون غصب عنه.
دي بالنسبة ليّ من أهم الحاجات اللي هاقولها في حياتي
بصفة عامة.

كان نفسي يفضل موجود لحد ما أكبر وأعقل وأفهم، وعلاقتنا
تتحسّن، وأسلمه لربنا تسليم طبيعي ومريح نفسيًا، بس السرطان
مرض لعين!

وبما إنني نفسي بقى، فكان نفسي إنني أشوف الحلو بس من

أبويا في حياته، وما يحصلش كل ده، وما أروحش في الدوامة
دي، عشان خدت سنين كتيرة أوي عقبال ما رجعت منها!
وكان نفسي أسيله سيجارة!

بس كنت حمار!

قراري في النهاية، إني يوم لما أكون أب، هاعمل كل حاجة
تخلي ولادي سهل يصدقوا إن حد بيحبهم، ومش هاعمل أي
حاجة تصعب عليهم ده.

7#

لما ما كُنْتش باشرب ميه

هناك علاقة وطيدة بين جسم الإنسان وحالته النفسية والجسدية،
والسوائل.

لو تعرضت لدرجات حرارة متفاوتة، أو تغييرات مفاجئة في
درجة الحرارة، فيه سوائل بتخرج من مناخيرك.

لو تعرضت لدرجات حرارة عالية، جسمك بيتنج سوائل
عشان يبرد نفسه.

لو جالك تسمم من أكل ما، فيه سوائل بتخرج من مؤخرتك
أو بُقك، أيهما أقرب، وعلى حسب شدة التسمم.

لو شعرت بالنشوة، جسمك بيخرج سوائل، مش كثير بس
بتبقى لحظات جميلة.

لو تعرضت لجرح ليس بالضرورة غائر، بتنزف سوائل، أو
جسمك نفسه بيكوّن سائل لغلق الجرح.

لو تعرضت لموقف محزن أو ضغط نفسي أو عصبي، بتخرج
سوائل من عينيك وممكن جبهتك ومناطق أخرى.
لو تعرضت لظلم أو قسوة، عينيك بتخرج منها سوائل.
لو تعرضت لفرحة كبيرة بعد حزن عميق، عينيك بتخرج
منها سوائل.

لو تعرضت لألم غير محتمل، عينيك بتخرج منها سوائل.
لو حسيت بالانتصار، عينيك بتخرج منها سوائل.
لو حسيت بالهزيمة، عينيك (ربنا يكون في عونها) بتخرج
منها سوائل.

الغريب إن أغلب السوائل دي بتخرج من أي حته (بُقك،
مناخيرك، مؤخرتك، تحت ذراعك، جبهتك، إلخ) لو الموضوع
جسدي، بس كل ما هو نفسي بتخرج السوائل من عينيك في
الأساس، ثم مناطق أخرى. مفيش حد خسر ماتش في كاس
العالم وراح قالع الشورت وراشش إسهاال متين على النجيلة
بكل حزن وندم وبيخبط بإيديه على الأرض، أو واحد أبوه مات
وواقف في الجنازة معاه مناديل يمسح بيها باطه وبيقول هتسيينا
لمين، أو واحدة جوزها زعلها فراح مصالحها وبص في عينيها
برومانسية ودفء وماسح... بُقها (مشيها بُقها) بإيده بكل حنية.
عمري ما فهمت العلاقة بين العينين والحالة النفسية، هل
الموضوع ليه علاقة باللي بتشوفه حرفياً؟ هل دي محاولة من
العقل إنه يغسل اللي إنت شفته؟ وليه مش بتطلع سوائل من

ودنك لو سمعت حاجة مزعجة مثلاً؟ أو إيدك تفرز ديتول بعد ما تسلم على حد خرج من الحمام وما غسلش إيده؟ هل عشان العينين هيّ المركز الأساسي للـ «input» بتاع المخ؟ وليه الدموع مالحة؟ هل الموضوع ليه علاقة بالبحر؟ وهل ده يخليّ الناس بتاعة «لما باقف قدام البحر باحس إني ارتحت نفسيًا» معاهم حق؟ هل الحل في الملح؟ طب لو كده، ليه الملح بييجيب إسهال لو تناولته بكميات مع ميه، اللي هوّ هوّ الدموع؟ كل ما آجي أفكر، الموضوع يدخل مني في عمق وكونيات وحاجات مش أدها، بس فعلاً نفسي أفهمه.

كان نفسي أنهي الموضوع ده بعمق، وأشبه نوعيات الناس نفسهم بالسوائل، وإزاي بيختلفوا في مستوى نقائهم ولزوجتهم ولونهم وطعمهم.

الحقيقة الكلام ده هدفه إني أفكر الناس تنزل البحر، تستخدم الملح، وتشرب ميه كثير، عشان أكثر من سبعين في المية من تكوين جسمك سوائل.



9#

لما فتشت في الماضي

بصوا يا قراء...

من الآخر، وبكل ثقة، كنت حمار لما باحن لكل علاقة قديمة فشلت وأحاول أصلحها مرة ثانية، بسبب إحساس زائف إنني لو غيرت حاجة معينة فيّ، العلاقة دي ممكن ترجع أحسن من الأول.

كنت مش حمار، كنت كروديا. الشتايم القديمة دي ليها مذاق ثاني والله!

في العلاقات الإنسانية، والعلاقات بالجنس الآخر تحديدًا، لقيت إن الصفحة اللي بتتقل بتتقل لسبب، العلاقة اللي بتوصل لنهاية حتى وإن لم تكن النهاية الحقيقية، فهي علاقة منتهية، والموضوع اللي بيوصل لرغبة في الانفصال مرة واثنين وتلاتة، يبقى موضوع مخيش تخيشة توتال لوس، وكان القدر

يحاول إبلاغك بشتى الطرق: «مش جاية يا معلم، ما تقاوحش،
ما تقاوحش يا ابن العزيمة!».

وصولك لرغبة مؤكدة في الانفصال، حتى وإن كانت لحظية،
هو تنبيه من نفسك لنفسك إن الموضوع ده غالبًا هيكون له نهاية
دائمة، سواء بسببك، أو بسبب الشخص التاني.

إحدى أكبر مشاكلك كانت إن تقريبًا مفيش بنت في حياتي
انفصلت عنها وما رجعتلهاش تاني!

كنت أسيبهم وأرجعهم، أسيب عن قناعة، وأرجع عن قناعة
أكبر!

كل مرة ده كان بيحصل، كانت النهاية المأساوية أو الدرامية،
أو العادية السلسة حتى، بتتحول لنهاية أكثر مأساوية وأكثر درامية.
كل مرة كنت باحاول أصلح، كنت، غير مدرك، بابوظ
الموضوع زيادة، أو فاكر إنني بابوظه زيادة، عشان أكون دقيق.
كل واحد فينا كان بيحاول يدي للشخص الآخر فرصة تانية
إنه يبقى، المرة دي، النسخة الأقرب للي هو عايزه منه، وكل
مرة كنا بنفشل.

يمكن عشان كل واحد عنده في دماغه صورة محددة للي
هو عايزه في حياته من الشخص الآخر، بعيدة تمامًا عن واقع
الشخص الآخر، بس كان فيه دايمًا مشاعر وانجذاب صعب
تفسيرهم بيشدونا لبعض حتى وإحنا عارفين إن الصورة دي
مستحيل تتحقق.

اختيار خاطئ من الأول، بس لسبب ما كنت بامشي بنفس
الأسلوب!

نسيب بعض وأنا عارف إنها مش هتنفعني ولا هانفعها،
وتوحشني، ولسبب ما يعلمه الله أقول لنفسي إني ظلمتها.
الصوت اللي كان في دماغني كان بيقلني كده، إني ما إديتهاش
فرصتها، وأرجع أكلمها، وأحاول معاها تاني، ونرجع، وأتصدم
أكثر، وأكتشف إني ما ظلمتش حد غير نفسي، مستني حاجة
معينة، تصرفات معينة، كلام معين، وكله ما بيحصلش! ونسيب
بعض تاني عشان حمار ومش شايف من الأول إننا فعلاً ما ننفعش
بعض مهما حاولت، الصدمة دي طبعاً كانت بتولد حمار جديد!
فيه علاقة من العلاقات، خدت من عمري أربع سنين، أون
آند أوف، «روس» آند «راتشيل» في نفسنا جدًا، بس من غير
الإيهات الخفيفة الفاميلي فريندلي.

علاقة ترفض وتأبى أن تنتهي مهما حصل، وبتفرض نفسها
على حياتي في أي وقت، أو عشان أكون محدد، في أي وقت
ياكون ابتديت أتعاफी منها وأبقى كويس.

كل مرّة كنا بنرجع، قلبي اللي كان عبيط كان بيفتكر إن خلاص
هي دي المرّة الناجحة اللي هنبقى فيها مع بعض للأبد، وهنحضن
بعض ونشيك إيدنا للأبد، ونقعد على مرجيحة بيت كبير في
الجنينة ونحكي حكاية حينا لأحفادنا. وكل مرّة كنا بنسيب بعض
كنت باتأكد أكثر إننا لا نصلح لبعض.

حاولت أفهم نفسي في العلاقة دي تحديدًا: ليه باعمل كده؟
ليه بارجع لنفس الشخص اللي أنا مش عايزه؟
قلت يمكن قلبي كان يعاني من بعض العلوقية العاطفية،
بالإضافة لعقدة الذنب اللي كنت باعاني منها وتخلصت منها
للأبد، واللي زي المغفل كنت دايمًا باحكيها لأي واحدة باحبها،
وهمَّ ما شاء الله بلا استثناء كلهم استخدموها ضدي عشان
يرجعوني، حاجة وسخة جدًا.

بعض الستات الحقيقة يعني عندهم القدرة، لو عرفوا إنك
شخص إحساسه بالذنب عالي، إنهم يقولوك جملة حرفيًا
«ترقدك»، جملة واحدة، بس تنيمك على بطنك في هاوية من جلد
الذات، هوك، بذرة بتزرعها في دماغك وتسيبها تنمو وترعرع
لعقدة ذنب جديدة، وهم إنك ظلمتها، وإنك كنت إنسان مش
كويس وقاسي ووَحش كاسر وميكس فريد شوقي على توفيق
الدقن على زكي رستم على أندريه تيكو.

كانت بتقدر تقنعني كل مرة إني أنا الـ «villain» في القصة.
وعشان أغلب البشر من جواهرهم كويسين، وعشان رد فعل طبيعي
إنك تحاول تثبت إنك مش وحش، وإنك مش بالسوء اللي بيتقال
عنك في وشك، بترجع وتحاول تثبت العكس، حاجة كده زي
فيلم «إينسيبشان».

الشيء اللي دفعني إني أستثمر وقت ومجهود كبير في التخلص
من هذا المبدأ إلى الأبد: الذنب. خصوصًا في هذه العلاقة اللي

كنت شايفها سامة جدًا، واللي سببتلي الكثير من الأذى اللي
ما كنتش باشوفه، بمعنى، بمجرد دخولها في حياتي - أو عودتها
بمعنى أصح - كنت دايمًا باقع، وقعة صريحة لا قومة بعدها، كانت
بتنهيني كإنسان كل مرة، وكل مرة بنفس الطريقة، وبتتكرر نفس
السيناريوهات اللي بتحصلي كل مرة: مشاكل في الشغل تنتهي
بإني أسيبه، مشاكل في علاقاتي مع الناس، مشاكل في تعاملاتي
بصفة عامة وحالتي النفسية.

مهما كنت عالي وطاير في السما، كنت باقع! كانت بتوقعني!
كنت باحبها للأسف، وجوايا جزء شايف الغلط في حياتها
وفي شخصيتها ومتقبله، وحاسس إني عندي القدرة إني أساعدها
وأغيره وأصلحه، وأحس إن حياتي ليها معنى بإني أكون النور
في حياة حد باحبه.

إنها عقدة المسيح المخلص، بحثك عن الخلاص من خلال
جذب المدمرين نفسيًا، ومحاولة إصلاحهم، والانتهاه بتدمير
نفسك في نفس العملية، وخسارتك لكل شيء، بما فيهم الشخص
اللي كنت بتحاول تنقذه.

كم من مرة أحبينا شخصًا يكره نفسه، فكرهنا أنفسنا
بالتبعية!

أقدر أقسم بالله وبكل ما هو مقدس باسمه، إن اللي بيكرهك
في نفسك مش بيحبك! بس خلينا في المهم دلوقت.
فضلنا نسيب ونرجع، ونسيب ونرجع، وكل واحد بيكتشف

جزء جديد من شخصيته في كل مرة بنرجع لبعض، لحد آخر مرة، اللي كانت مميزة جدًا الحقيقة، كانت حاجة كده زي الأفلام اللي فيها «Plot Twist».

هدية من ربي العظيم...

قبل هذه المرة كنت اشتغلت على نفسي جامد، من ناحية الشغل ونفسيًا وماديًا وكل حاجة، كنت في أعلى نقاط حياتي، في حالة نفسية أحسن من أي وقت مضى، وأكثر من أي مرة سابقة رجعنا فيها لبعض، كنت حاسس إنني مسيطر على زمام أمور نفسي... ولقيتها قدامي، وحسيت وقتها بصراحة إن الدنيا هدتها وهدتني، وحسيت إنها قدري وإني قدرها، إحساس زائف وكلب وجزمة وحيوان، وكل الشتايم البناتي اللي في الدنيا!

خدت قرار مهم أوي، بعد أربع سنين ضاعوا من حياتي في إحساس بالذنب معاها، وكلمات معينة منها كانت لسه بترن في ودني، وتطرحتني أرضًا، قررت إنني هادخل هذه العلاقة مسيطرًا سيطرة تامة على أقوالي وأفعالي، وهاعمل كل حاجة صح زي ما الكتاب بيقول، ومش عارف أنهي كتاب اللي بيقول إيه بس القصد يعني.

بالفعل، دخلت العلاقة دي دحيح، باجاوب كل الإجابات النموذجية، باعمل كل حاجة ولا في الأفلام. كنت خارج من فيلم «ديزني»، كان ناقص بس أخذها ورايا

على حصان أبيض ونمشي بيه على البحر بالتصوير البطيء،
وشعرها يتطاير ويدخل في بقي.

كنت شايف كويس أوي أوي أوي أنا باعمل إيه معاها، باكتبه
حتى على ورق عشان ما أنساهوش، أو عشان هيّ ما تنسيهوليش
بمعنى أصح.

كل حاجة كويسة وكل قرار سليم باسجّله:
افتكر يا هشام.

إنت كنت كويس يا هشام.

إنت كنت رومانسي.

إنت كنت جدع.

إنت وقفت جنبها.

إنت استحملت.

إنت نضيف.

إنت بتعاملها أحسن معاملة.

إنت ما غلطتش.

إنت ما قلتش حاجة جارحة.

افتكر كل حرف قلته، وكل تصرف عملته يا هشام.

اصحى!

فوووق!

ومع أول خناقة شفت اللي كان بيحصل فيّ لمدة أربع سنين.

شفت إنني كان بيتلعب بيّ كرة، وكرة رخيصة كمان!

شفت إنني كان بقالي أربع سنين باليوم نفسي على حاجات
ما عملتهاش، بس هيَّ كان عندها القدرة إنها تقنعني إنني عملتها...
قدرة خارقة!

شفت أسلوبها اللي كان بينقسم لأربع خطوات ثابتين كل مرّة:
١- هدم ثقتي في نفسي بشتى الطرق، وتبقى هيَّ دائماً المصدر
الوحيد اللي ممكن أتأكد منه أنا باعمل أي حاجة صح
ولأ غلط.

٢- تشويه صورتي قدام نفسي، أشوف نفسي وحش دائماً إلى
أن تثبتي هيَّ العكس، وما ينفعش حد غير هيَّ.
٣- استغلال عقدة الذنب اللي كانت عندي في إنها دائماً
تحسني إنني أذيتها أذى ما يتوصفش.
٤- استجماع أي طاقة ممكنة للسيطرة عليَّ. أي.. طاقة..
ممكنة.

شفت كل حاجة بوضوح.
شفت اللي كان كل الناس اللي حواليَّ بتصرخه وأنا مش سامعه.
شفت إنني كنت حمار فعلاً، حمار قلبه أبيض جداً، ومش
مدرك إن فيه طاقة خفية هيَّ اللي بترجعني كل مرّة لشخص أنا
متأكد تمام التأكد إنني ولا عايزه، ولا باحبه، ولا ينفعني.
كنت للأسف عايش مع واحدة تعبانة نفسياً، ممكن تعمل
أي حاجة، وخليني أشدد على النقطة دي، أي حاجة بمعنى أي
حاجة، عشان تخليني جنبها مش أكثر.

ولما ربنا أراد إنني أشوف، دي كانت أول مرّة في حياتي
أتخلص من إدمان هذه العلاقة للأبد، الموضوع فعلاً انتهى في
اللحظة دي، وفقدت الرغبة في المحاولة فيه تاني للأبد.
كانت صعبانة عليّ مش أكثر.

بس أقولك على حاجة بقي؟ زعلت.
حتى وأنا مهياً نفسي، حتى وأنا كبير يا جدعان (بصوت سعيد
صالح).

ليه؟ عشان كنت باحبها، بدون أي مؤثرات خارجية، ودي
حاجة كرهها لنفسها خلاها عمرها ما هتقدر تشوفها!
ووقعت في دايرة مراجعة نفسية رهيبة للسنين اللي استثمرتها
في هذه العلاقة، وشففت حاجات أكثر.

عمر ك سألت نفسك بعد ما فركشت مع حد في لحظة غضب:
إنت ليه فركشت؟ الصوت اللي جوه دماغك اللي عمّال يقولك
«انهي الموضوع دلوقتِ حالاً» ده جاي منين؟ ما هو أكيد طالع
من حته. بعد سنين طويلة وبحث مضني مع النفس، اكتشفت
إن الصوت ده نابع من جواك، مفاجأة فشخ، صح؟ مش جواك
من القولون مثلاً، بيبقى من عقلك الباطن، بيقولك الموضوع
ده مش نافع يا معلم، عقلك بيصرخ صرخة شبيهة بصرخة نادية
الجندي وهي بتتعذب في سجون إسرائيل في أفلام التسعينيات،
اللي كانت شبيهة أوي بشقق المهندسين.

صرخة من عقلك الباطن بيقولك: «أنا شففت كل حاجة غلط

في الشخص الثاني، ومش عاجباني، ومش قادر أعيش معاها،
وإنت بتكارك في الهوا».

عقلك بيحاول يقولك إنت على طريق السويس وإحنا رايعين
إسكندرية، أو بيقولك هات بيتزا وإنت بتجيب هابي ميل.
أو، وده احتمال لا يقل في نسبه برضه، عقلك بيطلبك إنك
ترحم الشخص الثاني من نفسك، ومن اللي إنت بتعمله فيه،
لأنك مش قادر تشوف نفسك.

رسالة استغاثة من عقلك الباطن بيطلبك فيها إنك تختار
صح، أو إنك تعلي نظرتك الدونية لنفسك اللي بتخليك تختار
أقل مما تستحق، أو تقلل نظرتك النرجسية اللي بتخليك تختار
أكثر مما تستحق، أو تبطل اختياراتك غير المنطقية من الأول، أو
محاولة لتنبهك إنك عمال تظلم ناس بتحبك وإنت مش واخذ
بالك، أو حتى، ودا الأهم، إن شكوكك كلها في محلها بس إنت
اللي بتخدع نفسك.

عقلك الباطن في كثير من الأوقات بيبقى أذكى منك، وشايف
حاجات إنت مش شايفها، بس مش عارف يتكلم معاك، وإنت
بتكون عايش في أحد تجليات مصطلح «البرشام سايق»، حتى
لو ملكش علاقة بالبرشام.

كثير مننا مش فاهم دور العقل الباطن ده إيه، بس خليني
أوضح دوره حسب رحلة البحث المضنية اللي قضيتها وراه.
عقلك الباطن دوره الأول والأساسي: حمايتك.

أوحش حاجات حصلت في حياتي ووقعتنني، كانت من
ستات!

بس برضه أحلى حاجات في حياتي، واللي قومتنني، كانت
من ستات!

فيه ستات جميلة أوي أوي أوي يعني، لأبعد الحدود،
أجمل من ألوان الطيف واليونيكورن ومشهد الغروب على
البحر وكل حاجة في الدنيا، أجمل من أجمل حاجة في الدنيا،
بس برضه فيه ستات شريرة، لأبعد الحدود، أشر من شخصيات
مسلسلات القناة الأولى في التسعينيات، الأوفر اللي ضارين
شعرهم أكسجين وعاملينه فرنشة دول.

شفت ده، قابلته، موجود والله.

قدرة غير آدمية على الشر، وكأنهم دراع الشيطان اليمين، أو
الشيطان نفسه هو اللي دراعهم اليمين، الصبي بتاعهم.

الحقيقة، الشيء الوحيد اللي عمري ما قدرت أفهمه، هو كره
الست لشخص مش عايزها، ما أذاهاش، ما جرحهاش، ما جاش
عليها بأي شكل من الأشكال، ولكن هو مجرد شخص لم يشعر
بالانجذاب ليها، أو كان معاها في علاقة وقرر إنه مش عايز شكل
العلاقة ده تاني، مش حابب يكون معاها.

بتحصل، عادي، أو أنا كنت فاكر كده يعني، لأنني ما كنتش
فاهم حجم كبرياء الست القوية القادرة دي، وهي كبرياء تكاد
تصل في حجمها إلى كبرياء إبليس لما رفض يسجد لآدم.

والتزامهم التام وحجم الـ«dedication» لتدمير هذا الشخص،
يكاد يتساوى في حجمه بالتزام إبليس بتدمير حياة آدم وإغوائه
وإبعاده عن الطريق الصحيح.

زمان في الأفلام كنت باشوف الست اللي عايزة تنتقم من
راجل، فتروح لساحرة أفريقية أو مغربية وتطلب منها يا إما
ترجعه ليها بالعافية، يا إما تدمر له حياته. وكنت فاكره خيال.
عمري، عمري، عمري تالته كمان، ما كنت أتصور إن ده
ممکن يحصل في الحقيقة! عمري ما تخيلت إن حد يبقى
عنده قدرة صريحة على الأذى، ويكون عايش وسطنا عادي،
ويخرج ويهزر وبيتزل ستوريز على انستاجرام عادي جدًا،
ولا كأنه فشخ حد في حياته، ولا كأنه بيحاول يدمر حياة إنسان
ما أذاهوش في حاجة!

القصة كلها في مبدأ «إزاي»: إزاي ما تحبنيش؟ إزاي ترفضني؟
إزاي ما تبقاش عايزني؟ إزاي تقولي لأ؟
معركة كبرياء لهذا الشخص مع نفسه، إنت بتدخل فيها بدون
ما تكون طرف فيها حتى.

اللي هو أنا مالي يا معلم!

كل ما بتكبر وبتشوف في الدنيا، بتفتكر المشاهد والشخصيات
الأوفر اللي كانوا في مسلسلات وأفلام زمان دول، اللي كنت دايمًا
تتريق عليهم، وعلى طريقة تصويرهم وأدائهم السمج السخيف
الأوفر في الشر، وبتكتشف إن الواقع مش بعيد أوي عن كل اللي

إنت كنت فاكراه مبالغة ده، بل هو يكاد يكون متطابق، سواء في رحلة البطل، أو في حجم الشر الموجود داخل الـ «villain» اللي يوسف بيه وهبي شخصياً كان ممكن يفشل في إنه يقدر يصور حجمه. ويوسف بيه ده كان سفير جهنم، شوف يا مؤمن، بس والله كان كيوت جداً جنب ناس موجودين في الدنيا!

في نفس ذات الوقت، هتلاقي إن فيه ستات كده، ملايكة رحمة ونور وجمال وحب، في الشكل وفي الروح.

عشان ربنا كان كريم معايا، فيه دول برضه.

فيه ستات أعرفهم أنا، على أتم الاستعداد إنني أجيب جناحين وأنبوتين أمير وألزههم بنفسي على ضهرهم.

إنت.

فيه ست هتشوفك في أزمة، قلبها هيحس بيك، وهتلاقيها بتحاول تساعدك من بعيد لبعيد، من غير ما إنت تعرف حتى.

هيّ حسست بس، وعازية تساعدك.

قد تكتشف بالصدفة بعد مرور وقت طويل كمية المساعدة اللي كانت فيه واحدة ما تعرفهاش كويس حتى، بتقدمها لك، بدون مقابل، وبتفهم كلمة «ملاك».

فيه ست تانية بتقدر تشوف جواك اللي إنت مش قادر تقوله، وبتفهمه، وبتحاول تحلوه لك، بتحاول تطبطب عليك، لوحدها، من غير ما تطلب منها حاجة... ملاك.

فيه ست بتحس بيك، وفيه ست بتطبطب عليك، وست

تخدمك بقلبها، وبعينيها، وست تديلك كل وقتها، وست تديلك
عمرها، وست تفضل جنبك حتى لو بينكو بلاد.

الحمد لله، كنت محظوظ كفاية إنني أقابل كل دول، وأحس
أد إيه كيان الست لما بيبقى روحه حلوة، بيبقى كيان عظيم، كيان
يستحق الحب والإخلاص والتقدير، كيان في غاية الحلاوة
والجمال.

تقريبًا في كل مرة كنت باقع في حياتي، كان اللي بيقومني
واحدة ست، باستثناء مرّات معينة.

ولما كنت فاكر إن دول الستات، وبصيت على أمثلة تانية،
اكتشفت إن الموضوع سواء خير أو شر، مش مقترن بالستات
بس، فيه رجالة جواهرم شر يكفي لإضاعة مدينة متوسطة الحجم!
فيه رجالة برضه بيدمروا ستات لمجرد إنهم رفضوهم، تدمير
صريح لمجرد إنهم ما كانوا عايزين، بس كده. وبيتقموا منهم
انتقام واضح وصريح، ويبحاولوا يدمروا حياتهم بشتى الأشكال،
شفت من ده قدام عيني برضه.

فيه رجالة تانيين، ممكن يدوا واحدة عمرهم، أو يفضل جنبها
بكل الأشكال في حياتها إلا إنه يكون حبيبها، شفتهم دول برضه،
وقلبي معاهم وربنا يكون في عونهم.

القوة بتبين طبيعة الشخص الحقيقية: كل ما الشخص ازدادت
قوته ونفوذه، بقى أسهل عيوب شخصيته تبان، وأول عيب ببيان
دائمًا بتكون هي الكبرياء اللعينة!

كنت فإكر إني حمار برضه لما كنت باختار حد - من وجهة نظري - جريح، وأحاول أبقى المسيح المخلص في حياتهم، وأخلط الحب بالتعاطف والرغبة في التغيير والإصلاح، بس في الواقع وبكل بساطة، الفكرة كانت إنك بس مش هتقدر تساعد حد وإنت محتاج مساعدة، ومش هتقدر تدي وإنت محتاج. زي الطيارة كده، بيقولك البس الماسك بتاع الأكسجين الأول وبعد كده ساعد اللي جنبك.

* * *

الخلاصة يعني...

الماضي لو كان عنده حاجة جديدة يقدمها ما كانش بقى ماضي، فمش أي ماضي تندم وتلوم نفسك عليه. لكن... لو إنت في الحاضر كويس، واشتغلت على نفسك، وفهمت نفسك، وحليت مشاكلك، لو فيه ماضي اللي ما كانش المفروض يكون ماضي، هيفرض نفسه عليك تاني من غير حتى مجهود منك، عشان القدر والنصيب أكبر من الزمن. نصيبك دائماً هو اللي بيدور عليك، ما تدورش، ما تدورش يا صاحبي!
اشتغل على نفسك.



11#

لما غنيت «ما تخافيش» لبنت البواب من البلكونة

كان يوم صيف جميل في بيتنا القديم في منشية البكري،
يوم من أيام أواخر أغسطس اللي هي بتبقى شمس بس فيها
نسمة هوا، والجو وقتها ما كانش بقى بهذه القذارة اللي وصلها
دلوقت، ما كانش لسه فيه هذا الكم من التلوث وعادم السيارات
وكومبريسورات التكييفات والتراب المجموع جنب الرصيف
بدون أي مبرر، كان لسه الجو فيه شوية صفاء ونضافة، ما تحسش
بالفرق بين وقتها ودلوقت غير لو كنت عايش في الثمانينيات
والتسعينيات، والهضبة كان منزل شريط جديد: «ما تخافيش».
ما كانش لسه عمرو دياب اكتسب لقب «الهضبة» وقتها طبعًا،
بس كان راكب الساحة وفي طريقه ليه.

أصل مين كان قدامه؟ هشام عباس؟ ما كانش منافس أوي،

ولا يبحاول ينافس حتى، عشان كده كان محبوب وما زال، كان مبسوط إنه بيغني بس، ومش مصدق أصلاً إنه بيغني، وهو ابن ناس ومش بيعمل كده عشان الفلوس أو الشهرة، والدنيا كانت تمام.

محمد فؤاد كان برضه مش منافس، لأنه صوت مختلف، وواحد سكة ابن البلد من بدري، وبرضه مش يبحاول ينافس، بيعمل شغله وراضي بنصيبه، وعشان كده برضه كنا بنحبه. حميد الشاعرى كان لون لوحده مش لهدف إنه يكسر الدنيا. حميد الشاعرى وقتها كنت تحسه منظمة غير هادفة للربح، لو هبت عليه وحب ينزل ألبوم هينزل، مش جاية خلاص مش جاية. عمرو كان الوحيد اللي فعلاً بيبدل قصارى جهده عشان ينجح، وصوته، غير إنه مميز فشخ، كان فيه حته وجع كده من غير ما يتكلم عنها، كان فيه نبرة ألم كده تحمل صورة شيرين رضا، وآخرين غالباً.

حتة كانت ملمسة مع كل الشباب وما زالت، اللي هو أنا تعبان بس مش هاقول بس إنتو عارفين، إحساسه كان وما زال عالي جداً، ووقتها كان بيسمعه الأهالي والأطفال والشباب والكل. فيه سفريات كاملة لإسكندرية ما كناش بنسمع فيها حاجة طول الطريق غير عمرو دياب، رايح جاي، نفس الشريط، لمدة ساعتين ثلاثة متواصلة.

الشريط ده كان بيمثلي في المرحلة دي كل حاجة في الحياة

حرفياً. أنا طفل، مش باخرج، ولا باسافر، ولا بانزل آخذ درينكين،
ولا باعدّي على صحابي، ولا بيعدّوا عليّ، ولا جايلي نسوان
البيت، ولا باروح لنسوان البيت، ولا فيه نسوان، ولا فيه بيت
من أساسه، والعملية في أقصى درجات نشفانها المنطقي لطفل
عنده ٦ أو ٧ سنين. بس كنت حسّاس، وما زلت يعني على بعض
المستويات، على الرغم من إني بقى فيّ دلوقتٍ نسبة حلوف
لا يُستهان بها، نسبة مكتسبة من السن، واللي عملته في نفسي
والآخرين واللي اتعمل فيّ من الآخرين، بس فيّ جزء حسّاس
وعلق ورومانسي وشفّاف كده مش باعرف أتخلص منه، بقيت
يمكن باعرف ألجمه كويس وأدفنه جوه في غياهب الذات.

الجزء ده بقى يا معلم وهو عنده ٦ أو ٧ سنين سمع أغنية
«ما تخافيش» من هنا، وحصله هزة في كيانه، حصله شحن
عاطفي غريب! جرب اسمعها كده وهتفهم قصدي.

الفكرة إن عمرو دياب مشكلته إنه بيغني اللي هوّ حاسه بس،
والإحساس ده بيلبس في وشك لو إنت في نفس الموقف.
و«ما تخافيش» دي كانت فعلاً واحد بيحب واحدة بجد،
وعامل أغنية بس عشان يطمئنها إنه مهما حصل هيفضل يحبها،
كان طاير بمشاعره ليها، ولحد دلوقتٍ بيصعب عليّ عشان
الأغنية دي، والنزلة اللي نزلها من التحليقة اللي كان محلقتها
في السما دي.

لو إنت طفل بدون أي موقف زي كده في الوقت ده، كنت

هتبقى بتتمنى إنك تعيش الموقف ده من كُتر الإحساس ما هو
واصلك، وفي اللحظة دي، بعد ما كنت سمعت «ما تخافيش»،
كنت حاسس بحالة شديدة من الهياج العاطفي، طفل حاسس
بالحب في أغنية وعازب يحسه هو كمان.

شيطان خلاص.

تجولت في الشقة وأنا عمّال أغني الأغنية، أدخل أوضة ألاقها
فاضية، أوصل للمطبخ ألاقي أمي جوه بتقولي أناولها حاجات،
أروح متجاهلها وخارج من المطبخ وأنا لسه باغني، وأفضل ألف
في الشقة، لحد ما اكتشفت إن مفيش حاجة هنا أغنيها.

رُحت في اللحظة دي طالع على البلكونة، المهرب الوحيد
والملجأ الوحيد لطفل زبي، وجوده في الشارع مقترن بأبوه وأمه،
وحياته الاجتماعية شبه منعدمة. وطلعت أغني فيها بصوت عالي،
وأنا حاسس كل كلمة، باغني في المطلق، باحب سور البلكونة،
الهوا، العمارات اللي قدامي.

مشحون حب، أسند على السور، وأسرح في الشارع والسما
والمواطنين، بادور فيهم على وش عازب أديله كل الحب اللي
عندي ده، حد يبصلي بصة، بصة واحدة كانت كافية إنني أوهب
لهذا الشخص (أيًا كان) مشاعري الطفولية المشحونة عاطفياً...
وما لقيتش.

مشاعري كانت أقوى من إنني أقف، وفضلت أغني مع الأغنية،
وأبص لكاميرا وهمية، وأنا فارد دراعاتي على السور كأني باصور

فيديو كليب! قمة في البؤس والعتة، أعتقد كان هوَّ ده التشرد
الأطفالي تقريبًا!

في الححة اللي بعد «مع حب تاني تاني» كنت باسكت، وأسيب
المزيكا تكمل دندنة في دماغني، عشان ما أبو ظش الأغنية، وأكمل
لف على سور البلكونة...

وأنا بالف، لقيت مين تحت البلكونة؟

قول كده مين؟

أقولك أنا مين...

بنت البواب، دعاء بنت عم عثمان، بشعرها الأكرت اللي واخذ
شكل الضفيرة الواحدة زي أي بنت في هذا الوقت والسن، بغض
النظر عن المستوى الاجتماعي، دعاء بعينها السودا الواسعة،
وفستانها البينك، بينك فلاحى عليه ورد صغير وكشكشة من عند
الوسط، دعاء اللي كنت باشوفها كل يوم وأنا راجع من المدرسة وهيَّ
راجعة من المدرسة برضه، بس عمري ما حسيت بحاجة ناحيتها.
كانت هيَّ اللي قدامي، وجات في الوقت الغلط! كانت معاها
لعبة وخارجة تلعب بيها في الشارع بكل براءة، غير مستوعبة إن
فيه ذئب بشري عاطفي في البلكونة بيبحث عن فريسة، حاجة
كده ميكس حمدي الوزير على محمد محيي.

في اللحظة دي، كانت الدندنة اللي في دماغني بتاعة الححة
الموسيقية خلصت، وجات الححة اللي المفروض أكمل فيها غنا
تاني عشان ما أبو ظش الأغنية بقى. رُحت بأعلى صوتي فاتح فيها:

ما تخافيش أنا مش ناسيك

ما تخافيش لو مين ناداني

كمّلت وأنا عمّال أتحرك على السور كأنني عصفورة محبوسة
في قفص، كأنني عادل إمام في فيلم «حب في الزنزانة»، وجسمي
بيتهز من قوة الحب، ومش مصدق إني لقيت حد أغنيله، وأخلص
السور وأوصل لآخره، أروح لا مؤاخذه واخده تاني من أوله!
البنّت طبعا اتخضت فشخ، وراسها رجعت لورا مرّة واحدة،
وعينيها وسعت من الخضة، وهيّ مش فاهمة المختل ده بيعمل
كده ليه!

حُط نفسك مكانها، إنت بتلعب في الشارع بكل براءة وفي
كل سلام، ولقيت واحد عمّال يغني «ما تخافيش»، ويتلوى في
البلكونة وهوّ بيمسك في السور، بحركات درامية كأنه بطنه
بتتقطع.

مخضوضة فشخ طبعا، وأنا بالنسبة ليّ كنت عايش لحظة
من لحظات «أنا عندي مشاعر كتيرة فشخ، وما صدقت لقيتك،
هاغنيلك، هاغنيلك كل حاجة»، اللي هوّ تقريبا ملخص علاقتي
العاطفية لحد النهارده.

فضلت أغني وأنا باصصلها من فوق، ومن الكادر عندي
شايفها مخضوضة، ومكمّل عادي جدّا. وفجأة لقيت مرات
عم عثمان، أم دعاء، دخلت في نفس الكادر، وهيّ بترفع راسها
لفوق عشان تفهم إيه الهبل اللي بيحصل ده، صوتي وطي سنّة

والحماسة ابتدَّت تقل، بس كملت، قلت مبدهاش بقى، هاجبها هي وأمها، عندي ما يكفي من المشاعر، مصلحة!

في الكوبليه الثاني عم عثمان نفسه دخل الكادر، وإخوات دعاء، وفرج السائس، وعم إبراهيم بتاع الخضار، وصوتي عمال يوطى شيئاً فشيئاً لما حسيت إن فيه جمهور أكبر، وفيه ناس قطعوا علينا لحظتنا الرومانسية، بس رغم التحديات كملت الأغنية، عشان أنا كده، حبي محدش يقدر يوقفه!

هم بقى مش مستوعبين اللي بيحصل، أم دعاء قربت دعاء منها وحضنتها من كتفها كده، وكأنها بتحاول تحميها من المريض اللي في الدور الأول.

خلصت «مع حب تاني تاني» الأخرانية، وعم عثمان في اللقطة دي كان ابتدى الفار يلعب في عبه، يا إما فيه حاجة بيني وبين دعاء، حتى وإحنا عندنا ٦ أو ٧ سنين (هو راجل صعيدي أصيل، وبالنسبة له المدينة ممكن يحصل فيها أي حاجة)، يا إما طبعاً، وده الاحتمال الأكبر، إني فاضلي كوبليهين كمان وأنزل أغتصب البنت!

خلصت الأغنية من هنا وحاولت أجمع اللي بيحصل، وأنا شايف شارع كامل واقف تحت البلكونة ببصلي باستغراب، وعم عثمان فيه نظرة توعُد في عينيه، وأم دعاء ودعاء في عينيهم نظرة فزع، وإخوات دعاء الأربعة ما بين مش فاهمين أو عايزين ياكلوني بسنانهم. في اللحظة دي كانت الحماسة راحت، والحب اتحرق بجاز، والمشاعر اتبخرت أسرع من الفلوس الحرام!

دعاء المسكينة كانت خارجة الشارع تلعب، بمنتهى البراءة،
هيّ بس حظها الأسود خلالها تحت بلكونتي في لحظة استفراغ
عاطفي، وقذفت مشاعري الملتهبة عليها هيّ وأهلها والشارع
كله!

لما استوعبت كل حاجة، خدت في وشي، وطلعت جري
على المكان اللي باستخبي فيه لما باكون عامل مصيبة، أو لما
بتيجي أغنية برنامج «كاريكاتير» على التلفزيون (أيوه كانت
بتخوفني فشخ).

استخبيت تحت السرير، مخبئي المفضل. بعدها بخمس
دقايق مثلاً، الباب خبّط تخبيطة مباحث كده خلّت أمي تجري
وهيّ لسه بتلبس الطرحة من الفزع، وسمعت صوت عم عثمان
وهو بيزعق، وأمي بتزعق، ومش عارف إيه اللي حصل بالظبط،
ولا حتى إيه اللي اتقال، كل اللي فاكره إن لما بابا جه يوميهها،
اتشدت من تحت السرير بطريقة أفلام الرعب، وخذت علة
بنت تبت!

الخلاصة يعني...

كنت حمار لما قرّرت إني أبين مشاعري، مش بس فيما يتعلّق
بهذه القصة، بل على مستوى حياتي كلها!
ما تكبتش مشاعرك أبداً، بس حاول إنك برضه ما تطلعهاش
لأي حد معدّي في الشارع!

13#

لما افكرت إن البنت حياتها سهلة، والمُزة على الأخص

كان بقالي أسبوع ما نزلتش من البيت، وكارت الكهربي باخلص،
وعشان ميتين أم العداد الجديد أبو شحن ده هينزلك من بيتك في
إنصاص الليالي عشان تشحنه لو قطع عليك، وعشان ممكن أبقى
نايم في التكييف ولأ فيه حد عندي، وهيبقى موقف زي الزفت،
وممكن يضرب الليلة كلها، جاتلي الفكرة العبقرية، وهيّ إنني بعد
ما أشحن العداد، آخذ الكارت وأشحنه تاني عشان يفضل عندي
مشحون في البيت في درج البوفيه، وأول ما الشحن يخلص أروح
لا مؤاخذة مطلعته وحاطه في العداد، وما أضطرش أنزل أجري
بالفوطه زي أحمد زكي في فيلم «ولاد الإيه».

وعشان كان بقالي أسبوع ما نزلتش من البيت، وده عادي جدًا
في حياتي، قرّرت إنني أحسس نفسي إنني خارج، حتى لو نازل

أدور على مكنة فوري حقيرة، بس ليه لأ، هالبس وأحط بيرفيوم
ولا كآني أحمد مظهر في «رُد قلبي» نازل يشحن.

ماشي بالليل في الشارع، وباحاول أوهم نفسي إني عندي
موعد غرامي وهاقابل الحبيبة، سمعت صوت عربية مسرعة جاية
ناحيتي، مشغلين مزيكا بصوت عالي، حاجة لـ «كي تي بيرى»، أو
أي مطربة أمريكية مراهقة بتعبي شرايط مليانة أغاني عن إزاي
نرفع إيدينا لفوق ونستمع بتجربة الـ «club» اللي هتغير حياتنا
تمامًا. بصيت برد فعل تلقائي، لقيت العربية كلها بنات، وأول
ما العربية قربت مني ابتدوا يهدوا شوية. كان شكلهم مبسوط
شوية، وأنا أعز الانبساط بصراحة. فضلوا يقربوا للدرجة إني
شكيت إننا نعرف بعض، وأول ما قربوا طلعت واحدة منهم من
شباك العربية اللي قدام بنص جسمها وهي ساندة على الشباك
بدراعاتها، وقالتلي بصوت عالي:

- ما تيجي يا مكنة!

وراحوا ضاحكين كلهم، ومشىوا بنفس السرعة اللي قربوا
بيها.

وقفت متسمر في مكاني شوية، وعلى وشي ابتسامه زهو
مرتبك.

حسيت بمشاعر مختلطة الحقيقة: كنت مبسوط ومتضايق
في نفس الوقت!

مبسوط طبعًا إن فيه واحدة شايفاني «مكنة» وبتقولي آجي،

وفعلياً تحت الظروف الصحيحة كان ممكن أروح! أنا كلب جداً
لو حاسس بالوحدة وناقصني حنان! وكانت مجاملة عشوائية،
بس في الوقت المناسب، وأنا أحب أقضي وقت أكثر مع حد
شايفني «مكنة» بكل صراحة.

في نفس الوقت اتضايقت، اتضايقت طبعاً عشان مشيوا!
عربية فيها أربع بنات دي حلم لأي شاب، أوتوماتيكياً بتروح
في خيال الفانتاسي بتاع إنك قاعد ورا في النص وكلهم عايزين
يلمسوك ويحسسوا عليك، وأي حاجة بتقولها بتضحكهم،
وواحدة فيهم تقول تعالوا نطلع عندي على الفيلا ونقلع وننزل
البسين ملط كلنا! أيوه دي الفانتاسي بتاعتي! مش إنت اشتريت
الكتاب؟ خد يا سيدي بفلوسك معلومات شخصية عني إنت
مش محتاج تعرفها.

برضه اتضايقت عشان حسيت في اللحظة دي بتساؤل: هوّ ده
اللي أنا أستاهله؟ هوّ أنا آخري يتقالي «يا مكنة» من شباك عربية؟
حسيت إني رخيص شوية!!

انزلي على فكرة واتعرفي عليّ، أنا لذيذ جداً وأتحب، حلو
فشخ طبعاً إنك شايفاني «مكنة»، بس حاولي تشوفي أبعد من
«المكنة»، فيه حاجات تانية فيّ حلوة، «مكنة» دي أقل حاجة
عندي!

وبعدين قعدت أفكر في اللي بافكر فيه ده، واتضايقت أكثر
إن تفكيري بقى منسون فشخ وهرموني النزعة!

إيه المشكلة لما عربية مليانة بنات تطلع واحدة منهم تقولي
«يا مكنة»؟ بالعكس، ده مدعاة للفخر، دي حاجة أحكيها
لأحفادي وأنا طقم السنان يكاد يخرج من بُقي، والسين بقت
شين وكده، أقعدهم قدامي على الأرض وأحكي للمقرب منهم
ليّ، وأقوله جدك ده لما كان بيمشي في الشارع، النسوان كانت
بتطلع من شبابيك العربيات وتقوله «يا مكنة»!

وبعدين رجعت اتضايقت رابع إني كجد هتبقى حكاياتي
لحفيدي إني «مكنة»، يعني بدل ما أحكيه عن الحروب اللي
شاركت فيها، أو الأعمال الفنية اللي كنت جزء منها، أو حتى
إنجازاتي في شركة بترول وإزاي ارتقيت بمستوى الإنتاجية
فيها، لأ، دافيه طفل صغير هيبقى قاعد قدامي، وأنا جده العجوز
باقوله إني «مكنة»!

موقف عبثي جدًّا! وأكيد هيسيب علامة في الطفل البريء ده!
وبعدين فكرت في ياسمين صبري، كالعادة يعني، أنا بافكر
فيها طول الوقت، هيّ بتيجي ما بين كل فكرة وفكرة فعليًا، باحبها،
باحبها في الأساس عشان شبه واحدة باحبها، وباحبها عشان هيّ
حلوة فعليًا، ولقيت بقى إن هيّ فعليًا أغلب الناس حابها عشان
شكلها، زي ما أنا باحبها كده. وكمّلت تفكير، ولقيت إن هيّ
أكيد فيها حاجات تانية حلوة، أكيد يعني، إحنا باصين لشكلها
بس ومش قادرين نشوف بعده، زي ما البنات شافوا فيّ الجزء
«المكنة» بس.

وفكرت في جملة، بنات كثيرة في حياتي قالو هالي: «هشام، إنت ما تعرفينش يا هشام»، وعمري ما كنت بافهمها في وقتها، وكنت فاكرهم بيدعوا العمق مش أكثر، وياقولها استهدي بالله كده وما تفصلينيش، بس فعلياً هم كانوا صح، أنا فعلاً كنت ما أعرفهمش، وكنت مجرد شايف حاجة شكلها حلو وشيطان فيها، بس مش أكثر، وأقعد أكلهم عن أد إيه باحبهم، وهم يستغربوا: بيحبنا إزاي ده؟

وبعد كده رجعت اتضايقت خامس عشان لقيت نفسي بافكر في إحساس البنت الحلوة في مصر، تيت! أنا مالي أنا؟ أنا مال أهلي أنا؟ مش شغلتي خالص، مش حدوتتي خالص، أروح أركز في برنامجي، ولأ أكتب فيلم، ولأ أشوف أي خرا أتلهي فيه! هنا أدركت إن خط التفكير ده مش هيو ديني في حنة حلوة، وهافضل اتضايق كده، فقررت أروح أعمل أي حاجة مختلفة. قلت أروح أكل كشري، بس للأسف لقيت محل الكشري المفضل بتاعي، «طشة جريئة»، قفل.

هنا كانت الصدمة بقى، ووقفت في مكاني، ونزلت على رُكبي باصص للسما، وأدركت في اللحظة دي فعلاً إن كلنا تعبانين، سواء أنا، أو أي حد بيحب الكشري، أو ياسمين صبري، أو الستات العادية حتى... مفيش حد مرتاح!!

الأخطر من كل ده، والأكيد، إن كل واحد فينا جواه حاجات كثيرة حلوة ما بيشفهاش غير اللي بيقرّب، أو اللي بيحس.

تعالوا نفهم بعض شوية، ونريح بعض.

رجاء خاص للرجالة: لو شايف واحدة حلوة، ما تطلع لهاش من شباك العربية وتقولها «يا مكنة»! هي مش شغالة في «أشرف فرغلي»، مفيش حاجة هتتبنى على حد طلع من شباك عربية، وإلا كان زماني قاعد في عربية مليانة نسوان دلوقت! انزل من العربية خالص، وقولها «مساء الخير، حضرتك جميلة جدًا»، وامشي، دي أشيك كثير، وهتخليها مبسوطة، وإن انت مبسوط، ومفيش حد بيحكى لحفيده كلام ما ينفعش يتقال لطفل! كلنا هنكسب.

رجاء خاص للبنات: أنا بامشي في نفس الشارع ده كل يوم على تسعة عشرة كده، وبابقي لابس تيشيرت أبيض.

المهم إنني كنت حمار في حاجات كثيرة، كنت حمار لما كنت بافتكر إن البنت الحلوة حياتها سهلة، أو إن شخصيتها وحشة لو حداها كده، والحقيقة إن ده بسبب المجتمع، اللي كلامي ده مش هيغير فيه حاجة! ما هو أنا لو كل يوم فيه عربية بتعدّي تقولي «يا مكنة»، في الآخرها صدق إنني «مكنة»، وهاخد كل اللي ممكن آخده كـ«مكنة»، وهاعامل مع المجتمع ده كـ«مكنة»!

15#

مع جوماننا، وغيرها

من فترة كده فتحت البلكونة أبص على حاجة وما قفلتش
السلك، ولما دخلت تاني اكتشفت إن فيه دبانتين دخلوا البيت.
طبعا مش محتاج أشرح كرهى للدبان، والفصلان لما بيصحيك
من النوم برجليه المنمنمة المزعجة فشخ دي، غير طبعا الفقرة
المؤلمة بتاعته: اسكتشاف كل الخروم اللي في وشك اللي
بتحسسك بالانتهاك الشديد. فاستحملت يوم يومين وفي التالت
بدون أي مقدمات قمت جريت وراهم بالشبشب في كل أركان
الشقة، وأنا كلي عزم وتصميم إنني هاسحق ديك أبوهم، وشكلي
بالنسبة لجيراني اللي ساكنين قدامي وكاشفين بيتي كان غالباً
إنني باصمم روتين رقص إيقاعي مبتكر. وبعد مناورات عديدة
تفوقت على «النجم الساطع» و«بدر» في مهارتها، نجحت فعلياً
في سحقهما، وشعرت بالفخر والانتصار، ونمت لأول مرة

حد بيها، وفي نفس الوقت متفهمها. أنا الكائن الوحيد اللي في حياتها، واللي وعيت عليه من ساعة ما جت الدنيا. بس المشكلة الأكبر كانت في إن البيت بقى مكان قذر أوي، من خلال رعايتي لجوماننا، وآه أنا سميتها «جومانا»، كنت خلاص تجاهلت مستوى نضافة البيت عشان أوفر لها بيئة وسخة تقدر تنبسط وترعرع فيها. اللي زود الطين بلة إن فيه أصدقاء كلموني قالولي إنهم جاينلي البيت، في اللحظة دي وقفت مع نفسي وقفة كده، وقعدت أراجع حياتي، أنا في موقف لا أحسد عليه هنا، أصدقائي اللي عايز أشوفهم، وعلاقتي بجوماننا، وللأسف الاتنين ما ينفعش يجتمعوا، البشر مش هيقدرُوا يتفهموا علاقتنا. «Let's face it» مفيش إنسان هيدخل معايا في مناقشة عميقة أو تافهة حتى، وأنا فيه دبانة واقفة على وشي، إلا لو كنا في مجاعة في رواندا.

قعدت رايح جاي في حسابات، أنا كمان واحشني إن البيت يبقى نضيف، أنا ما ينفعش أكون في علاقة مع دبانة، ولا هي من توبي ولا أنا من توبها. ولقيت نفسي بدون تفكير، وعيني مش بتتشال من على جوماننا، إيدي رايحة على الشبشب ببطء، وجوماننا عمالة بتضحك وتلف حوالِيّ ومش مدية خوانة، واستنيتها لما جت على التراييزة اللي قدامي، وغمضت عينيّ و... (صوت شبشب يهوي على التراييزة).

بعدها بساعتين كنت قاعد مع أصدقائي بنهزر، وهمم بيشكروا في البيت ونضافته، أنا فيه دمعة نازلة من عين واحد زي محمد

رمضان في الأسطورة، باشكرهم على مجاملتهم الرقيقة، ومن
جوايا عارف إني خلاص، إنسان محطم، اتغير للأبد، عارف إني
فقدت أحد أنبل وأقدر العلاقات اللي في حياتي!
كنت حمار آه، بس كان لازم أبقى حمار مع جوماننا وغيرها،
كان لازم أتخلص من أي حد ببيوظ حياتي وييتسبب في قذارتها!
بالشيشب!

17#

لما كنت «أونكل كمال خطيب ماما»

أغلبنا دخل في علاقات، وأغلبنا فرکش، وأغلب أغلبنا دول
حسوا بالألم بتاع الفراق والبُعد والانفصال عن حد كانوا بيحبوه
أوي، والآهات الحزينة والأغاني الحزينة وحتى التبول الحزين،
اللي هوّ لما تدخل الحمام وتتنهد تنهيدة حارة كده وإنّت ساند
على الحيطه.

بتبقى في مرحلة حزينة بصفة عامة، ولو سُفت أي حاجة
بتفكرك بالشخص الثاني حتى لو كيس كاتشب بتتأثر، يمكن
عشان كنت باني في دماغك صورة خيالية لمستقبلكو مع بعض،
فبتحس بالألم رخم كده، شبه ألم خبطة صباع رِجلك في طرف
السريّر بس اضرب في مليار، وجوه صدرك، اللي هوّ هادهنه
«هيموكلار» إزاي ده؟ إديني ألم خارجي أعرف أتعامل معاه
لو سمحت.

لك أن تتخيل بقى ألم الانفصال ده لما يبجي بعد جواز،
ومحاولة تحقيق الصورة الخيالية دي، بيكون عامل إزاي برضه،
بيبقى أضعاف مضاعفة.

مش معناه إنه حاجة مش كويسة، بالعكس، كل الألم مفيد،
بس في وقتها مش بتشوف.

تعالوا كده نفهم حاجة مهمة: ألم الانفصال اللي بيكون على
الاتنين، الراجل والست...

الست ممكن في بعض الحالات بتتكسر أكثر، بس مش
بالضرورة يعني، وبتتكوّن عندها حته مرارة معينة كده، خصوصًا
اللي معاها أطفال بتربيهم وشايلة مسؤوليتهم لوحدها، وفي
الأغلب، لو دخلت معاها في علاقة، بدون ما تقصد، هتدوقهالك،
وتاني، بدون قصد.

هاشرحلكوا...

كنت دايمًا باختار الست المُطلَّقة في علاقاتي، لأ ومعاها
أطفال كمان، عايز الباكيديج كلها. يمكن عايز بيت جاهز عشان
أهربله؟ الله أعلم. بس كنت باحب أحس إنني داخل أكمل عيلة
وأعوضهم، وأبقى أحمد زكي في نفسي، وأعيش دور «أونكل
كمال خطيب ماما»، الدور اللي فهمت لاحقًا سبب اختيار العظيم
أحمد زكي ليه.

غير كده، كان دايمًا جزء من اختياري بيحاول يتبع سُنَّة
الرسول صلى الله عليه وسلم في الزواج من الأرملة والمُطلَّقة،

فعلاً بجد والله كنت باحاول، كنت حاسسها إحدى السنن الكويسة إنك تحسس شخص المجتمع كله بيعامله على إنه فيه حاجة غلط، إنه مفيهوش أي حاجة غلط، عشان فعلاً هو مفيهوش حاجة غلط، هو زي القمر، نصيبه كده مش أكثر.

جزء تاني كان بيعسس إن النوع ده من الست كَوْن خبرة معينة عن الرجال والجواز، وهتبقى أحسن شخص للجواز، عشان جرب عيوب الجواز، وجرب ألم الانفصال.

إضافة إلى إني مش شخص عبقرى اجتماعياً، ومجنون شوية، وغير مهتم بكل فروض الطاعة والولاء الاجتماعية، ما بتفرقش الحاجات دي معايا خالص وباعمل اللي أنا عايزه، وكان عندي مشاكل زي أي حد، لسه ما كنتش حليتها مع نفسي، أعتقد إنك فهمت جزء منها في الكتاب ده، فكنت شايف إنها حسبة متكافئة، مؤمن إن الست المُطلقة هتكون أنسب اختيار...

تستحملني، وأقف جنبها.

تشيلني، وأشيلها.

سندي، وسندها.

هي فاهمة بيت، وأنا فاهم دنيا، وتمشي.

بس كل مرة كنت «أونكل كمال خطيب ماما»، سواء جواز أو حتى علاقة جادة، عمرها ما حصلت، عشان الحسبة ما بتبقاش كده على أرض الواقع.

أنا إنسان بيعحب الحب جدًّا، باحبه فشخ يعني، باستمتع بيه

لأبعد الحدود، وكنت ممكن أتخلّى عن أي حاجة في مقابل الحب، وكان عندي شوية نقص في الحب في البيت اللي اتربيت فيه، فكنت باحتاج حب أكثر من العادي كمان، كنت باحتاج دفعات خارجية، أمبولات حب في صورة علاقات وصدقات، أو حب غزير وكثيف من الشخص اللي باحبه، ومهما كنت باشوف صعوبات ومآسي في حياتي، كان الحب هوّ الحاجة الوحيدة اللي ممكن تخرجني منها.

مش حاجة وحشة خالص، بالعكس، ده شيء كيوث جدّا، دا أنا دبذوب والمصحف.

بس مش أي ست في الدنيا تقدر تفهم وتلبي ده، وخصوصًا لو مُطلّقة، وخصوصًا لو بتشتغل وبتصرف على نفسها، وخصوصًا بقى لو معاها أطفال، دي كده طاقتها مشفوفة وعايزة اللي يدلّعها، وخصوصًا كمان بقى لو اتأذت نفسيًا في جوازها السابق، ومحتاجة مساحة أكبر عشان تحاول تشتغل على نفسها، وترجع نسخة أكثر سلامًا داخليًا من نفسها، وصالحة للعلاقة الحالية. محتاجة تسترد روحها اللي تآكل جزء منها، محتاجة تشتغل على حاجة مهمة أوي اسمها الـ «self-image» (صورتك قدام نفسك)، اللي دايمًا بعد تجربة مؤلمة تسببت في إنك تلوم نفسك، بتكون أصابها بعض التشوه، حتى لو هيّ أعظم وأحلى شخص في الكون، وبتكون هذه الصورة محتاجة الكثير من الشفاء النفسي والتصالح.

إنت ما بتفهمش ده في ساعتها، بتاخذ أي نقص في كم الحب اللي محتاجه ده على إنه شعور بالرفض، على إنه قلة حب. وإنت طبعًا بتحب، وبتحب أوي، ومستني وعايز وجعان حب، وعندك توقعات كبيرة، كلها مش بتحصل. وده أكبر خطر في الجواز، ده جوهر الأذى النفسي اللي بيحصل: إنك تبقى محتاج حاجة ومش بتاخذها، ومش عارف ليه مش بتاخذها، وبالتالي بتبدأ ترمي السبب على نفسك، وكل تقصير بيقتصره الشخص اللي قدامك، يسحب من رصيد ثقتك إنت في نفسك، وحبك لنفسك. ويقوم كل ده راجع للشخص نفسه تاني في صورة عصبية، خلق ضيق، عدم اهتمام، خناقات على أتفه الأسباب. وخلاص بتبقى باظت، والموضوع دخل في دايرة مفرغة مش هتتحل غير برحلة علاج للطرفين، أو - وده اللي بيحصل - الانفصال.

مش بتشوف ده كله في ساعتها، ولا بتفهمه في وقته، يمكن حاسس بس مش فاهمه، وبتحس بالأذى بس، وممكن تشوف نفسك ضحية، وممكن فعلاً تكون ضحية في حالات كثيرة، بس مش دايمًا يعني.

مش إحساس حلو خالص!

الطلاق في مصر مش شيء سهل خالص لأسباب كثيرة أوي، خصوصًا كم الترتيبات اللي بتسبق الجواز، علشان كل حاجة بتحصل قبل الجواز بتحسك إن دي خلاص يا معلم جواز العمر، مش مجرد تجربة، زي ما هي بتبقى كده في الأغلب. مفيش

أي حاجة قبل الطلاق بتأهلك نهائياً إن فيه احتمال الموضوع ده
ما يكملش، كم المجهود والطاقة المبذولين في الجواز وما قبله
شيء غير عقلاني بالمرّة.

ترقب الآخرين لكل لحظة كبيرة في موضوع الجواز، ما بين
قراية فاتحة ولّا خطوبة ولّا دخلة، ولّا حتى زفة بلدي من اللي
العريس بيخرج فيها حاملاً المنديل وفخور أوي بمسرح الجريمة
اللي في إيده، أو حتى حمل واحتمالية مجيء طفل باسمكو
للدنيا، يدل على شيء واحد بس، فيه ناس كثير أوي جزء من
حاجة المفروض تكون ما بين اتنين.

فيه «stakeholders» كثير أوي لحاجة «personal» أوي،
وبيتحولوا لعبء نفسي، زائد العبء الطبيعي بتاع الموضوع اللي
هو أوفر أصلاً، والعبء النفسي في موضوع الطلاق بالنسبة لي
بينقسم لكذا جزء...

جزء ظاهري قدام الناس، ناتج جزئياً عن شعور بالفشل أمام
الآخرين، اللي هو أيوه أنا كنت جزء من كيان ورجعت تاني
لوحدي، الشخص اللي رقص قدامكو كلكو عشان هيروح معايا
البيت وينام في حضني كل يوم ده ما بقيتش عايزه تاني خلاص،
أو ما بقاش عايز يبقى معايا تاني خلاص، وهاتوا فلوس البوفيه
اللي لهفتوه في بطنكو يا ولاد التيت يا مفاجيع!

جزء تاني داخلي، وهو الأهم واللي بيفرق فعلاً، جزء الشراكة
نفسه وكل الأفعال المشتركة اللي تمت بسعادة بالغة: العفش

اللي نقيناه مع بعض وإحنا بنضحك وماسكين إيدين بعض ده،
والنور اللي قعدنا نتناقش في أنهي فيهم هيركب فين، والسعادة
البالغة اللي على وشي وأنا سوري في الكلمة يعني باركبه،
والأدوات المنزلية والإلكترونية، والراجل اللذيذ اللي باعلنا
الكنبة، والست اللي كانت عينيها مني اللي باعلنا التلفزيون،
والأندرويد واللينجيري والحاجات الحلوة دي، وألوان
الملايات، وشكل المعالق، وأماكن المسامير، وترتيب قنوات
التلفزيون، وكل التفاصيل اللي تم اختيارها اختيار مشترك دي
كلها، واللي كانت بتتحول تلقائيًا في وقتها إلى ذكريات، واللي
مش سهل على أي بني آدم في الدنيا إنه يقدر يكرر عملية اختيارها
مرة ثانية، خصوصًا قنوات التلفزيون والفيفورييتس، ده فرهدة
لو حده الحوار ده، ومش هاغير قنوات تاني ورحمة أبويا، اللي
عايز يتنيل يظبط قنوات، الريموت عنده!

في حقيقة الأمر، الحاجات دي فعلاً لازم تتعمل مرة واحدة،
مع حد تكون عارف ومتأكد إنكو هتكونوا مع بعض لفترة طويلة.
وده مش سهل!

الأهل اللي بيفرحوا أوي دول، غصب عنك فيه صوت واطي
وسخيف بيقعد يزن في دماغك ويقولك هتجيبهم تفرحهم أوي
تاني كده إزاي؟ أكيد مش هتبقى زي أول مرة.

في حقيقة الأمر برضه، هتعرف عادي جدًا.
خذ كلام واحد عاش تجربة الطلاق كاملة، ومر عليها سنين،

وأقدر أقولك بكل ثقة إنه كان أحسن حاجة حصلت في حياتي،
وأقسم برب العزة.

إزاي؟

لما كبرت وعقلت وبلغت عاطفيًا، فهمت اللي حصل.
أنا ما كنتش مؤهل إني آخذ قرار الجواز ده، ولو كنت مؤهل
اختياري ما كانش صح (مش بسبب أي حاجة فيها)، عشان بكل
بساطة ما كنتش فاهم نفسي، ولا فاهم الجواز نفسه.

ما كنتش فاهم أنا مين، ولا احتياجاتي إيه، ولا تجربتي في
الحياة عاملة إزاي وأثرت عليّ إزاي، ولا طفولتي وبيتي أثروا
عليّ إزاي وخلّوني محتاج إيه وطباعي إيه، ولا كنت فاهم يعني
إيه حتى ست وبيت.

كنت صغير، بس أحيّر.

كنت باحب، بجد، أوي.

متصالح مع كل ده دلوقت، وحابب نفسي، وباضحك على
نفسي والحمقة اللي كنت باتحمقها أوي وحرقة الأعصاب
والخناق والهبل ده كله... فهمت.

فهمت إنك عشان تتجوز شخص لازم تكون عشت معاه
الأول، وانبسطت بالعيشة معاه، وحببت كل تفصيلة فيه، وكل
فعل بيعمله، حتى لو غلط.

فهمت إن أي غلطة في الجواز هيّ مسؤولية مشتركة، ويتحمل
الجزء الأكبر دائمًا الشخص الأكثر وعيًا وإدراكًا، مش الغلطان.

فهمت إننا في مصر كلنا بتتجوز صغيرين سنًا وفكرًا، وبنشيل مسؤوليات كبيرة إحنا مش أدها، ولا المفروض نكون أدها. إذا كان الأجانب نفسهم اللي ممكن حياتهم أسهل في جوانب كثيرة، مش أدها، وبيتجوزوا بعد سنين من العيشة مع بعض والوصول لتفاهم حياتي كبير، هنيجي إحنا نفتح صدرنا؟ إحنا لسه بنبني نفسنا كبني آدمين وكبلد!

وانت بتتجوز كل الناس حواليك بتتعامل على أساس وهمي إنك إنت والشخصية اللي بتتجوزها خلاص هتبقوا مع بعض للأبد، وصدّقني، ده في مصر على الأخص، بيضيف لألم الطلاق، عشان إنت كمان بتصدق إنه للأبد، مع إن احتمال الخطأ في الاختيار في العلاقات والجواز هو الاحتمال الأقرب للصواب في أغلب الوقت، وكل مظاهر الاحتفاء المجتمعي بالاختيار والروح الجمعية للموضوع ده بتنفي عنه - نفسيًا - للطرفين الأساسيين - بجهالة شديدة - شبهة الخطأ، وبيترسخ نفسيًا جواك إنه اختيار صحيح كواقع.

لو إنت شاب مصري فإنت أو توماتيكياً تحت ضغوط كثيرة، بتبتدي من «مش هنفرح بيك / بيك بقي؟»، أو حتى لو ممزوجة مع شوية ابتزاز عاطفي جميل كده وبقت «نفسى أفرح بيك / بيك قبل ما أموت!»، أو «نفسى أشيل عيالك قبل ما أموت!».

لا، لو كده موتوا بصراحة، أحسن ما ندخل تجربة فاشلة تأثر علينا نفسيًا وجسديًا وماديًا حتى! الجواز ده مش حاجة بتعملها

عشان حد، دا أكبر حاجة ممكن تعملها لنفسك، ده عمرك إنت
وسعادتك إنت!

الأطفال دول مش لعبة! لو زهقان نزل «كاندي كراش»، بس
اطلع بره حياتي واختياراتي!
ده يمكن السبب اللي مخلّياها في مصر منظومة أبعد ما تكون
عن النجاح الحقيقي، لأن الضرر الأساسي فيه: الحالة النفسية
للبنّي آدمين اللي بيتجوزوا وبينفصلوا، والأطفال إن وجدوا،
دول بس مفيش حد تاني بيقع عليه أي ضرر مهما حاول
يدعي ده.

أي فرح بينتهي بإن المعازيم أو الجماهير بيودعوا العريس
والعروسة، كله مبتسم ابتسامة مصطنعة، ويعمل باي باي في
صمت. كلهم عارفين إنهم سلموا الاتنين دول لمشكلة ملهاش
حل، عارفين، ومن جواهم بيتمنوا في سرهم إن يمكن دول همّ
اللي يعرفوا يحلوها، همّ اللي يعرفوا يعملوها ويتجوزوا ويحبوا
بعض، ويكملوا!

فكرة إنك تعيش في مجتمع بيدفعك بالقوة لعلاقة رسمية، ده
في حد ذاته أكبر سبب لزيادة معدلات الطلاق في مصر! عشان
محدث بيدفعك إنك تلاقي الحب، كله بيسوّق، ويعمل ماركتينج
رهيب لمبدأ الجواز دون أي تسويق أو توعية عن المحتوى!
تخيّل نفسك قاعد في المقصورة الرئيسية، وعمّال تقول لراس
الحربة في الماتش: «هات جون! هات جون!».

مش هيجيب جون، بالعكس، بالضغط ده ممكن يجيب جون
في نفسه، أو يتطرد، أو حتى يقلع ملط ويتشعبط في العارضة،
وده يمكن أكثر خيار مفضل بالنسبة ليّ.

في حين إنك لو قتلته «انزل الملعب انبسط، وإدي كل اللي
عندك، وعيش اللحظة، وإحنا معاك بغض النظر عن النتيجة»،
ممكن يبقى هداف القرن، ممكن يبقى محمد صلاح!
هو مجرد اختيار.

ليه نحمله كل ده؟ ليه نضغط عليه إنه ينجح بالعافية؟ ليه دائماً
بنضغط على الخطوة الأولى إنها تكون الأخيرة والصحيحة؟
قعدت أفكر كثير أوي، وعملت بنصيحة منير، ودورت على
الناس في قلوب الناس، واكتشفت إن السبب الأساسي للفقره
دي كلها، هو الرغبة المستميتة في الفرحة، الـ «desperation».
الاحتياج الشديد للسعادة، حتى لو كانت عن طريق الآخرين،
الأهالي والبهوات المعازيم دول كلهم مش سعداء في جوازهم،
فجاين يفكروا أنفسهم بفرحة الموضوع الظاهرية مش أكثر.
أنا يمكن كنت فاكر إني حمار لما كنت عايز أبقى «أونكل
كمال خطيب ماما»!

بس في الحقيقة الستات دول كانوا أعظم حاجة في حياتي،
وأحسن حاجة ممكن تحصلي، وحققي حبيتهم واتشرفت
بمعرفتهم! لأنهم أضافولي، كل واحدة بطريقتها، وكانوا جزء
من رحلة خرجت منها فاهم نفسي!

حبيب أوجهلهم كلهم كل الشكر والتقدير، لأن لولاهم
ما كنتش هاقدر ألقى السعادة الحقيقية والحب الحقيقي!
عشان لما تيجي تجمع الناس كلها حواليك، وتقولهم هوّ ده
الشخص اللي اخترت أقضي معاه بقية عمري، تبقى عارف إنت
بتقول إيه، مش داخل تجرب، وده ما يمنعش إن التجارب بتفيد.
فكّر نفسك دايمًا إن ملعون أبو الناس اللي يدفعوك لقرار
غلط، حتى لو أقرب الناس ليك، ولو حصل ما تندمش على
هذا القرار، عشان غالبًا ربنا عايز يعلمك حاجة مفيدة هتنفعك
في بقية حياتك.

باحمد ربنا ألف مرّة على نعمة كبيرة أوي، وهيّ إن معندناش
أطفال مع بعض، عشان البني آدمين مش لعبة، وما ينفعش يكونوا
عبء. ويوم لما هاجيب طفل بإذن الله، هابقى أنا سعيد وعائش
حياة سعيدة مع أمه، عشان ييجي يعيش في سعادة هوّ كمان،
مش هاجيبه أشيله هموم، وأعيشه حياة ينقصها أشكال كثيرة
من السعادة والحب! ليه أعمل كده في بني آدم؟ ليه الأنانية؟
أنا مش أناني (بصوت عمرو دياب).
أنا «أونكل كمال خطيب ماما».

19#

لما افكرت إن أبويا ما بيحبنيش

بعد ما خلصت ثانوية عامة علمي رياضة في سنة ٢٠٠٠،
بمجموع تانية وتالته على بعض ٩٠٪، ما كانش عندي اختيارات
كثيرة أوي، كل الهندسات بعدوا عني، أكثر من واحدة شافت
الإكس بتاعها وهي معاها خطيبها.

أمي ما كانش ليها رأي أوي، أمي كانت من مدرسة «خش
أي حاجة وأهو كله محصّل بعضه». وإلى حد ما كنت فاكرها
طلعت هيّ اللي صح في الآخر من وجهة نظر الشهادة، بس من
وجهة نظر التجارب الحياتية ونوعية الناس اللي بتختلط بيهم
وتفكيرهم ونوع العلم اللي بتتعلمه، لأطبعا، الجامعة كل حاجة،
الجامعة هي تشكيل الشخصية الحقيقي، والعلم بيفتح دماغك
بشكل مش بتستوعبه، ويحدد نوع عقليتك في أغلب الوقت.
أبويا بقى الله يرحمه كان مصمّم إنني أدخل شرطة، تصميم

ما شفتهوش قبل كده من ساعة ما دَخَل أخويا شرطة، وفعليًا كنت مستكين في الأول، ورُحِت قدمت فعلاً، وكان بييجي معايا الكشوفات كلها، كان على المعاش ساعتها وعایش لوحده.

كل كشف كنت بارووحه، كنت باكره نفسي، وباتأكد إنني ما ينفعش إنني أبقى ظابط، مش علشان مش عايز، بالعكس، أنا كان نفسي أبقى ظابط، كان نفسي أبقى ظابط أكثر من الضباط نفسهم، أكثر من أحمد السقا وأحمد عز وأي حد اسمه أحمد بصفة عامة. بس كنت حاسس إنهم عندهم حاجة مش عندي، وحاسس برضه إنني عندي حاجة مش عندهم.

وصلنا لمرحلة الكشف الطبي، وأبويا كان بيركن بره في الحر. في الكشف الطبي كنا كلنا قالعين وواقفين باللبسة، ضهرنا للحيطه، وعاملين مربع بشري بمساحة أوضة الكشف بالكامل، ومكتب الهيئة بتاعة الكشف كان في منتصف المربع بالضبط، والشباب كلهم واقفين مستنيين أحد الضباط يعدّي علينا بمازورة، المتر بتاع التريزية ده، اللي فيه كذا لون مختلف في بعض ده، مدّي على رينبو كده، ومعاه عسكري جنبه ماشي شايله الملفات، وبيقيد مقاسات الصدر بالسنتي على كل ملف.

الشباب كلهم كانوا متحمسين، اللي واقف مبتسم، واللي واقف انتباه فاكر إنهم هيعجبهم التزامه وعقليته العسكرية، واللي بياخذ نفس عميق قبل ما يتقاس، واللي يلعب ضغط عشان يلحق يكبر صدره عشان المقاس. الموضوع ما كانش له علاقة

بالتقديم على أد ما كنا شايفين إنه نوعًا ما اختبار رجولة وتحدي
و«Fear of rejection»، والحقيقة لو مقاس صدري ما جابش الحد
الأدنى كنت عارف إنني ها حس إنني في حاجة مش سليمة. أذكر
في اللحظة دي إنني كان نفسي صدري يكبر أكثر من بنت مراهقة
في إعدادي عايزة تظبط مع الواد بتاع ثانوي اللي بيعرف يلعب
كرة وبيهزر مع المدرسين ده.

لما الظابط قرب مني، ولف المازورة على صدري وظهري،
في وضع شبه محتضن كان مخليني مش مرتاح أوي، صدري
للأسف كان أقل من الرقم المطلوب، كان ٧٩ سنتي.

خرجت محطّم، حتى وأنا مش عايز أدخل شرطة أكثر من
الأول، يمكن عشان حسيت إنني فشلت في حاجة، حتى وأنا مش
عايزها. ولما خرجت لأبويا وهو واقف ساند على باب العربية
المفتوح مبتسمًا، وقتله، وشه اتقلب، الله يرحمه! زعل، مش
عشان مقاس صدري صغير، لأ، ولا عشان إنني ممكن ما أدخلش
شرطة برضه حتى، زعل بسبب أكثر حاجة كان بيعحبها فيّ، وهي
إنني كنت واخد جسمه الصعيدي النحيل الممصوص بلهاريسي
النزعة ده، كان بيعحب ده أوي فيّ، يمكن كان بيعبني أكثر من
أخويا عشان كان حاسس إنني شبهه أكثر جسديًا، أخويا كان
واخد جينات عيلة أمي، الجينات الممتلئة شوية اللي بتحوش
الدهون للزمن دي، وبيعاني منها لحد دلوقت، بس عامل شغل
كويس في الحرب عليها.

ساعتها أبويا حس إنه نقلي جين لعين، ودي كانت أول مرّة
أحس أبويا زعلان من حاجة أنا طرف فيها، بس مش بسببي .
وإحنا مرّوحين كان سايق وهوّ سرحان، وبيكلمني عن
الإعادة، وبيقولي إنه هيحاول يكلملي حد، وإني لازم أبتدي
أهتم بصحتي شوية، ما كانش يعرف إني في الوقت ده كان
بقالي خمس سنين باشرب سجاير بانتظام، من تانية إعدادي
تحديدًا، وده كان السبب الأساسي في حجم صدري المحدود
وقتها. الله يحرقك يا هاني يا عادل! مش قصدي الفنان، قصدي
صاحبي التيت اللي كان معايا في المدرسة، التيت ده شرّبني
سجاير وبطلّ هو، لأ وسافر عاش في ألمانيا كمان التيت، اللي
هوّ تيت يعني .

بس ما كنتش شايف الكلام ده كله ساعتها، كان بيتسجل في
شريط عقلي، ما اتفرجتش عليه غير بعد وفاة أبويا، ما كنتش
مجمّعه، كنت سرحان في صدري الصغير ووشي شبه البنت
بتاعة «ورقة شفرة» اللي سرحانة وهيّ بتقول إمتى صدري يكبر .
وفعلاً لما روّحت ابتديت أعب ضغط بقسوة شديدة، وجبت
«ميجا ماس»، مكمل غذائي بروتيني كان شهير أوي في الوقت
ده، كان بيعجي في جردل إسود غطاه أحمر، وأمي طبعًا كانت
بتساورها كل الشكوك الممكنة، ومش فاهمة إيه البودرة اللي
باسفها من جردل دي، ومش متطمنة للموضوع، بس في نفس
الوقت عارفة إني جايبه من صيدلية فمش قادرة تقول حاجة،

المهم إنه فعلاً ساعد، ومع الأكل صدري فعلاً كبير، مش أوي يعني، بس بدل ما كنت حلمة في وسط ضلعين، بقيت «A cup». ورُححت مع أبويا تاني، وكلّي ثقة في صدري وحلماتي، وفي نفس الوقت ما زلت مش عايز أبقى ظابط، بس عايز أنتصر في معركة الصدور، وهوّ، مش هانسي وشه، كان قاعد جنبي في العربية بيدعي في سره، شايف دلوقت في الشريط شفايفه وهي بتتحرك بهدوء، وصوت بسبسة خافت طالع من بقة.

دخلت وقلعت واترصيت في مكاني في المربع البشري، ولسبب ما كان فيه يومها ريحة رجلين بنت تيت، ريحة تدمعها الأعين، حتى الظابط والعسكري بتوع المقاس كانوا «In tears». دخل عليّ بالمازورة، وإداني الحضن إياه، وكتب الرقم: ٨٤. فرحت طبعاً فرحة ما بعدها فرحة، طيارة أبو تريكة على أغنية لؤي «بلدنا» في الخلفية، كان ناقص نانسي عجرم تخش تحضني، ومذيع من مراسلين التلفزيون المصري يعمل معايا حوار وهوّ متوتر ويحاول يركز في أسئلته.

خرجت باحاول أخبي فرحتي من أبويا، وهوّ وشه كان كله لهفة مش هانساها، عينيه مش قادرة تستنى خطوتي البطيئة وأنا باقرب عليه، كان متلهف لدرجة إنني قربت منه وأنا ساكت ومش مدّي أي رياكشان، راح مزعقلي وقالي:

- هااا؟ ما تنطق!

قلتله، وفرح فرحة نورت وشه، وقعد يقول «الحمد لله»

بصوت عالي ويبوس فيّ، وأنا عمّال أتلفت وأبصر حواليّ وأنا
مُحرج ومش عارف أعمل إيه، فقلت ألحق ألبه قبل ما يدبسنني،
وأموّت فرحته في عقرها، وقلته:

- مش عايز أدخل شرطة!

طبعًا ولا كأني قلت أي حاجة، تجاهلني كأني جاي أبيعله
فوط صفرا، معتمدًا إنه هيقنعني بعدين، المهم إني عدت.
كان فخور بيّ أوي، ونوعًا ما حاسس إني هابقى ظابط شاطر،
بس إحساسه ما طلّش صح!

بعد حوارات كثيرة أوي، ومحاولات إقناع أكثر، سابني
في الآخر أدخل أكاديمية السادات، اللي قعدت فيها أسبوع
بالظبط ونقلت للأكاديمية العربية للعلوم والتكنولوجيا، هندسة
وتكنولوجيا، علوم حاسب.

* * *

لما خلصت جامعة أصابني الدور في دخول الجيش،
وما كنتش مصدق إني هادخل جيش لحد آخر لحظة، وفاكره
هيتصرف ويطلعني، بس إحساسي ما طلّش صح، ودخلت
جيش عادي جدًا.

أول يوم دخلت الجيش كان من أصعب أيام حياتي، وكنت
باحاول أوصل لأبويابشتي الطرق، وكان وقتها فيه شخص مهرب
موبايل داخل الوحدة، جوه ملابسه الداخلية، بجوار أعضائه
التناسلية بالتحديد. أذكر جيدًا إني جريت عليه أول ما قفلنا

باب العنبر، وطلبت منه التلفون، وراح مادد إيده جوه الكلوت،
ومطلع هولی، لحظات ومشاهد تاریخیة لا تُنسى!

كلمت أبویا وكلی غضب وحزن، وعمّال أشتكی وأزعق،
وأقوله اتصرف وطلعتني من هنا، وهو يقفش عليّ ويشتمني،
ويقولي: «استرجل، مش هاعملك حاجة»، وأنا أنهار!

استرجلت، وكمّلت جيشي، وكان فعلاً تجربة مميزة غيرت
شخصيتي للأحسن، بغض النظر عن أي تفاصيل كوميدية.

بعد وفاة أبویا الحبيب الله یرحمه، جرت العادة إنه لا بد من
تسليم متعلقاته العسكرية في القيادة على يد ذويه، وأنا اللي رُحت
بمتعلقاته عشان أسلمها، ودخلت الحقيقة مستغرب من المعاملة،
دخلت الناس بتسلم عليّ كأني بطل، أو ابن البطل بالتحديد. كله كان
يسمع إني ابن اللواء صدقة، يسلم عليّ سلام حار، ويعزيني، ويعرض
خدماته، أو حتى حاجة أشربها، وأنا باحاول أشكرهم وأتفادي كل
ده عشان أوصل للمكتب اللي هاسلم فيه الحاجة وأمشي.

وصلت فعلاً بعد طابور طويل من المعزين، وكان فيه مقدم
جوه، المسؤول عن الاستلام، وكان أحد تلامذة أبویا، سلم
عليّ وباسني وحضني حضن حار، وقعدني قدامه، وقعد يشكر
في أبویا، ويملا الورق اللي قدامه، ويشكر في أبویا، ويملا في
الورق، وعينه تدمع، وفجأة راح قايل:

- يااااه! الله یرحمه! إنت عارف إني ما شفتش سيادة اللوا

الله یرحمه من ساعة الخناقة اللي جه عملها هنا؟

استغربت، وما فهمتس ساعتها أبويا ممكن يتخانق ليه في القيادة بتاعته وهو المعروف والشهير بانضباطه واحترام قياداته! وسألته بكل كليشيهية:

- خناقة؟! خناقة إيه؟!

بصلي باستغراب كأني المفروض أبقى عارف، وقالني:
- يوم لما إنت دخلت جيش، جه هنا وعمل خناقة كبيرة،
ودخل لقائد السلاح وقعد يزعقله، وإزاي ابني يدخل
الجيش، وإزاي إنه هوّ خدم البلد كفاية واتغرب كفاية،
ونزلوه أجازات، وزعيق كثير.

تَنَحَّت! اثبت! اتخضيت! صُعقت! حُط كل المرادفات اللي
عندك هنا كمان، هات المرادفات اللي عندك يا حسن.

ما جمعتش تركيبة الأب، أي أب، غير في اللحظة دي!!
الضرب خلّاني فعلاً ما أصدقش إن أبويا بيحبني، وما فهمتس
الموضوع ده غير بعد ما مات، يعني عشت حياتي كلها مع أبويا
غير قادر إنني أوصله إنني باحبه، عشان مش مصدق إنه بيحبني،
ودلوقتِ باعيش حياتي كلها عارف إنه كان بيموت فيّ، وعمري
ما هاقدر أوصله ده، والفرصة راحت للأبد!

عشان كنت حمار!

لما كنت بانزل أجازة من مركز التدريب، كان بيبقى واقف
على الباب مبتسم، وماسك ظهره المصاب بالغضروف!
منظر أبويا اللي ظهره واجعه، وواقف مبتسم ابتسامه عريضة

مستنيني على بوابة مركز التدريب، حاجة من الحاجات اللي
هافضل أفكرها بقية عمري!

من كُتر ما ضهره كان واجعه والغضروف شادد عليه من
السواقة لحد مركز التدريب، خلّاني أسوق العربية وإحنا راجعين،
وده تقريبًا كان من رابع المستحيلات بالنسبة له إن حد يسوق
عربيته، وما فهمتهاش ساعتها، بس كان مبسوط ومبتسم، وسعيد
سعادة غير طبيعية!

معلش، سامحني! فهمت متأخر!

عشان كنت أكبر حمار في الدنيا!

مهما كان أبوك قاسي، مهما كان، هوّ ليه تركيبة، وليه ظروفه،
وليه حاجات مربيها مش هتقدر تفهمها في سنك أو في وقتك،
هتفهم بعدين، ولو لسه عايش، رُوح بوس إيداه واحضنه حضن
طويل، دي نعمة كُتب عليها الزوال، ومش هتحس بيها غير
وانت واقف قدام قبره بتتمنى يخرجلك ولو دقيقة واحدة بس،
تقوله إنك بتحبه!

21#

لما ما كُنتش باسامح

تقريبًا كل الأنبياء كانت حياتهم فيها معاناة عظيمة، سواء اللي إخوته رموه، أو اللي أهله حرقوه، أو اللي أصحابه وقومه خانوه، أو حتى اللي حوت بلعه.

مسيراتهم دائمًا كانت محفوفة بالمشقة، وباحب أعتقد إن ربنا وضع المثل ده في أطهر البشر وأعلاهم مكانة، كنوع من التهوين على باقي البشر معاناتهم، وكأنه سبحانه وتعالى بيقول، دول اللي باحبهم والصالحين واللي أنا مختارهم، وعادي إنهم يعانوا في الدنيا، فما تحزنش أوي على نفسك، أنا مش مستقصدك إنت شخصيًا.

فيه حاجتين كنت دائمًا باستغربهم وأنا صغير...
أول حاجة هي قدرة الأنبياء على حب الناس اللي كانوا بيأذوهم، سواء قصة سيدنا محمد صلى الله عليه وسلم - غير

المؤكدّة - لما كان فيه شخص يهودي يرمي القمامة قدام بيته، ولما الشخص ده بطل يرميها، النبي صلى الله عليه وسلم راح يزوره في بيته ويطمّن عليه. أو تسامح سيدنا عيسى لما يقول من ضربك على خدك الأيمن أدر له الأيسر. أو حتى إزاي سيدنا يوسف ما أخذش إخوته اللي رموه في غيابة الجب ورماهم في السجن بعد ما بقى العزيز. عمري ما كنت بافهم ليه موقف الأنبياء كان موقف - بالنسبة لفكري في وقتها - ضعيف.

الحاجة الثانية اللي عمري برضه ما كنت بافهمها لحد مؤخرًا، هيّ الفظائع اللي بتحصل في البلاد الأفريقية، إزاي شخص ممكن يطلع على عربية نص نقل ويقعد يضرب نار من بندقية آلية يروع بيها الناس، أو يغتصب أم قدام طفلها، وفي بعض الأحيان حتى يقتلها، الحاجات اللي كنا بنشوفها في الأخبار، وفي بعض الأفلام، والقصص الشنيعة اللي باسمعها من ناس كانوا في دارفور، إزاي شخص ممكن يوصل لهذا المستوى من القسوة وجمود القلب والإجرام!

الموضوع كان محير جدًا بالنسبة ليّ، إلى أبعد الحدود، لحد ما وقعت على فيديو بيتكلم فيه مطران شهير من مطارنة وقساوسة جنوب أفريقيا اسمه «ديزموند توتو» (بس راجل أوي)، أحد أهم رجال الدين في جنوب أفريقيا، اللي درس الأديان كلها، وصديق شخصي لـ «نيلسون مانديلا»، وكان بيتكلم عن الأبارتهايد وفظائع الجرائم اللي حصلت في هذا الوقت، وكان بيحكى إنه في مرّة زار

دارفور، وقابل ست كانت في حفلة انتهت بمأساة لما الجماعات
المتمردة رموا عليهم قنابل يدوية، ونتج عن ده إن الست نفسها
تشوهت وفقدت جزء من أطرافها، وبقت غير قادرة على إنها
تعمل أي حاجة لنفسها، وولادها كانوا بيعتنوا بيها. وبيحكي
إنه لما قابل الست دي، سألها عن اللي حصلها، وقالتله إنها
«تجربة أغنت حياتها»، خلّت حياتها غنية يعني، وطلبت إنها
تقابل الشخص المعتدي اللي تسبب في تشوهها عشان تسامحه.
الراجل استغرب طبعًا، وسألها:

- إزاي عايزة تسامحه؟

قالتله كده بالحرف (الإنجليزي يعني):

- يجب أن أسامحه لكي أكون أنا، وحتى لا أكون ما فعله بي!
جملة عظيمة بكل ما تحمله من معاني، وهي كثير الحقيقة،
بمعنى إن لما حد يعمل فيك حاجة وحشة، وتسامحه، بيخلصك
من عبئها النفسي عليك، مش بيخلصه هو، بيحررك من طاقة هذا
الأذى، عشان لو شلتها معاك هتاكلك، هتعميك، هتضيع أي حاجة
حلوة تانية، لأنك مش هتكون شايف غير الأذى اللي مریت بيه.
وبيكمل بقى «ديزموند»، وبيشرح أهمية اللي الست دي
عملته، وبيقول:

If you carry out a policy that dehumanizes others, in
the process you are dehumanized.

لما هتصدق أو تقنع نفسك إن اللي قدامك حيوان، أو يستاهل،

أو شخص سيئ وفاقدا الإنسانية بصفة عامة، هتقدر تعمل فيه أي حاجة في الدنيا، ولو قدرت تعمل فيه أي حاجة في الدنيا فإنت هنا اللي بقيت حيوان، وإنت اللي تحوّلت لشخص سيئ وفاقدا للإنسانية.

لو أقنعت نفسك إن فيه شخص ابن تيت، ويستاهل اللي يجراه، فإنت بالتالي تحولت لشخص ابن تيت يستاهل اللي يجراه.

لو كل واحد أذى شخص تاني أذاه، فهي دايرة مفرغة من الأذى ما بتقفش، وهنبقى أصبحنا كلنا قادرين على أذى الآخرين، ومش بس كده، لأ، هيكون عندنا مبرر قوي جداً للي بنعمله في الآخرين.

طبعا ده مستوى كان جديد عليّ في الإنسانية، بس لما ربطته بالحاجتين اللي كنت دايماً باستغربهم، فهمت.

فهمت إزاي النبي ده عشان يفضل نبي، وشخصيته ما تتغيرش للأسوأ، لازم يسامح، ويصبر على أذاه، ويقابل هذا الأذى باللي هو عايزه يفضل موجود في الدنيا: الخير، والتسامح، والأخلاق. لما هذا المطران الأسمر الجميل، اللي على الرغم من سنه الكبير ووشه اللي كله طفولة، قعد يشرح مدى ترابط الإنسانية، فهمت برضه.

فهمت إن أي حاجة بتعملها في الدنيا ليها تأثير عليك وعلى اللي حواليك، وإنت في إيدك، لو التأثير ده سلبي، إنك توقفه

عندك، لازم تكون إنت خط النهاية لكل حاجة وحشة، عشان لو ما وقفتهاش هتكمل في الدنيا بدون توقف، هتبقى مجرد حلقة في السلسلة، بدل ما تكون حائط صد للشر، ونهايته تكون تحت أقدامك.

«الدالاي لاما» كان بيتكلم عن هجوم الجيش الصيني على التبت، اللي كان في وقتها طايح في كل حته، كان بيقول إنه ابتدى يحس إنه في خطر لما فقد تعاطفه مع الجيش الصيني. الراجل خاف على نفسه وإنسانيته لما لقي نفسه ابتدى ما يتعاطفش مع عدوه، اللي بيقتل فيه. حس بقدرة على الأذى بتكون عنده، وحس بخطورتها عليه هو شخصيًا.

الأذى مش بس جسدي وقتل وجريمة، خالص.

فيه عالم ياباني اسمه «ماسارو إيموتو»، عمل تجربة لطيفة أوي، كان بيحاول يثبت بيها إن الكلام العادي، كلامنا الطبيعي بيننا وبين بعض، ليه طاقة، ومؤثرة، وممكن تكون سلبية أو إيجابية.

«ماسارو» ده جاب ثلاث كوبايات فاضيين، وخط في كل واحدة رُز وميه، بس كده. وعلى مدى شهر، كان فيه كوباية بيتعامل معاها بإيجابية وابتسام ويقولها: «شكرًا»، وكوباية بيشتتمها ويقولها: «يا غبية»، وكوباية تالته تجاهلها تمامًا. طبعًا لو واحد مش فاهم إن «ماسارو» ده بيعمل تجربة، ودخل عليه لقاء بيشتتم كوباية ويقولها «يا غبية»، وكوباية تانية بيعحبها ويشكرها،

كانت هتبقى لقطة غريبة فشخ! وغالبًا كان هيسلمه لأي مصحة!
بس الحمد لله، ربنا وفقه يعني، عشان في أي تجربة فيه علم
مكتسب.

المهم، بعد الشهر ده، الكوباية اللي كان بيشكرها وبيحبها
بدأت تتخمر برائحة جميلة!
والكوباية اللي كان متجاهلها تمامًا عفتت، بقى لونها لون
العفن الأخضر ده!

والكوباية اللي كان بيشتمها، بقى لونها إسود!
هتعمل إيه لو قلتك إن كلامك القاسي لشخص ما، هيخلي
الشخص ده يعفن من جواه أو يسود؟ في ثانية هبيجي في دماغك
اسم شخص تجاهلته وشففت تدهوره بعد كده، وشخص إنت
عارف إنك كنت قاسي عليه وشففته بيبقى شخص وحش.
على أد ما جملة «التسامح قوة» كليشيه، بس هي دي الحقيقة،
والحقيقة إننا كمان بقينا بنخلي كل حاجة كانت سبب في إنسانية
أفضل، تختفي لما بنقول عليها «كليشيه». يمكن إحنا محتاجين
قليلاً من الكليشيه عشان نعرف نعيش.

حباب أضيف حاجة هنا، أكثر حاجة ممكن تاخذ فيها وقت في
حياتك هي إنك تصدق إن أقرب الناس إليك هو السبب في أذاك،
هو مصدر الألم اللي إنت مش عارف هو جاي منين طول الوقت ده.
شيء صعب التصديق فعلاً، شيء مش سهل الاستيعاب،
وممكن ياخذ منك سنين، مش أيام!

يمكن أكبر مشكلة عند البشر هيَّ رغبتهم الانتقامية في رد الأذى، حتى لو كان غير مقصود!

أکید أنا آذیت ناس، ده شيء مفروغ منه، وأبقى إنسان واهم لو آمنت بأي حاجة غير كده، بس اللي متأكد منه فعلاً هوَّ إني عمري ما رغبت في أذى حد متعمداً، وحتى لو فكرت في أذى حد، فكرت بس، بارجع ألوم نفسي بعدها بوقت قصير جداً، ويمكن حتى لو سُفت هذا الشخص لاحقاً، بانسى، بابقى عايز أسلم عليه وأحضنه، وأنسى الزعل اللي بيننا.

في أوقات كثيرة دفعت ثمن بسبب أذى أذيته لناس من غير ما أقصد، بس همَّ كانوا انتقاميين كفاية إنهم ما يشوفوش ده، أو غير مدركين كفاية إن رد فعل الشخص اللحظي، غير إحساسه اللي في قلبه.

You can't blame anyone if they don't know any better.

ما تقدرش تلوم حد وإنْت شايف كويس إنه ما يعرفش يتصرف تصرف أفضل.

ما ينفعش! الحكم على البشر مش حاجة تقدر تعملها في موقف أو اتنين أو حتى عشرة، وإلا ما كانش ربنا نفسه، اللي خلق البشر والكون، أجل الحساب للآخر خالص، لحد ما يشوف النتيجة النهائية، لحد ما يوزن كل أفعالك قصاد بعضها، ويخرج بنتيجة منطقية محسوبة بميزان ذهب، تقدر تكون صورة أوضح عنك كإنسان، كويس أو وحش ده مش قرار يحسب بأي حسابات بشرية

إلا إذا كنت مراقب هذا الإنسان طول الوقت، طول حياته، وشايف أفعاله في الصغيرة والكبيرة، وشايف ردود أفعاله، وكاشف نيته، وسامع الصوت اللي في دماغه بيقوله إيه، والقرار اللي بياخده إيه. عشان تحكم على شخص، لازم تكون إله! لكن عشان تتعاطف وتسامح وتقدر وتعفو وتصفح وتترفع وتقول «معلى مش قصده»، دي حاجة نقدر نعملها كبشر، هي بس محتاجة شوية تفكر وإدراك، محتاجة إنك تكون بصيت على نفسك، وراقبت نفسك، وحاسبت نفسك، وفهمت في الآخر إنك إنت نفسك صعب تحكم على نفسك، وبكل تأكيد، مش هتحب إن حد يحكم عليك، وهتتمنى العفو والتسامح والتقدير.

لو ده اللي عايزه، حاول يكون ده اللي بتديه للناس، يكون ده الـ «input» بتاعك في الدنيا، عشان في الآخر هي كده.

اللي - سوري في الكلمة يعني - بتحطه، هو اللي - سوري في الكلمة برضه يعني - بتاخده. عشان كده أنا مسامح، هم كويسين أو وحشين دي مش بتاعتي، دي بتاعة رب الكون، اللي ميزنا الحمد لله بـ «ميسة».



كنت حمار عشان ما كنتش باسامح حد، فيه ناس قدرت أسامحهم، وفيه ناس ما قدرتش، يمكن لحد قريب! مفيش شر مطلق في الدنيا، أي شخص له أبعاد بين الخير والشر.

المرّة العجاية لما تلاقي نفسك بتحكم على حد إنه ابن تيت
ويستاهل كل اللي يجراه، حاول تفكر للحظة هو شاف إيه من
الدنيا عشان يبقى كده، وحاول تتعاطف معاه، عشان لما بتكره،
بتبقى إنت الخسران مش حد تاني.

أنا كنت حمار كبير أوي، لما ما كنتش باسامح!
إنك ما تسامحش حد، ده سجن بتحبس نفسك إنت فيه،
مش هُمّ.



23#

لما اتخانقت

اتخانقت في حياتي مرّة واحدة بس، خناقة حقيقية يعني،
وما كررتهاش تاني.

كنت في تالته إعدادي في المدرسة، نحيل الجسم، طويل
الشعر، لابس نضارة، لسه مكتشف العادة السرية وصحتي تكاد
تكون منعدمة، وفي حالي.

كان ليّ صديق في وقتها اسمه أحمد علاء، كان شعره طويل
برضه، وجسمه قليل، ولسه مكتشف العادة السرية برضه، وكنا
حاسين بنوع من أنواع الصلة أو القرب لبعض، فكنا بنقعد جنب
بعض على الديسك، الديسك الخشب القديم أبو درج بتقفله
بالقفل الرمادي في نيكل وعليه ٣ حلقات ده.

كنا مسالمين، آخرنا بنزوّغ عشان نروح ناكل.

كان فيه ديناصور اسمه أمين، كيان ضخم الجسم، وراسه

صغيرة ومش متناسقة نسبيًا مع حجم جسمه، اللي صعب يكون
جسم طالب في تالته إعدادي بهذا الحجم، صعب يكون جسم
واحد في مدرسة بصفة عامة. تحسه مارد من بتوع حلقات
«مازنجر»! كان شعره إسود، من النوع الأكرت القصير اللي
ما بيطولش خالص ده، اللي هوّ دايماً طوله ثابت من غير ما يروح
لحلاق، ونفس الشكل سواء سرحه أو سابه أو جابه على جنب،
هوّ هوّ نفس المنظر كأنه عروسة أطفال بلاستيك!

كان معانا في المدرسة، وفي الفصل، وكان دايماً بيقعد ورايا
أنا وأحمد، ويقعد يغلس علينا، يتريق علينا، وعلى طول شعرنا،
يتف علينا كور ورق مبلة بلعابه المقزز من داخل قلم جاف بيك
منزوع الأنبوبة في أثناء الحصة، وإحنا كل شوية نلف نزعقله،
المدرس يشوفنا ويز عقلنا إحنا، فيقعد هوّ يضحك ضحكة بلهاء
يهتز لها كرشه والديسك بتاعه والديسك بتاعنا بالتبعية!

في يوم من الأيام كان مزودها، ومصمم إنه يحصل على رد فعل
متنا، وأنا وأحمد بنحاول نركز، بس مفيش فايده، هوّ عقد العزم!
زودها لدرجة إنه قعد يشدني من شعري أنا وأحمد، وخط
لأحمد لبانة في شعره، وإحنا بنحاول نكتم غيظنا، بس فشلنا!
بصيت لأحمد، لقيته باصصلي بغل وقرف ونفاد صبر. رُحت
فاكك قفل الديسك بهدوء وخلعته من مكانه، ولبسته في أيدي،
مغطياً صباعي الأوسط، تاركًا منه الجزء الدائري النيكل فوق
صباعي، والجزء الرمادي داخل أيدي. وبصيت لأحمد لقيته

عمل زبي بالظبط. واستنينا الدقائق المعدودة لحد انتهاء الحصّة،
وأمين مستمر في الاستفزاز وضحكته الكريهة...

جرس الحصّة ضرب، المدرس خرج، لفيت أنا وأحمد
بهدوء، ونكاد نكون بالتصوير البطيء في مشهد مقارب لأفلام
«تارانتينو»، قربنا منه، لقيناه وقف، وطوله كان مبهر فعلاً، نظيت
أنا وأحمد تلقائياً على الديسك في حركة متناغمة بدون أي
تنسيق مسبق، وانها لنا على راسه بالبونيات، مرتدين الأقفال
الحديد في إيدينا.

أمين اتخض، وحاول يغطي وشه بإيديه، بس غلّي أنا وأحمد
كان أكبر من جسمه في هذه المرحلة، الخناقة قلب.

فضلنا ننهال على وشه ورأسه، لحد ما سمعنا صوت صرخة
أشوية مدوية، ونافورة دم ضربت في وشنا وفي الحيطّة، وأمين
رفع رأسه، ونافورة الدم اللي منبعها جبهته، فوق عينه تحديداً،
بترش دم في أي حتة يببص فيها، بطريقة تكاد تشبه أفلام الكارتون.
اتخضت أنا وأحمد، وقفنا ضرب، وخذنا خطوة لورا، وأمين
بيصرخ صريخ ما سمعتهوش من بنت في حياتي لحد هذه اللحظة
غير في الأفلام، وطلع يجري على باب الفصل.

بصيت لأحمد، لقيته باصصلي، بصينا على الفصل، لقيناه كله
باصصلنا في ذهول، وصوت صريخ أمين لا يزال في الخلفية،
رُحنا راجعين على الديسك بتاعنا في هدوء، حاطين الأقفال
مكانها، وقعدنا.

ابتدت الحصّة اللي بعدها، وإحنا قاعدين مكاننا، وأمين مش موجود، وفجأة دخل أحد موظفي المدرسة بيطلبنا بالاسم، قمنا بنفس الهدوء، نزلنا لقينا أمين قاعد بيعيط جنب الناظرة، وأمه داخلة تجري وتحضنه، والناظرة بتزعق وتتوعد، وأهلي أنا وأحمد على وصول!


ستر ربنا إن الضرب ما جاش في عينيه، بس جه في أضعف حته جنب العين، واللي غالبًا بتبقى سبب لنافورة دم فعلاً، ألا وهي منطقة فوق الحاجب مباشرة، بس كان ممكن تيجي في عينه وتروح منه فعلياً بسبب خناقة تافهة في مدرسة! بسبب غضب!

اترفدنا ٣ أيام، ورجعنا بعدها المدرسة، لقينا الناس كلها بتبصلنا بنظرة مختلفة، يمكن خوف، ويمكن عدم اطمئنان لحدود ردود أفعالنا خلاص.

أدركت في ساعتها، وأنا في تالته إعدادي، إن أنا ما ينفعش أتخانق تاني أبداً!

ساعة الغضب بتبقى شخص غير متحكم في نفسه وأفعاله. وفعلاً، عمري ما اتخانقت تاني في حياتي، لدرجة إنني في أوقات كثيرة كنت بافضل أسيب حقي، عشان عارف إنني لو خدته، هاخده بغباء، معنديش منطقة وسط للأسف، وهابقي أكبر خسران! جدير بالذكر إن أمين عمل لاحقاً كأحد الجارديات بأحد الملاهي بشرم الشيخ، وكان أصدقاء المدرسة كعادتهم بيعدوا

من قدامه ويتريقوا عليه ويقولوله: «هنجيبلك هشام يلا»، وكانوا
بيحكولي ويضحكوا، بس أنا لما كانوا بيحكولي كنت باسرح،
وبافتكر كويس أوي، إني كنت حمار لما ما اتحكمتش في
غضبي!



25#

لما افكرت الدولفين صاحبي

الفترة اللي فاتت من حياتي كنت باحضر قعدات كثيرة أوي فيها مراجعة للتاريخ والرموز من معارف وأصدقاء، وعرفت منهم معلومات مخيفة هدمتلي رموز وشخصيات عامة كثيرة كنت باحترمهم، بس كل ده كان عادي، ما كانش فارق أوي، اللي أثر فيّ فعلاً كان الدولفين.

مؤخرًا اتفرجت على أفلام تسجيلية كثيرة عن الدرافيل، والحقيقة الأفلام دي هدمتلي أكبر رمز في حياتي.

موضوع إن الدولفين بيحب الإنسان وصديقه، كان أحد أسباب تمسكي بالأمل في الحياة، وأد إيه شيء جميل إن فيه كائن في البحر بيحبنا، وضهر وسند لنا في الميه، لكن اللي اكتشفته بعد مشاهدة الأفلام دي، كان أي حاجة تانية غير الحب والأمل، وبعيدًا عنهم تمامًا.

الدرافيل طلعت في الحقيقة (أغلبها) كائنات متحرشة جنسيًا و«Sexually aggressive»، وكانت فيه حالات كثيرة مسجلة، وعرضوها لدولفين بيحاول يغتصب غطاسين وسباحين، رجالة وستات، الاتنين، مش بيفرق معاه حتى، بتاع شهوة وخلاص! لما تعيش طفولتك وحياتك كلها مؤمن إن ليك صديق في البحر ممكن ينقذك من القروش والكائنات البحرية الشرسة، ويطلع في الآخر صديقك الوحيد ده مغتصب، وباي سيكشوال كمان، وطول الوقت ده كان بيدّعي إنه صاحبك لمجرد إنه مشتريك، طبقًا الموضوع ده كان كفيل إنه ينكد عليّ، ويفقدني الثقة في المجتمع عمومًا، والمجتمع البحري على الأخص! مفيش لحد دلوقتِ حالة مسجلة لدولفين بيغتصب بشر فعليًا، ما حصلش إيلاج يعني بمعنى أدق، بس في حالات كثيرة كاد أن يفعلها قبل ما يحصل تدخل وإنقاذ للضحية. والعلماء اللي شغالين على الموضوع - ومش عارف الحقيقة شغالين عليه إزاي؟! هل بيخلّوا ناس عريانة ملط تعدّي من قدام دولفين ويدرسوا رد فعله؟ - ما بيستبعدوش الموضوع خالص، وشايفين إنه فعليًا مش مستحيل، وممكن يحصل حالة اغتصاب كامل لبشر من دولفين!

عادي جدًّا، ممكن إنك تكون رايح البحر ولا بس مايوه، ونازل تعوم وسعيد وحاسس إنك إنت والبحر والطبيعة بقيتوا شيء واحد، وتحررت من قيود المدينة والزحام، وييجي فجأة

دولفين يركب عليك ويقعد يكارك، ويكسر عينيك قدام الكائنات
البحرية كلها، وتمشي مش عارف ترفع عينيك في كابورياية حتى،
اللي هي أصلاً عينيها راكبة بره بسلك خارجي عشان ما كانش
فيه مكان في وشها!

الموضوع مخيف جداً، ويمكن بعد فيلم «Jaws» فيه ناس
كثير راجعت موقفها من نزول البحر، وأنا شخصياً بعد موضوع
الدولفين المغتصب، هاراجع موقفي من البحر، و«ماجيك لاند».
أما على البر بقى، نفس الكلام ده وجدت إنه ينطبق على
الأصدقاء بصفة عامة، حرفياً أكثر واحد بتبقى فاكر إنه صاحبك،
بيطلع في النهاية هو أكثر واحد نفسه يغتصبك!
أنا الحقيقة كنت حمار كبير أوي، عشان كنت باقول على أي
حد إنه «صاحبي»!

الكلمة دي، أو اللقب ده يعني، ما ينفعش يصدر لشخص غير
بعد سنين طويلة من الوفاء والإخلاص!
كلمات زي «باحبه»، «باتق فيه»، «صاحبي»، «أخويا»...
خسرتني كثير!

صدّقني، اللي تفتكره موسى، يطلع حمدي الوزير!



27#

لما ركبت مع أحمد

ركبت من كام يوم مع إحدى شركات التوصيل (عشان
ما أبقاش باعلن عن شركة منها)، مع شاب ظريف وابن ناس
ومشغل مزيكا حلوة وعربيته كويسة ونضيفة.

أول ما ركبت عرفني، وسلّم عليّ، وعرفني بنفسه، وقال إن
اسمه أحمد، وقال «ارجع بقى»، و«فين البرنامج؟»، والكلام
ده كله، وعزم عليّ ببونبوني، ابتسمت وشكرته وقلته:
- شكراً، مليش فيه أوي.

بصلي كده، وسرح في وشي، وقال:

- طب نفسك في إيه؟

قالها بجد فشخ، مش اللي هيّ عزومة يعني وإفيه في وسط

الكلام!

من كتر ما قالها بجد، لقيت نفسي فعلاً فكرت شوية، وجه

في دماغني ١٠٠ حاجة، لحد ما افكرت.

بصيته، وقتله:

- بصراحة، نفسي من وأنا صغير أركب عربية، وأشاور على

عربية ثانية وأقول للي سايق: «ورا العربية دي».

ابتسملي ابتسامة جميلة، معناها: «بس كده؟»، وقاللي:

- سهلة، اخترلك عربية من دول.

وشاور على كل العربيات اللي في الشارع من خلال الزجاج

الأمامي.

فرحت جدًّا زي العيال الصغيرة، وابتسمت ابتسامة طفولية،

وشاورت على عربية عشوائية، وقتله:

- ورا العربية دي!

وأنا مش مصدق إن أحمد اللي قابلته بأكثر طريقة عشوائية

ممكنة، فجأة يحققلي حلم من أحلامي!

راح طالع وراها فعلاً وبسرعة، كأننا في مطاردة في فيلم أكشن

عربي سخيف من السبعينيات، وكان مرَّز جدًّا مع العربية، وإداني

إحساس الموضوع، وعيشني اللقطة فعلاً، وأنا مبسوط فسخ،

ومستمتع جدًّا، لحد ما ابتديت آخذ بالي إننا بنبعد عن وجهتي

تمامًا، والراجل الغلبان اللي إحنا كنا قاطرينه ده تقريبًا أخذ باله،

وابتدى يتوتر، ويبص في المرآة كل شوية، والعربية عومت منه

تعويمة بسيطة مرتين تلاتة.

ما كنتش حاسب إحساس الشخص اللي هيلاقني عربية

فجأة طلعت وراه، ما حسبتش وقع إنه يلاقني عربية متفيمة

ماشية وراه لحظة بلحظة، وحسيت إن الموضوع ابتدى يبوِّخ الحقيقة.

بصيت على وش أحمد، لقيته مستمتع، بس الابتسامة الجميلة اللي كانت على وشه ابتدت تتحول لابتسامة شريرة شوية، فابتديت أقلق أنا كمان بصراحة، وعلى أد ما كنت متردد بس قلت مبهدهاش، وطلبت منه بهدوء يشوبه الريبة وشيء من الخوف إننا نكمل على البيت، وقتله:

- كفاية كده خلاص بقى، وعشان الراجل الغلبان ده كمان زمان أعصابه في رجليه، وممكن جدًّا يكون هربان من حد ولا عليه تار ولا حاجة، وإحنا نشفنا ريق اللي خلفوه! استجمعت قوتي وقتله كفاية.

بصلي تاني كده، وسكت شوية، والابتسامة اختفت من على وشه، وحسيته اتضايق إنني فصلت اللحظة الجميلة اللي كانت ما بيننا، بس في ثانية رجع ابتسم تاني، وقالى بطريقة «creepy» جدًّا:

- يلاً، آديني هاشوف بيتك فين بقى!

وراح ضاحك ضحكة هيستيرية.

هنا بقى الخوف ابتدى ياخذ ليفيل تاني خالص، وابتديت أشخ على روعي سنَّة صغيرة، مش كثير يعني، سنَّة بس، وقررت في جزء من الثانية إنني ما ينفعش أروح وأورّيه بيتي الحقيقي فين باي شكل من الأشكال، وإنني هاعمل نفسي بصيت في الموبايل

وهاقوله وجهة ثانية خالص، قال يعني المشوار اللي كان عندي
اتلغى وهاضطر أروح بيتي بقى وكده.

عملت كده، وبصلي تاني وأنا باقوله، وحسيته مكذبني شوية،
بس رجعت ابتسم تاني وقال لي وهو بيهز راسه موافقةً:
- ماشي.

قالها بطريقة فيها حركة شفايف غريبة، شُفت من خلالها
كل سنانه!

الفترة الأخيرة من المشوار مرت عليّ مرور عصيب، تخللتها
أسئلة من أحمد زي: «إنت عايش لوحديك؟» «مش عايز تسافر؟».
وخالص بقى الرحلة اللي كان المفروض إنها ممتعة بقت مخيشة
تمامًا.

وصلنا عند بيتي الوهمي، «كنتاكي» الحصري، وحاولت
أنزل من غير ما ياخذ باله، بس لقيته مسكني من أيدي، وبصلي
بصة ثاقبة، وقال لي:

- معانا نمر بعض بقى ها؟

استجمعت قدرتي إني أبتسمله، وقلته بصوت مهزوز:

- ها!

وأنا باهز راسي موافقةً.

نزلت من العربية وأنا حاسس إن القدر بيعاقبني عشان الراجل
الغلبان اللي مشينا وراه وروّعناه ده، ولقيت أحمد لسه واقف!
قررت إني هادخل «كنتاكي» زيادة في التمويه، وعشان ياخذ

فرصته ويمشي، لقيته لسه واقف برضه، وعينه عليّ، فقررت إني
أطلب حاجة عشان ما يشكش فيّ، وجبة «سناك بوكس سبايسي»،
وعلى حظي الوسخ، الأوردر كان جاهز!

بصيت على الفراخ لقيت شكلها زي الخرا!

بصيت على أحمد لقيته لسه واقف!

هنا كنت قررت أستسلم لقدري خلاص.

قعدت آكل في التلّبك المعوي المقلي ده، وأحمد عينيه مش
بتتشال من عليّ، ومتابعني من ورا إزازين، إزاز كتناكي، وإزاز
عربيته!

مع كل قطعة مقززة، حسيت إني اتعلمت هنا درس كويس
أوي: مش كل حاجة بتتمناها وبتحلم بيها بتبقى حلوة زي ما إنت
فاكر، خصوصاً أحلام الطفولة، وخصوصاً مع أحمد. والشخص
اللي أنا غالباً تسببته في أزمة قلبية ده، وغالباً زمانه هوّ كمان
مستخبي في «هارديز» عباس العقاد ولأ حاجة، هاشيل ذنبه للأبد،
وطول ما هو حاسس بالتهديد، هافضل أنا حاسس بإسهال!



29#

لما صدقت

الحمد لله، القدر كريم معايا جدًّا في القصص اللي بتحصلي،
يعني مثلاً، النهارده نازل من اجتماع جدًّا، ركبت مع سائق
إحدى شركات التوصيل، وأول ما ركبت معاه سألتني:
- حضرتك مهندس؟

قلتله:

- مهندس كمبيوتر. إشمعني؟

قالني:

- أصل الـ«T» باينة في وشك!

خدت ثلاث أربع ثواني باجمع إنه بيهزّر وأنا باتفحص وشه،
رُشفت في ملامحه لحظة انتظار السوكسيه، ورُحت ضاحك.

بس، وعنهما بقى، ابتدينا رحلة قلش رهيبه بدأت من:

- ليه الصيدلي بنى عمارة؟

- عشان يسكّن الألم.

- وليه هدها؟

- عشان بنادول إكسترا.

مشوار مستمر من القلش، وأنا مسخسخ ومش مستوعب
اللي بيحصل، انتهاءً بـ:

- إيه أقدم حيوان في جنينة الحيوانات؟

- الحمار المخطّط، عشان أبيض وإسود.

- وإيه أجدد حيوان؟

- القنفذ، عشان لسه بشوكه.

وأنا ما زلت واقع في الكرسي من الضحك عشان فيه راجل
عنده ٦٠ سنة راكب «سيراتو» حمرا طلعلي من تحت الأرض
بيحاول يفك وشي الجّد، غير طبعاّ أدائه الواثق في نفسه ثقة
متناهية وكأنه بيرمي جواهر، وهوّ مبسوط، وأنا مبسوط ونازل
مسخسخ من العربية وسعيد!

بس طبعاّ مش دي القصة، القصة كانت في حد ثاني خالص.
عادةً لما بالاقى حد شكله مش اختياره الأول إنه يسوق بانكشه،
وأحب أسمع منه قصته، خصوصاً بعد موضوع شركات التوصيل ده.
سواقين التاكسي زمان كانوا بيتفننوا في تأليف قصص درامية
تقطع قلب هتلر، عشان تزودله في الأجرة، أو تسيبله باقي
العشرين. بعد موضوع الشركات وتحديد الأجرة والخدمة، بقوا
بيقدروا يبقوا على طبيعتهم أكثر، زي الكوميديان بتاع الصبح.
الراجل كان شكله محترم، لابس نضارة دقيقة، تحس إنه

بيشوف بيها أخبار بكرة، وكاب منزله على وشه، كأنه بيحاول
يتنكر من مراية الصالون نفسها.

أثار فضولي واهتمامي، رُحت ناكشه على طول، وأنا في
النكش ما أقولكش.

الكلام جاب بعضه، وحقالي إنه مهندس شبكات، عنده
٤٢ سنة، شخصية عادية حتى الآن، بس الإفيه الحقيقي كان
في ماضيه، والخبر نزل عليّ كالصاعقة بعد كلام كثير جاب
بعضه، لما قالي إنه كان من «عبدة الشيطان»، الساتانيكس بتوع
«ماكدونالدز» الميرغني في التسعينيات دول في وقت هوجة
الحوار ده، وهو ما كانش بيعبد الشيطان شخصياً، بس كان
بيسمع ميتال، وعایش الحالة، وبيتقابلوا عند ماك وكده، وبصيته
بتفحص الحقيقة، وسرحت كده شوية.

الراجل ده كان في وقت من الأوقات شايف نفسه منتمي
لمجموعة كول وروشة، وبيسمع مزيكأنص اللي عاملينها مضطربين
نفسياً، ومصدقها، وعایش لحظته، ومؤمن إنه جزء من حاجة كبيرة،
والنهارده فيه واحد قاعد جنبه بيقوله يمين في شمال اللي جاي.

النزلة من التيشيرات السودا والهيد بانجينج والشعر الطويل،
إلى «تحب أشغل التكييف؟»، كانت ثقيلة عليّ شوية.

ابتديت أراجع نفسي: هو الصبح إني أعيش اللحظة وأصدقها،
ولأ فيه هبل ما يتصدقش تحت أي ظرف؟

* * *

فيه ثلاث قصص مهمين بيتفتحوا في دماغي أوي لما باسأل نفسي السؤال ده.

أول قصة بدايتها كالتالي:

«هاعملك فيزا خطوبة، وهتيجي وهتعلم وتشتغل،
والتعليم ببلاش، والشغل على قفا من يشيل،
وهيبييه هتبقى ميغة يا إتش».

دي كانت صاحبتى الأمريكية البلغارية، اللي قابلتها على الإنترنت وأنا بانزل أغنية عربي من على سوفت وير اسمه «Kazaa»، قبل الـ «Torrent» والحاجات دي، كنت بانزل من عليه كل حاجة، أفلام، برامج، أغاني، سكس، كان بمثابة «سيتي ستارز» للترفيه على الإنترنت، وكانت هيّ الوحيدة اللي ما داستش «Cancel upload». أوبشان كان كل الناس، والمصريين على الأخص في الوقت ده، بيستخدموه، بسبب ضعف الإنترنت مش أكثر.

استجمعت كل قوتي الفليرتية، وابتديت أتكلم معاها، وفي خلال أسبوعين كانت في القاهرة.

«أراميكس» و«فيديكس» ما بيشحنوش بالسرعة دي.

قعدت في مصر أسبوعين، فسّحتها، ركبّتها كل حاجة ممكن تركيبها، الحنطور والهرم وأبو الهول وأنا شخصياً وكل حاجة، كانت أول علاقة كاملة في حياتي، وهيّ حبتني لدرجة إنها قررت إنني لازم أروحها أمريكا، كانت عايزة تشحني، على كمان شوية

لعب في دماغني، وتقولي التعليم ببلاش، والمواصلات ببلاش،
وكلنا عايشين في قصور وفلل هنا.

أنا صدقت زي المغفل، ما كنتش رُحت أمريكا قبل كده،
ولا حد من قرابي من الدرجة الأولى، وما أعرفش أي حاجة
عنها غير إن كان فيه أتوبيس عليه قنبلة و«كيانو ريفز» وقفه في
الوقت المناسب.

تحمّست جدًّا، وحسيت إن ممكن يكون فيه مكان في العالم
البحر فعلاً فيه طحينه، ومشيت في الورق والإجراءات، وأجّلت
جامعتي تيرم كامل مع اعتراض أهلي طبعًا، بس كان عندهم حتة
أمل إنني أبقي حاجة كبيرة. ركبت الطائرة وأنا حاسس إنني مقبل
على مرحلة تاريخية وحياة أجمل بكثير.

رُحت طبعًا لقيت مفيش الكلام ده يا معلم، الجامعة كانت
بعشرين ألف دولار، والشغل، اشتغلت عامل نظافة في محل
لملابس الأفارقة الأمريكيين كبار الحجم في هارلم، لسبب
ما حجمهم بيكون أكبر من العادي، فعندهم محلات وخطوط
أزياء لو حدهم اسمها «Big and Tall» بسم الله ما شاء الله، ولك
أن تتخيل حجم المحل بقى، فقصة النظافة كانت مرهقة فشخ.
اللي ما يعرفش هارلم بقى، فهي أفريقيا الصغيرة في أمريكا،
بكل مشتملات أفريقيا، ميكس كده، محلات على مواطنين،
على عصابات نيجيريين، على قراصنة صوماليين، على ناس
طيبين وغلابة وفنانين مجهولين لقوا نفسهم في أمريكا بدون

تعليم أو فرصة حقيقية، ومرميين أغلبهم في الشوارع بيسموكوا
ويد أو بيطلوا على علب بلاستيك أو الاتنين، وفيه الهومبليس
اللي مرمي في الشارع ببطانية، وفيه اللي اتجنن وماشي بيزعق
في كائنات لا تُرى بالعين المجردة، وفيه وفيه... قصة يعني.
البتت بقي طلعت ساكنة في إحدى مناطق بروكلين مع أهلها،
مش بعيدة أوي عن هارلم، بتنقسم أحياء: العرب، اليهود، الروس،
وهكذا. وإحنا المفروض هنقعد معاهم لحد ما نظبط حالنا.
أبوها كان عامل نظافة، زميل يعني، وما كانش عندي مشكلة مع
ده خالص، بس كان عندي مشكلة إنه كان بيسرق من المحلات
اللي بينصفها، وييجي يوريني عادي، اللي هو شفت سرقت إيه
النهارده؟ وأنا أبصله بابتسامة فخر مزيف وأقوله «برافو» وكده.
كنت خدت صدمة رهيبة طبعًا، وقفشت وقتلتها «إنت
ضحكت عليّ» وكده، وهي كانت بتحاول تصبرني، وأنا قلت
معلش، وإحنا في أمريكا، والحياة صعبة، والتعليم طلع بعشرين
ألف دولار «يا بنت التيت يا كدابة!» والراجل سايبني أنام في
أوضة بنته، والسرير بتاعنا بيخبط عنده في الحيطه، وسامع
صوتها وهي فيه حد بيستجوبها جوه استجواب عنيف، وساكت،
وبيقابلني وأنا خارج من الأوضة بالبوكسر بالليل رايح الحمّام،
وهو لسه خارج من الحمّام، وبنقف قدام بعض في لحظة
«awkward» جدًا، وساكت، وكان دايمًا بيصلي بصة اللي هي
أنا مش عارف هو عايز يقتلني ولأ ينام معايا! المشكلة كمان إنه

كان عنده شنب عريض فشخ، شنب فلاحين بلغاريا الأصليين، شنب في حجم نسر بالغ، ممكن يقرر في أي لحظة يفك من على بقة ويحلق ويطير بعيدًا بكل حرية، والشنب ده بالإضافة لكل اللي كان بيحصل كان شيء «confusing» جدًا. بس المهم إنه كان مستحملني، وكلهم كانوا شايليني فوق راسهم الحقيقة، ووروني الكرم البلغاري الأصيل.

قلت معلش، هاكل خرا وهاكمل حياتي، أنا حمّال أسية بطبعي، وهاستحمل تحرشات إخواني الأفارقة الجمال وأنا رايح وراجع من الشغل، ومحاولات تقليبي من فلوسي أو الساعة أو أي حاجة، مش مشكلة، إحنا أفارقة زي بعض لو مش هنشيل بعض مين هيشيلنا!

ابتديت أترقى في الشغل في وقت سريع، وأبقى سيلز بدل نضافة، وأبيع وأطلع فلوس زيادة وكده، وافتكرت إن الدنيا هتتطور. لحد ما قابلت «أندريا»، مش بتاع الفراخ للأسف، ده كان الإكس بتاع صديقتي، بلغاري هو كمان، نفس فكرة الشحات مبروك بس متوزع على مساحة أكبر، أعتقد مساحته كانت ثلاثة في أربعة متر، كان داخل البيت ساعة الغدا، وماشي بالتصوير البطيء، هو لو حده، كل حاجة حوالي كانت ماشية بسرعتها الطبيعية، كان أوضة متوسطة الحجم لو حده، وأهلها طبعًا بيحبوه أوي وعازين يصلحوهم على بعض عشان متربي على العادات والتقاليد البلغارية الخالصة، ولسه راجع من بلغاريا كمان، يعني

فيه ريحة الأرض الطيبة، عشان كده ما كنتش قابلته لحد وقتها.
وبس بقى، أهلها بيحبوه يتغدى معانا كل يوم، ويتعشى معانا،
ويقعدوا بعد العشا يفكروه هوّ والبنت بذكرياتهم مع بعض،
وأنا قاعد في وسطهم باجز على سناني كل ما تفصيلا حميمة
تتقال، ولو جدع أفتح بّقي، ما هيّ الحرية اللي مقعداني عندهم
في البيت في أوضة بنتهم، هيّ نفس الحرية اللي هتقعدني كل
يوم وشي في وش «أندريا» الدر فيل ده!

هيّ ما كانتش بتحبه ولا طايقاه، وكانت بتحبني، بس مش
قادرة تفتح بّقها برضه، عشان إحنا قاعدين مع أهلها وما بندفعش
إيجار، بالعكس، هيّ كانت بتحاول تريحني وبتدور على بيت
نأجره سوا لوحدينا.

فضلت أترقى في الشغل بسرعة لحد ما بقيت مدير تنسيق
مع الفروع، وكنت شاطر، بس ما كنتش مبسوط، والضغوط
كانت بتزيد، والبنت بتزن عشان نعزل، وأنا لسه معيش فلوس
كفاية عشان بنخلصها أول بأول، وأبوها وأمها ابتدوا يقلبوا
مصريين ويلقّحوا كلام، زائد ساعات الشغل الطويلة، زائد
تحرّش إخواتي الأفارقة اللي كان أوفر بصراحة، زائد «أندريا»
الحلوف ده كمان، ومش طايق نفسي، وفلوسي وقعت مني،
وأهلي واحشيني، ومصر واحشاني، وكل ده والمفروض أحافظ
على أدائي مع البنت، ما أنا بالعب باسم مصر برضه، فانفجرت
انفجار واحد عنده ١٩ سنة، فجأة لقي نفسه مطلوب منه يكافح

في أمريكا ويبقى حاجة كبيرة، وينسى شهادته في مصر، ويبقى
«رون جيريمي» في أوضة النوم.

اتخانقنا، ولميت هدومي في شنطتي بدون أي وجهة،
ومشيت، فضلت هائم على وجهي في عربيات مترو الأنفاق،
أفكر شوية، وأنام شوية مستنداً على الشنطة علشان محدش
ياخدها مني. وقعدت عند أجدع صاحب وأخويا الكبير اللي
أكله كل الحب والعرفان بالجميل، محمد جاد، اللي كان بينام
على الأرض وينيمني على سريره، ونقلت من عنده لكنبة في بيت
فتحي وصفوت، مصريين أربعيني السن في ذلك الوقت، وكانوا
هاجروا لأمريكا من زمان لأسباب تتكتب في فيلمين منفصلين،
لحد ما قررت الرحيل بعدها بفترة قصيرة.

قررت أرجع وأخذ شهادتي وأبقى بني آدم طبيعي وأكمل
في بلدي، وفي نفس الوقت أحمي نفسي من تحرش إخواني
الأفارقة اللي ما زلت شايفه كان أوفر بصراحة!

حاولت تصلح معايا لما عرفت إني راجع، بس كنت خلاص
خدت القرار.

الغريب إني وأنا ماشي انهالت عليّ عروض الشغل بمرتبات
خرافية، وفي أماكن كلها ليها احترامها، بس برضه كنت خدت
القرار.

كان صعب في الوقت ده بالظروف دي!

* * *

القصة الثانية كالتالي:

«هنعدي عليك دلوقتِ بإذن الرحمن، خد دش كده
وانوي نية الوضوء على ما نكون جينا».

قالها من الجامعة صديقي الملتزم دينياً، زغلول، وهو في
الطريق لبيتي في عربية سكودا فابيا أخضر غامق، وفيها ثلاث
إخوة آخرين ملتحين غير زغلول.

كنا رايعين درس للشيخ محمد حسين يعقوب في أحد
مساجد السيدة عائشة، أنا قاعد ورا في النص كأنهم بيأمنوا إني
ما أهر بش.

لما رجعت من أمريكا كملت دراستي في الجامعة بطريقة
طبيعية، بس كان باين عليّ أوي إني تايه شوية، مریت بحاجات
كثيرة في سن صغيرة، وحاسس بشوية ارتباك، شوية حزن، شوية
وجع قلب! حاسس بالوحدة عشان صحابي سبقوني بتيرم وبقيت
مع الدفعة الأصغر! حاسس بشوية ألم عشان خسرت قصتين حب
في أقل من ٦ شهور، واحدة في الجامعة، وواحدة في أمريكا!
كنت باحاول أتفادي حبي القديم وأصدقاءها، وواحد جنب
في الجامعة، بعد ما كنت في إحدى أهم مجموعات الجامعة اللي
محبوبين ودمهم خفيف.

أصدقائي المقربين في الجامعة كانوا في بداية الطريق للإدمان،
والباقي بيستكشفوا حياتهم خارج نطاق الصداقة مع أصدقاء
جدد.

«متخبط»، هي الكلمة الأصح.

وقتها كنت فريسة سهلة لقوات التدين السريع.

مجموعات ينتشروا في أي جامعة طول الوقت، ييحاولوا يكبروا حجمهم وعددهم، وييدوروا طول الوقت بعين متفحصة للغاية على واحد زبي كده، وفي ظروف.

الموضوع ابتدى تدريجي جدًّا، أول حاجة بيعملوها كانوا بيقدوا معاك لما يلاقوك قاعد لوحدك، يتقربوا منك، يرفعوا من معنوياتك، تعارف لذيذ ومدروس كويس.

يبتدوا بعدها ياخدوا خطوة بسيطة:

- تعالى صلي معانا الضهر في مسجد الجامعة، تعالى، هترتاح. أي حد زبي، في وقت زي ده، كل اللي بيبقى بيدور عليه إنه يرتاح، فبتصدق غصب عنك، وبتسمع اسم ربنا بتحس بارتياح غصب عنك.

ابتديت أروح، وأنتظم في الصلاة وفي مواعيدها، لدرجة إنني بسرعة بقيت الإمام في المسجد في أوقات كثيرة، وأول واحد بيروح، وبيأذن كمان.

لحد دلوقتٍ حلو، مفيش مشاكل، بس ده وقت الخطوة اللي بعدها:

- تعالى نحضر درس مع بعض، هترتاح وتستفيد.

إنت بتكون روك المعنوية عالية شوية، جزء من مجموعة، بيعاملوك كويس، بيعسسوك بأهمية إنت مفتقدها، فبتروح.

برضه الدروس بتكون مدروسة كويس أوي، الشيوخ بيكونوا عارفين إن الشباب هيجيبوا معاهم مستجدين، وغالبًا هم اللي قالوا للشباب حاولوا تجيبوا ناس جديدة معاكو، فيبتدوا دايماً بدروس خفيفة، حاجات سهلة: لماذا لا تصلي، الصيام، العبادات. تمام، لحد دلوقتٍ مفيش مشاكل برضه غير المشكلة الأساسية، كره وسب الديانات الأخرى وتصنيفهم كأنجاس، ورفع قيمة الانتماء للإسلام بشكل غير منطقي، بشكل مرضي، بشكل بيربي غرور واستحقار للآخرين عند شباب لا يزيد عمره عن ٢٠ أو ٢١ سنة، بشكل يخلِّك مع الوقت تلغي آدميتهم وتشعر بالرضا عن أذيتهم.

الدرس الثاني دايماً بقى بيكون: أطلقوا اللحية. طبعًا ده كان قبل ما الدقن تبقى موضوعة، والعالم كله يكتشف إن الراجل من غير دقن بيبقى شكله طفل حديث الولادة.

بعد الدرس الثالث تقريبًا، كان بقى لينا مسجد معين بنتقابل فيه، «الإخوة» يعني، بنتجمع كلنا، شباب من مختلف أطراف المجتمع وطبقاته، وكلهم صغار السن، بس لابسين جلابيب بيضا وطاقية، ودقونهم في طول دقن ياسر جلال على آخر حلقة من «رحيم» مثلاً. في الوقت ده بيبتدوا يعملولك ربط بشخص، تسميه بقى شيخ، تسميه أمير، هوّ يعني بيدورّ الليلة من الآخر، ويبقى مسؤول عنك وبتسمع كلامه.

قعدة في الثانية في الثالثة، كلها بعد صلاة العشاء، بيكون

ابتدى يطلب طلبات، تبدأ بسيطة برضه ومدروسة ومحبية للنفس،
وبتزيد تدريجياً. وكنت سلفي من غير ما آخذ بالي.
في الوقت ده، كان كل أهلي بيحاولوا يحذروني من الانتماء
لمجموعة زي دي، وخصوصاً أبويا الله يرحمه، كان بيقولني
دول هيبوظولك علاقتك بربنا.
وقد كان.

بعد مجموعة معينة من الدروس، كانت جرعات الكره بتزيد،
بتزيد لدرجة إنني قاعد في الدرس حاسس بتقل على صدري وأنا
باسمع شتيمة واحد مسيحي ولأ واحد يهودي ولأ بوذي حتى.
ليه نبقى قاعدين في بيت ربنا اللي خلق الناس كلها، اللي
بيحب الناس كلها، بنشتم ناس وبنكرههم؟

حسيت بحاجة غلط، أو حاجات يعني، وعلى آخر درس
حضرته كنت قفلت من هذا الكم من الحَقن المدروس للكرهية،
اللي كان طول عمري بالنسبة ليّ عكس مبدأ الإسلام نفسه:
تسليم الأمر لله، والتسامح، والعيش في سلام مع الكوكب كله.
بعد الدرس ده اتطلبنا في قعدة مع الأمير، برنس المجموعة،
وقعدنا قدامه، وكان بيتكلم بجدية شديدة، وقالنا:

- النهارده، هنشتغل على مهمة في غاية الخطورة.

أنا سمعت الكلمة دي، ورُحِت قايم من مكاني بكل هدوء،
وبكل عادل إمامية قتلهم:
- يلاً سلامو عليكم أنا بقى.

ما شفتهمش تاني، لسبب إني ما كنتش عايز أشوفهم، ولسبب
آخر هوّ إنهم كلهم اتشدوا على أمن الدولة بعدها بأربع أيام
تقريبًا، في ضبطية كانت تعتبر إنها منعت حاجة معينة بالنسبة
للدولة، أيّا كانت بقى.

وقتها حلقت دقني، وحسيت إني قرفان من الدين ومن
الإسلام كله بكل صراحة، وقعدت تقريبًا سنة منقطع عن أي
حاجة ليها علاقة برينا!

كنت حاسس إني اتخدعت في الإسلام، ومش حابب أنتمي
ليه، بسببهم!

بس رجعت بطريقتي الحمد لله.

* * *

القصة الثالثة والأخيرة هتكون غريبة شوية، بس عشان

هاحاول ما اتكلمش كتير على صفحة اتقفلت في حياتي:

«امضي وما تفلقش، العقد ده هيترمي في الدرج

أصلاً محدش بيستخدمه».

لما بتكون جديد على وسط معين، وشاطر وموهوب بعض

الشيء، بتكون العين عليك.

العين دي بقى ممكن تكون عين شخص معجب بيك، شخص

يحب يشتغل معاك، شخص عايزك تساعد في إنه يوصل لبداية

الطريق هوّ كمان. وممكن برضه تكون عين شخص ممكن يعمل

أي حاجة عشان الفلوس، أو عشان الشهرة، أو عشان الاتنين.

أي حاجة في الوسط الفني بتمشي بعقود، وده العادي في أي
حثة، بس مقدار لهفة الشخص اللي قدامك إنه يمضيك على عقد
هو شيء دائماً وأبداً بيدل على حاجتين: هو شايفك شاطر أد إيه،
وشايف يقدر يطلع منك فلوس أد إيه.

في وقت ما في حياتي ما كنتش فاهم موضوع الלהفة ده،
وما كنتش فاهم موضوع العقود، المرّة الوحيدة اللي قابلت فيها
محامي كان عشان أتجوز واحدة روسية مش أكثر! وما كنتش
فاهم بالتحديد يعني إيه شرط جزائي، كل اللي أعرفه عنه كان
من الشخص اللي بيضمّيني، ووفقاً لكلامه، الشرط الجزائي ده
«بند صوري»، لازم يتحط في أي عقد، ولا يستخدم بتاتا.

أنا زي العبيط، صدّقت!

ده جزء.

جزء ثاني بقى...

الشغلانة دي علاقات، ومش علاقات بالمعنى العادي، هي
فكرة مين هيقول إيه على مين لمين.

كيف تتحكم في مستقبل شخص بإنك تقول عنه حاجة،
سواء صح أو غلط.

إزاي؟

عشان الناس بتحب الكلام، الموضوع زي فيلم «إينسييشان»
كده، ممكن تزرع أي فكرة عن أي حد بمجرد جملة بسيطة تقولها
لحد معين في مكان معين. وتكون ابتديت سلسلة من الحديث

اللانهائي اللي بيتهي في الآخر بعد اللفة الكاملة للكلام، وكأنه كلام مبني على حقائق مثبتة. بالإضافة طبعاً للتجويد، والإضافات والتحايش، وكل واحد يحط التاتش بتاعه، والسلب عادة بيتنشر أكثر من الإيجاب.

إنت ممكن لو باني صورة معينة قدام الناس، حتى لو مش حقيقية، وراسم رسمة معينة، وعامل نمرة معينة، الناس تسمعلك، وتصدق إنت بتقول إيه عن شخص، قد يكون - وفي الأغلب - بعيد كل البعد عن كلامك. بس هو للأسف، أسلوب بيستخدم في تصفية الحسابات، حتى لو الحسابات دي ظالمة. بعد سنين طويلة من التفكير ومحاولات الفهم المستميتة، نجحت الحمد لله في إني أتخلص من حاجات كثيرة، منها الجزئين اللي فوق.

* * *

بعد التلات قصص دول، مضطر أرجع للسؤال الأساسي: هو الصبح إني أعيش اللحظة وأصدقها، ولا فيه هبل ما يتصدقش تحت أي ظرف؟
الفكرة إني فعلاً كنت حمار في حاجات كثيرة، بس لما حسيت إني حمار، وقفت مع نفسي!
كل مرة خسرت فيها في حياتي كانت بسبب إني صدقت!
صدقت حد، صدقت كلامه، أو وعوده، أو حتى صدقت رأيه في!

صدّقت!

مش عشان غبي، مش عشان عنيد، مش بسبب جهل، مش
أي صفة وحشة، عشان بس، صدّقت!
يعني تصدّق اللي يقولك «باحبك»، واللي يقولك «أنا خايف
على مصلحتك»، أو «هتاخذ فلوسك»، أو «امضي هنا»، وحتى
اللي يقولك «أنا حاسس بيك».

مصطلح «الأولد دوج» أو «الكلب العجوز»، ده مصطلح
عظيم جدًّا لأسباب كثيرة أوي، أولها إني لما باروح سينا باتفرج
على كلب جميل اسمه «بوي».

«بوي» ده لما تشوفه بتشوف على وشه ندبات كثيرة أوي،
الجروح بتاعة كل معركة دخلها، وبتشوف على وشه هدوء
عجيب حتى في الوقت اللي كل الكلاب بتعوي فيه بشدة وعنف
ويبدو عليها التوتر، ولو حبيت أقوم وأشوف إيه اللي بيحصل،
«بوي» بيقف مكانه، ويقف في طريقي، وكأنه بيمنعني، أو بيقوللي
«وفر مجهودك».

«بوي» عارف كويس أوي إيه المعارك اللي يدخلها ويخرج
منها منتصر وبطل ومبسوط بنفسه، والمعارك اللي ما يدخلهاش
أصلاً لأنها هتبقى خسرانة من قبل ما يدخلها. بس المعركة اللي
بيدخلها، لما بيقوم من مكانه فعلاً، كله بيجري، كله بيبقى عارف
إن «بوي» هياكله بسنانه ومش هيرحمه، عشان عارف إنه هيكسب
المعركة دي، عن خبرة.

«بوي» ما بيدخلش معارك كبرياء، عشان الطريقة الوحيدة إنك تكسبها إنك ما تدخلهاش أصلاً، إنك ما تكونش محتاج تثبت حاجة لنفسك ولا لحد، خصوصاً لو أثبتها قبل كده.

كل جرح على وش «بوي»، هو مجرد توسع في قاعدة بياناته، وما يعيبوش أي جرح فيهم، بالعكس، بتحترمه، لما بتشوفه بتحبه، وبترتاحله، وبتطمئنه، عشان مع كل الجروح دي، عينيه باين فيها حاجة جميلة، باين إنه مش عايز حد غيره يتعرض لأي جرح من اللي شافهم. حاجة كده شبيهة بنظرة عادل إمام وهو بيحيي جمهوره في أول أي مسرحية.

لما حد يأذيك، هيصعب عليك، هيصعب عليك فكرة إنه لسه محبوس جوه نفسه ومش قادر يخرج. مش عايز أقولك ما تصدقش، صدّق.

مش عايز أقولك خليك متحسب لحالة إن اللي قدامك بيكذب عليك، هتتعب وتبذل طاقة ومجهود كثير إنت أولى بيه. كل اللي ممكن أقولها لك إنني بعد عمر كامل من اللبس في الحيط بسبب إنني صدّقت، هافضل أصدّق برضه، حتى لو كنت حمار لما صدّقت!

عشان ربنا بقى بيعتلي في حياتي اللي يستحقوا إنني أصدقهم، بيعتلي اللي خلّاني فوق أي حد ظلمني، بس كان لازم أتعلم! عشان يمكن هاساعد حد تاني، أو كذا حد.

31#

لما خُفت من الوحدة

في فترة صغيرة الحمد لله، وصلت لقدر لا بأس به من الشهرة في حياتي، وقليلًا ما كنت أعرف أن الشهرة سلاح ذو عضوين ذكريين، هتهرب من واحد فيهم هتلاقي الثاني في وشك، حرفيًا. بس شفت بعيني محدش قالي.

أنا مش إني شايف نفسي مشهور وكده، أو مدّي لنفسي حجم أكبر من حجمي، لكن باتكلم على الجزء المحدود من الشهرة اللي «تمتعت» بيه، و«تمتعت» دي مبالغة الحقيقة.

بس اللي شفته من الشهرة بقى يا باشا، زي ما هي حلوة ولذوذة وبتخلّي الناس عارفاك وبتحبك وبتسلم عليك وتتصور معاك، وأحيانًا يدولك حاجات ببلاش، ويساعدوك بدون مقابل، بل في أحيان تتخطى طوابير رمزية كتيرة، زي برضه ما هي بتفتح عليك أبواب جهنم، ودي بقى مش مبالغة.

أول باب فيهم هو إنك مش هتقدر تطلع اللي جواك. بمجرد إنك تحولت لشخص معروف وله صورة معينة، إنت بتبقى مضطر إنك تحافظ عليها بغض النظر عن أي شيء.

لما بتبتدي تتعرف شوية، فيه ناس كتير بيحبوك، بس مش عشان شخصك، عشان نسخة موازية منك، حالة مؤقتة منك، مود معين، مش النسخة الـ ٢٤ ساعة. عايزينك إنت اللي شافوه وعجبهم، بغض النظر عن حالتك النفسية، والظروف اللي بتمر بيها، بغض النظر عن إنك إنسان! وخصوصًا لو ربنا أنعم عليك بنعمة إنك تقدر تضحك الناس، وهي نعمة فعلاً، وكبيرة أوي، بس نعمة ثقيلة عشان الناس بيبقى دايمًا عندهم توقعات عنك، راسمين ليك صورة في دماغهم: «يلاً ننزل معاه».

«ده أكيد في الخروج هيسيرية ضحك».

«ده أكيد في السفر كريمة ضحك».

«ده أكيد في المشاوير الطويلة كنتلوبة ضحك».

ممکن يكون العادي بتاعك فعلاً إنك شخص ترفيهي للآخرين، بس مش دايمًا، مستحيل، الحياة ثقيلة على أي إنسان في الدنيا، وأتقل زيادة شوية لو مُطالب إنك تكون شخص ترفيهي وبتضحك الناس طول الوقت!

ممکن تبقى بتمر بوقت صعب، والناس عايزة تنزل معاك، ويلاً قول حاجات بتضحك.

حاضر، بس اصبروا عليّ شوية، أنا لسه مطلق الأسبوع اللي فات يا ولاد الجزمة!

إديني وقتي وهافشحك ضحك، هاخليك تطرط على روحك من الضحك، مش طرطرة كاملة يعني، النقطين الصغيرين بتوع الضحك والزغزغة دول.

بس أقوم بس، إديني فرصة أنزل وأخرج، لنفسي مش ليك، يمكن أنا اللي عايز أنبسط، مش نازل أبسطك! ممكن تبقى بتمر بأي حاجة في الدنيا، ومجبر إنك تكون الصورة اللي حبوك عشانها.

ممكن تزعل ناس حتى عشان مخنوق وفضفضت بكلمتين على الإنترنت، عشان مش عايز تتكلم مع حد، أو ناس كثير آذوك في فترة صغيرة فما بقيتش واثق في حد.

الناس جزء كبير منهم عادة ما بيرحمش، سواء على الإنترنت أو في الحقيقة، لعدم تفهمهم مش أكثر، مش شر فيهم، بس يمكن ظروفيهم بتخليهم في مود مش حلو أغلب الوقت، وخصوصاً على الإنترنت، عشان الإنترنت في الأساس ملجأ ومهرب لناس كثير مش مبسوطين!

بتتعامل مع كل الحالات النفسية السوية وغير السوية: نزلت صورتك مبسوط، فإنت مبسوط وأنا لأ، ربنا ياخذك! نزلت صورتك متضايق، فإيه ده، إنت بتمثل؟ إنت ما ينفعش تبقى متضايق!

الناس على الإنترنت بتعيش على أطراف مشاعرها، وبتحكم على أطراف مشاعر الآخرين، أحكام سطحية جدًا، قليل أوي اللي هيكون فاهم وإحساسه عالي، قليل أوي اللي هيشوف صورة منزلها مطربة ولّا فنان ويقول إن يمكن دي لحظة السعادة الوحيدة اللي شافها من فترة وبيحاول يسجلها، أو يمكن بيتظاهر بالسعادة يمكن يصدق تظاهره في الآخر، أو يمكن حتى بيحاول ينشر طاقة إيجابية عشان مش حابب الناس كلها تبقى متضايقة زيه... قليل أوي!

في مرّة من المرّات كانت فيه بنت ما أعرفهاش، خارجة مع مجموعة معارف كنت نازل أقابلهم، وكان انطباعها عني اللي حرصت إنها توصلهولي إنني باضحك، بس مش كثير زي البرنامج. والكلام ده كان في وقت كنت لسه منفصل عن حب كبير، وسايب شغلي ومفلس، وكنت نازل عشاني مش عشان حد، عايز أخرج وأفك عن نفسي، وفي نفس الوقت كبريائي مخلياني محافظ على «Balanced upfront» قدام الناس، بس هيّ بكلامها حسستني إنني المفروض أطلع على التراييزة وأتحزم وأرقص وأرمي إفيهاش، أو أفرق بيرة وجوبات مثلاً.

فعلياً في أوقات عملتها برضه إرضاء للبعض، الرقص مش البيرة يعني، جيت على نفسي حرفياً عشان الناس، وحرفياً رقصت وأنا في عز أزومات شديدة تهدرجال يعني، وكنت اللي هوّ مبتسم

من بره وبابكي من جوه، من بره بارقص على ألحان مزمار
عبد السلام، ومن جوه باعيط على ألحان «أنا باتقطع من جوايا».
يمكن عرفت أطلع المودده في سكتش في برنامج آخر الليل
كان بيتكلم عن الزفة اللي بتقابلك في الطريق وإنه رايح لأبوك
في المستشفى.

غير كل ده بقى، في حفلة تانية أصلاً، كل ما تكون معروف
كل ما هتقابل حاجات تانية كثيرة، وخصوصاً المخدرات اللي
هتلاقيها بتتحذف عليك من كل حته، وفيه أوقات، سوري
يعني، بتتحط في بُقك، أو في المشروب بتاعك كنوع من
«السربرايز» اللذيذة، في حين إنها مش لذيدة خالص، مش
مفاجأة حلوة إنني أروح بيتنا الفجر وألاقي نفسي عايز أسمع
مزيكا بصوت عالي، وأحضن الكنبه أربع ساعات، وأحاول
أبوسها من رقبتها!

إنه متخيل صعوبة إنك تلاقي رقبة الكنبه؟ بس لقيتها برضه،
أنا مش سهل يعني!

إنه أكون معروف دي نعمة كبيرة باحمد ربنا عليها كل يوم،
بس فيه جزء منها فيلم أوفر كده مبالغ فيه، وبتحافظ عليه بس
عشان توقعات الناس، عشان دي شغلتك وأكل عيشك، عشان
لازم تحافظ على صورتك وتحافظ على الناس اللي بتحبك
وبتحب شغلك.

خدت وقت عشان أفهم إن المتفرج ده مش مهم أوي بالنسبة

له، عندك مشاكل عاطفية ولاً مادية ولاً فنية ولاً اجتماعية ولاً قانونية حتى، هوّ اشترى صورة معينة وعازيها، ونوعاً ما حقه. وده ممكن يفهمك ليه الفنانين والممثلين والمطربين دول مش دائماً جزء من المجتمع أوي، مش بيخرجوا كثير، ولا بتشوفهم كثير، مش بتخبط فيهم على طول. ده بسبب إن أغلبهم بيتبع أسلوب اللجوء إلى الوحدة.

بتوصل لمرحلة: خلاص، أنا مش قادر أتعامل مع كل ده، وهاقلل حجم الحاجات اللي محتاج أتعامل معاها، مش عايز أشوف ناس عشان خلاص بقوا عبء، ومش طالبة أي عبوئية بصراحة!

شوية الطاقة اللي عندي يا دوبك أتعامل بيهم مع مشاكلي.
شوية الطاقة اللي معايا يا دوبك يمشوني.

والوحدة بتبقى فرصة هائلة، إن كل حاجة فكرت فيها ولو مرّة وما حسمتهاش مع نفسك بتقعد تفكر فيها مراراً وتكراراً، بتقعد تعيد كل مشهد شكّيت فيه مرّة واتنين وألف، ومن الزاوية دي ومن الزاوية العكسية ومن كل الزوايا، يعني تقدر تقول كده، الوحدة زي الـ «VAR» في الكورة.

بترجع للفيديو، وتتفرج كده على كل حاجة بالتصوير البطيء، وتقعد تستفّ كل حاجة، واحدة واحدة، عشان ما كنتش لاحق، عشان الشغل ساحبك، عشان مسحول في علاقة مش ناجحة، عشان بتحاول ترضي الناس، عشان بتحاول تحافظ على كل

حاجة في نفس الوقت، زي السيرك زمان كده، كان فيه واحد
بيطلع بأطباق كثيرة ويلف كل طبق فيها على عصاية رفيعة، وطول
الوقت رايح جاي بيلف الأطباق دي عشان تفضل فوق العصاية
وما تقعش. هيجيلك مرحلة غصب عنك هتسبب كل الأطباق
تقع وتمسك في طبق واحد بس...

إنت، نفسك، عشان إنت ما ينفعش تروح منك!
ده اللي عملته في الوحدة، ركزت في طبقي، وسبت كل
الأطباق!

كنت عايز أخسر كل حاجة، ومش فارق معايا أي حاجة،
عشان بس أكسب نفسي، عشان أفهم إيه اللي بيحصل.
لو نفسك، عزيزي القارئ، تكون معروف أو مشهور، خلّيني
أرسمك صورة صغيرة:

هتقابل ناس بتحبك حب حقيقي، وحب مصطنع، وحب
عشان مصلحة، وحب عشان يتقربوا منك ويعرفوا عنك حاجة
مش تمام يحكوها عنك، وحب عشان يعرفوا واحدة تعرفها، أو
واحد تعرفه، أو يوصلوا لفنان عن طريقك!

هتقابل ناس بتكرهك بسبب، ومن غير سبب!
هتقابل ستات عايزاك، وستات عايزة تغيظ حد بيك، وستات
عايزة تدمرك عشان إنت مش عايزها!

هتقابل رجاله بيحبوك كصديق، ورجاله بيكرهوك بسبب
واحدة يعرفوها بتحبك، ورجاله بيكرهوك عشان ناجح، ورجاله

بيكرهوك عشان إنت ألد واحد في القعدة ومحور الاهتمام،
ورجالة بيحاولوا يقولوا عليك أي حاجة وحشة عشان بس يقنعوا
الست اللي معاهم إنهم أحسن منك!

هتكتشف إن كل الناس عايزين منك حاجة، مهما طولوا
المقدمة اللي قبل الطلب، ومهما كانوا قريبين منك، حتى لو
صحابك أوي، حتى لو أهلك!

هتبقى طرف في معارك إنت طرف فيها من غير ما تكون
عارف أصلاً!

هتقابل نوعيات بشر غريبة، ونفسيات أغرب!
هتلاقي الناس بتتلم حواليك وبيعشقوك، وفي لحظة هتلاقيهم
بيعدوا عنك وبيرموك! حسب إنت سخن أد إيه في الوسط،
حسب إنت نجمك عالي أد إيه في الوقت ده!
فاكر لعبة «فتّحي يا وردة قفّلي يا وردة»؟ هوّ ده بالضبط اللي
بيحصل.

نمل ملموم على فتفوتة سكر، وده مش معناه إني بنت محجبة،
هوّ مجرد تشبيه، بس ما أنكرش إني فكرت في الحجاب! المهم
إن لما بيخلص السكر، بيخلص النمل.

هتقابل اللي عايز يعلّيك، واللي عايز يطلع من وراك بأي
حاجة، إن شا الله علبة سجائر!

هتشوف الشر بعينيك، وهتقابل الشيطان شخصياً، بس لو
حظك حلو، هتشوف ربنا بعينيك!

الثابت الوحيد دائماً وأبداً، هو ربنا، الله!!

كله بيروح ويبجي، ما عدا ربنا!!

في أي وقت، في أي حنة، هستنجد بيه هتلاقيه، ويفضل معاك في كل لحظة، مش بيسيبك، إنت اللي بتنسى بس إنه موجود، عشان بتلهي في حاجة!

ربنا حماني من الناس، ومن نفسي قبل أي حد!

ربنا وحده، حتى لو فيه أشخاص وقفوا جنبي، وهُم كثير أوي ومدين ليهم بالشكر، بس برضه ربنا اللي بعثهم، الحمد لله يعني! يمكن ده يخليك تفهم ليه ممكن تشوف رابر مخضرم، أغانيه بتكلم عن الجريمة والمتاجرة في المخدرات، وبتباهي بالنسوان والبيتشز، لما يكسب جايزة في مهرجان جوائز موسيقية، بيطلع بكل تأثر وشجن يقف قدام المايك وعينه تذرّف دموع، ويشكر جيساس كرايست على وقفته جنبه. أو ممثل أو ممثلة يكسبوا أوسكار عن فيلم تقريباً إباحي، ويطلعوا يشكروا ربنا ويحكوا عن تجربة «إعادة البعث». غالباً عشان كانوا هيروحوا بسبب الشهرة، وبسبب اللي الشهرة بتقدمه.

أنا أحب أشكر ربنا، وسيدنا محمد، وجيساس، وكل الأنبياء والرسل والصالحين والأولياء، عشان الحمد لله ما رُحّتش!
ما رُحّتش أوي يعني.
بس كنت حمار!



33#

لما بطلت أحب نفسي

بُص...

فيه أربع مشاعر إنسانية أساسية، مشاعر سامة جدًا، ممكن
تاكلك، تاكل شبابك وعمرك ووقتك، وما تحسش.
فيه أكثر طبعًا، بس حابب أركز على دول.
ما بتاخدش بالك أصلًا إنها موجودة، بتفتكر إن ده الطبيعي
بتاعك، بتعيش معاها وانت غير مُدرك وجودها، كأنك ماشي
والسوستة مفتوحة ومش حاسس بتيار الهوا اللي داخل يداعبك،
لحد نقطة معينة ممكن توصلها، أو ما توصلهاش، بتشوف فيها
نفسك من بره، وبتفهم إن كل واحد منها ليه مصدر.
خلينا ناخدها كده بدون ترتيب مقصود.

الغضب

إحساس الغضب ممكن يَأْثُرَ على كل حاجة في حياتك، من علاقاتك القريبة، للبعيدة، للعبارة، لعلاقتك بنفسك، ممكن حتى علاقتك ببتاع الولعة في القهوة، حتى لو هو علق وعايز الحرق.

الغضب أول حاجة ما بتبقاش شايفها عشان بيبقى مبرر جدًا جوه دماغك، عقلك بيقدر يلاقيه تبرير.

مش بتشوف إن الغضب عامل عليك زي غلاف خارجي، سلوفانة كده، بتخليك ولا تحس بحد، ولا تحس بنفسك، وردود أفعالك كلها بتكون مش في حجمها الطبيعي.

الغضب ده ممكن يكون غضب على حاجة حصلت مؤخرًا، أو حاجة حصلت من سنين فاتت، بس عمرك ما واجهتها، أو ممكن حاجة لسه بتحصل، بس إنت بتنكر إنها موجودة.

هيتخليك طول الوقت تعبان، ومش لاقى طاقة تعمل أي حاجة، عشان بيستنزفك أول بأول، كل ما تجدد طاقتك يروح صاحبها، زي شبكات المحمول مع الرصيد كده، وهيتخليك طول الوقت مقريف، باللمس، مش مستحمل أي حاجة غلط تحصل حواليك، وكأنك سُفِتْ كل حاجة غلط ممكن تستحملها خلاص في حياتك ومعندكش أي استعداد لغلطة جديدة.

هتقدر تعرف الغضب ده موجود جواك ولا لا، لما تبص في

عينين اللي حواليك، اللي بيحبوك، لما يغلطوا، لو لقيت في العينين دي خوف، يبقى إنت شخص غضبان، ومحتاج تراجع نفسك، عشان اللي بيحبوك مش المفروض يبقوا خايفين منك، اللي بيحبوك المفروض يبقوا خايفين عليك.

تأكد إن الغضب ده بيتعارض مع وظيفتك الأساسية في الحياة، إنك تعيش وتحب وتتعاطف مع الآخرين وتعبد ربنا في سلام.

حاول تعرف مصدره، وتتخلص منه!

الخوف

الخوف ده مركب شوية، عشان الخوف - وفقًا لعلم النفس - بيتكوّن جواك في أول سبع سنين من عمرك، حسب تربيتك، لو اتعودت في أول سبع سنين من طفولتك تبقى خايف، لأي سبب، هتفضل خايف طول عمرك، ومش من حاجة معينة، خوف في المطلق كده، خوف من العواقب، خوف من المخاطرة، خوف ملتزم بأي قرار صغير أو كبير، خوف حتى من البوتاجاز.

مش بتشوف الخوف وتأثيره عليك، مش بتشوف إنه موريك الدنيا من مجموعة ألوان محدودة، في حين إن بالته ألوان الدنيا

كبيرة ومليانة ألوان مبهجة. بيخلك مبرمج دائماً إنك تختار الطريق السهل، الطريق الآمن، الطريق اللي بتتفادى فيه أي مواجهات مع الآخرين أو حتى مع نفسك.

لو اتربيت إنك تخاف من أهلك، فإنت هتعيش خايف من الحياة بكل ما تحمله، حتى لو الحياة جايبة صندوق بيرة وطقم مُرز وداخلين عليك البيت.

هتتفنن وتبدع داخل عقلك في إيجاد أسباب تخوفك من أي سيناريو محتمل، حتى لو السيناريو ده في مصلحتك وممكن يغير حياتك، وكأنك تعلم الغيب، ولكن تعلمه سلبياً فقط.

لو كان أي حد من والديك عنده الخوف غير المبرر من السخان اللي ممكن ينفجر، والمكواة اللي هتنساها وتولع الدنيا، والتلاجة اللي سلكها هيلمس ويعمل ماس كهربائي، فإنت في الحالة دي ستتوقع دائماً الأسوأ من الحياة ومن البشر، حتى وإن لم يكن هذا التوقع مبرراً بأي شكل من الأشكال، ولا برقع جنيته تبرير حتى.

لو إنت شخصية في يوم من الأيام فيه حد قلل شعورها بقيمة نفسها، وخصوصاً الأهل، هتفضلني دائماً خايفة، عشان مش هتصدقني أبداً إن فيه حد ممكن يحبك فعلاً، وهتفضلني خايفة يا إما هيسيبك إمتي، يا إما هو عايز منك إيه.

هي حاجة كده مش ذنبك يعني، بس معلى محتاج تتعامل معاها.

هتقدر تعرف الخوف ده موجود جواك و لآ، لو فكرت في
آخر عشر سفريات و خروجات: هل كنت إنت اللي بتنظمها،
و لآ كنت إنت اللي دايمًا الناس بتتحايل عليك عشان تيجي،
لحد آخر لحظة، و غالبًا في آخر لحظة بتفكسلهم؟
غالبًا عشان تعوض كل المرّات اللي بتفكس فيها بسبب
الخوف، هتلاقي نفسك من حين لآخر، بتقوم و اخذ قرار عشوائي
غير مدروس، قرار في غاية الـ «spontaneity». ده بيبقى إنت
بتعوض كل الكبت اللي كبتهولك الخوف، و بتقوم ملبس نفسك
زي الطربش في قرار غير مدروس، عشان تحس بس إنك جريء،
عشان الجريء جواك، بس الخوف اللي مخبيه!

الندم

الندم بقى في الأغلب بيكون بسبب موقف كبير حصل في
حياتك، أو ممكن مواقف، اتصرفت فيها بشكل معين، أو حتى
ما اتصرفتش أصلاً، و دماغك بتهيألك إنك لو كنت اتصرفت
تصرف تاني كان ممكن تحصل نتيجة مختلفة، في حين إنه
على أرض الواقع، سواء إنت اتصرفت، فإنت اتصرفت على
أقصى حدود علمك في هذا الوقت، و ده الطبيعي. عقلك أذكى
مما تتخيل و بيتصرف معاك، إنت مش بتصرف لوحدك، عقلك

الباطن بيساعدك وماشي معاك خطوة بخطوة، ولو فيه أي تصرف تاني ممكن يساعدك كان هيحصل . أو سواء إنت ما اتصرفتش أصلاً، ما خدتش قرار، اخترت إنك ما تعملش حاجة، نمت، فده برضه مش سبب للندم، لأنك لو كنت تقدر تعمل حاجة كنت عملتها، صدّقني، ممكن أحلفلك على ده.

محتاج تتصالح مع فكرة إنك ما كنتش تقدر في وقتها بس، وده عادي، إحنا بشر.

كده أو كده، لما تعيش كفاية هتكتشف إن حتى تصرفاتك اللي إنت بتعتبرها خطأ، كانت جزء من منظومة الدنيا، فيه حاجات تانية كتيرة اترتبت على تصرفك ده في منظومة إنت جزء منها، سواء بتصرف صح أو غلط، كله في الآخر بيودي في حته واحدة.

ده نظام ربنا حاظه للدنيا، إنت مش محتاج تلوم نفسك، عشان كده فيه ألف حاجة هتركب على تصرفك أيّا كان.

ممكن تحاسب نفسك، تستغفر ربنا، تتعلم درس إيجابي من الموضوع، عشان يكون عندك سرعة التصرف الصحيح في المرّة الجاية، وهيّ كده كده هتحصل، وهتلاقي نفسك فخور بإنك اتصرفت صح، هتحس الدنيا كلها فخورة بيك، هتحس إنك كبرت، واتعلمت!

الإحساس بالذنب

الذنب بقى يا سيدي هو تقريبًا شبه الندم كده، هو تقريبًا كل ما سبق، بس كل الفكرة إنك لما بتيجي تحاسب نفسك، بتشيل نفسك فوق طاقتها، بتحاسب نفسك كأنك كنت أعلم وأدرى وأغنى البشر، وأكثرهم نشاطًا وقدرة، وكأنك الشخص الوحيد اللي كان المفروض يتصرف صح، متناسيًا إن فيه ناس تانية على فكرة، حتى لو إنت غلطت يقدرُوا يصلحُوا، أو ينبهُوا. بتحاسب نفسك كأنك سوبر هيرو، بس في الحقيقة إنت بشر عادي زينا، بتاكل وبتشرب وبتخش الحما، إنت لسه شادد السيْفون من شوية يا معلم! مفيش سوبر هيرو بيُسخ على فكرة، أو على الأقل المشاهد دي اتحذفت من الأفلام اللي سُفناها! ما سُفتش أنا باتمان واقف على مبولة، وبيقول آه بحرقة علامة على احتباس بولي بقاله فترة طويلة! ما سُفتش سوبر مان وهو قاعد على تواليت وبيدور على مناديل عشان يمسح... أحزانه.

حاسب نفسك على إنك بشر، تقبل فكرة إن البشر بيغلطُوا، ومش بس كده، ومش مطالبين إنهم يعملُوا كل حاجة صح طول الوقت. ده اللي اسمه تحميل نفسك فوق طاقتها. تقبل إنك بشر عادي، بيُسخ، وهتلاقي عندك حاجات تانية في حياتك محتاج تشد عليها السيْفون.

إنت مش مسؤول عن الدنيا، إنت بالعافية مسؤول عن نفسك!
أحد الأصدقاء كان دايماً يقولي إنت أغبي إنسان ذكي في
الدنيا. وكان معاه حق، أنا فعلاً ذكي، بس ما كنتش موجود دايماً،
فيه أوقات كثيرة كنت غايب، ما جيتش، دماغني كانت دايماً بتحلل
حاجات مش قادر أفهمها، في حين إنها كانت بسيطة جداً، عشان
مش قادر أحب نفسي، لو كنت باحبني في ساعتها، كنت فهمت
كل حاجة، كنت فهمت أد إيه فيه مشاعر مسيطرة عليّ ومانعاني
من إني أعيش حياة طبيعية.

الموضوع خد سنين وتفكير ووحدة وعوامل خارجية وعوامل
داخلية، رحلة بنت لدينا، تعبت فيها، بس دلوقت الحمد لله أقدر
أقول إني باحب نفسي، باحب إيه، دا أنا باموت في نفسي، دا أنا
عسل، يخرب بيت جمالي، دا أنا راجل أنا ذات نفسي أستمناه
(بصوت عبد الفتاح القصري).

بعد رحلات طويلة من محاولات الوصول لربنا، ولنفسي في
أغلب الوقت، فهمت حاجة مهمة أوي أوي بالنسبة ليّ كرؤيتي
الشخصية للدنيا، مريحاني جداً ومنطقية جداً: الدنيا عبارة عن
«Input/output Point System»، نظام برصيد زي أي نظام بتعامل
بيه في حياتك، زي رصيدك في البنك أو على الموبايل، زي رصيدك
في لعبة أونلاين، شايفكو يا بتوع «PUBG»، زي حتى رصيد
جمايك عند واحد صاحبك. هتفضل تسحب هيخلص، هتفضل
تشحن هيتحمّل أي سحب ممكن تعمله، حتى لو سحب كبير.

إنت بتنزّل الدنيا معاك رصيد أساسي، والخصم منه بيكون
بنسبة بسيطة في البداية.

غلطت؟ هيتخصم منك نقطة واحدة.

عملت حاجة كويسة؟ هيتضافلك عشر نقط في رصيدك.

كل ما بتكبر، كل ما نسبة الخصم بتزيد.

كل ما بتعمل خير، كل ما رصيدك بيزيد.

فكرة إن ربنا نفسه يقول أكثر من مرة إن اللي بيعمل خير بيعمله

لنفسه، بتشرح مبدأ إن نظام الدنيا يسمحلك تغلط، ويسمحلك

تجدد نقاطك بكل بساطة وتمحو الغلط ده.

إنت في الآخر بتتحاسب على ميزان فيه كل حاجة، ودي

على عكس فكرة السلفية اللي بتحاول تخوفك منه، ده نظام

مفيد جدًا ومطمئن جدًا.

كل اللي محتاج تعمله إنك تزود نقاط.

اغلط زي ما تغلط، بس اعمل خير أده الناحية الثانية: ساعد

يتيم، انقذ روح مش قادرة تتكلم وتستنجد بحد، ابتسم في وش

الناس حتى.

جمّع نقط على أد ما تقدر، عشان لما تغلط يبقى عندك رصيد

كفاية يطمّنك، بس مش أكثر.

حب نفسك، يعني ارحم نفسك، اتمنى الخير لنفسك،

سامح نفسك، انصح نفسك، دلّع نفسك، خد بالك من صحة

نفسك، جسم نفسك، أكل نفسك، شرب نفسك، هات هدية

غالية لنفسك، انزل الساعة ٣ بالليل فسّح نفسك، حوّش وسفّر
نفسك، اهتم بشكل نفسك، العب في نفسك عادي براحتك لو
علاقتكو تسمح يعني، عارفها الحاجات دي؟ الحاجات اللي
بتعملها لأي حد غير نفسك دي! اعملها لنفسك بقي، عشان
إنت تستاهل، إنت مش وحش زي ما إنت شايف نفسك، إنت
مجرد بشر، بيشرح، زينا كلنا!

35#

لما افكرت إني حبّيت مرّة واحدة

أقدر أقولك بكل ثقة إن فاقد الشيء مفيش حد في الدنيا
هيعطيه زيه.

فاقد الشيء ده برنس الشيء.

أعتقد إن فاقد الشيء ده يمكن يكون ربنا حطه في الدنيا،
عشان يعوض نقص هذا الشيء لحد معين.

ما أقدرش أقولك إني اتولدت في بيت فيه حب بأي شكل
من الأشكال.

اتولدت في بيت أحسن وصف ليه إنه... صعب. ما كانش
البيت الطبيعي اللي لما حد بيعمل حاجة حلوة بنسقفله، ولا البيت
اللي بنبوس ونحضن بعض قبل ما ننزل، ولا بنقعد كلنا نهزر
ونضحك، للأسف لأ!

كانت فيه محاولات، كانت فيه كام مرّة، بس ما كانش ده

العادي، أو يعني الكام محاولة دول راحوا مع الوقت، ومع
اللي راحوا!

يمكن كنت أنا غالبًا مصدر أغلب الحب في أغلب الوقت، كنت
باحب أبويا. وأنا طفل، كان لما يرجع من السفر أجري عليه وأتسبب
فيه، باحب أمي وإخواتي، باحاول أخلي البيت مليان حب.
كنت باتفرج دايماً على الأفلام وأنا طفل، سواء عائلية أو
علاقاتية، وباحاول أتعلم منها الحب، وباحاول أطبقه في البيت،
«Learning by watching».

يمكن طول عمري كنت فاكر إن أبويا هوّ السبب في فقدان
المشاعر الجميلة دي من البيت، بسبب قسوة أو عنف أو غياب
مثلاً، بس دلوقت وأنا بافكر، افتكرت أد إيه أبويا كان بيدور على
الحب، بطرق كثيرة أوي مش حابب أتكلم فيها أوي، بس يعني
لواحكي حاجة، ففيه حاجة أذكرها جيداً...

جواب لقيته مرّة في شنطة أبويا، كان خدني معاه الشغل وراح
مأمورية، وأنا قعدت طبعاً كأني طفل أتيت في حاجته كلها، بيكوز
واي نوت، عايز أكتشف حاجات جديدة في الدنيا وكده، فلقيت
الجواب ده من أبويا لواحدة، مش أمي طبعاً، وكان بيحبها أوي،
وبيحكيها عن أد إيه هوّ محتاج حب. حاسس بالنقص، عايز
يبقى معاهما عشان يحس بالاكتمال! وهيّ كانت بتحبه، وبتبعته
شرايط كاسيت مسجّلاها بصوتها، وسمعت شريط منها وأنا
قاعد في الشغل عند أبويا برضه.

طفل عنده ٧ سنين مشغل شريط كاسيت لواحدة بتحب
أبوه، وصوتها مليان عشق ولهفة غير مفهومين تمامًا بالنسبة
ليّ! وللأسف وقتها، كان فيه عساكر في وحدة أبويا اللي كنت
معاه فيها، وهوّزي ما قلت كان بره في مأمورية، وكنت أنا قاعد
في أوضته ومشغل الشريط بصوت عالي، فالعساكر طبعًا كانوا
بيسمعوا صوت واحدة بتتكلم معايا في الأوضة، يقوموا جاين
جري يخبطوا عليّ يتطمنوا، أقوم طافي الكاسيت، يدخلوا،
يلاقوني قاعد لوحدي، فيسألوني:

- هوّ فيه حد هنا معاك يا هشام؟!

أقولهم بخوف طبعًا:

- لا، أنا لوحدي!

يقولولي:

- طب إحنا سمعنا حد بيتكلم!

أقولهم بكل إنكار طفولي:

- لا، أنا ما سمعتش حاجة!

يلفوا بعيونهم في الأوضة سريعًا في نظرة ماسحة للمكان،
ويروحو فافلين الباب بتردد وماشين، أروح أنا مشغل الكاسيت
تاني، فيرجعوا تاني، وهكذا، فضلنا كده بتاع تسع مرّات مثلاً،
وأنا شبه متأكد إن العساكر دول لحد النهارده عندهم يقين تام
إني كنت ملبوس، وغالبًا أثرت على نفسيتهم جدًّا! عاشوا فيلم
رعب معايا الحقيقة، وفي أوائل التسعينيات كمان قبل ما الوعي

الإنساني والإدراك يتطور! والحقيقة حابب أطمئنتهم وأقولهم إنني
ما كنتش ملبوس ولا حاجة، ودي كانت واحدة بتحب أبويا على
شريط كاسيت مش أكثر!

المهم إن بعد السفرية دي لما رجعت مع أبويا لبيتنا، بقيت بابص
لأمي بنظرة مختلفة، مركز معاها أكثر، باراقبها وباشوفها: هل هي
بتتصرف زي الست اللي سمعتها على شريط الكاسيت دي ولا لا؟
طبعاً أمي كانت وقتها أم لتلات أطفال، وبتشتغل، وبتشارك في
مصروف البيت، وقاعدة أغلب الوقت لوحدها في البيت بتربي
العيال بسبب طبيعة عمل زوجها، ست شقيانة يعني من الآخر،
وغير قادرة على إعطاء الحب، ولا عندها وقت لنفسها ولا لينا،
يا دوبك ترجع من الشغل تطبخ وتغسل وتذاكر للعيال وتلحق
تنام شوية، بطلة كادحة ما بتعملش حاجة لنفسها، حاجة كده شبه
«العيال كبرت»، بس الفرق إن حياتنا ما كانتش بتضحك أوي زي
المسرحية، اللي دلوقت شايفها من أكثر المسرحيات عبقرية.

أنا طبعاً ما كنتش شايف ده وقتها، أنا كنت طفل، كل اللي
كنت شايفه إن أمي مش بتحب أبويا زي الست اللي على شريط
الكاسيت، وأعتقد إن ده أثر عليّ.

ما أقدرش أقول إنني حبيت واحدة بس، أبقى راجل كداب،
وباضحك على نفسي قبل ما أكون باضحك عليكوا!

أنا حبيت كثير، عشان لسبب ما اتربيت على إنني باحب الحب
نفسه، باحب سعادة الحب، وفرحة الحب، وإحساس الحب.

الحاجة الوحيدة اللي ما كنتش لاقيتها في بيتي ولا في حياتي
وأنا باكبر.

آه، ممكن أكون حبيت كثير، بس كل واحدة فيهم حبيتها بجد،
حبيتها حب حقيقي، وإديتها روعي كاملة وخالصه، واهتمامي
التام وإخلاصي، ما عدا مرّة واحدة عشان أبقى صادق تمامًا!
انفصال أمي عن أبويا كان شبه دائم، ورجوعهم كان دائمًا
متقطع، آخر انفصال حقيقي لا رجعة فيه كان في آخر مرّة
ضربني فيها في أولى جامعة، والموضوع تطور لدرجة إنني
كنت أنا شخصيًا هاضربه، وأهلي تدخلوا والجيران وكانوا حرفيًا
بيشيلوني من عليه، كنت حاسس إنني باخد منه حق السنين اللي
فاتت كلها، حقي وحق أمي وإخواتي!

بعد الانفصال ده، أمي فضلت في عينيّ ضحية، صورة مش
لذيذة تفضل شايف أمك بيها الحقيقة، عشان بتحس بالذنب
والمسؤولية، وبيفضلوا على كتافك في أي وقت، في أي حته.
ضحية أهلها، اللي رفضوا جوازها من حب حياتها، وجوزوها
لأبويا.

ضحية أهلها، اللي رفضوا انفصالها عنه بعد أول مرّة ضربها،
وبعد كل مرّة غيرها.

ضحية شغلها، اللي كان بيحلبها، ويديها ملايم.
ضحية ولادها حتى، اللي كانوا دايمًا محتاجينها سواء في
جوازها أو في انفصالها، وحتى بعد ما كبروا.

للعلم، أُمِّي انفصلت عن أبويَا وما اتجوزتْش حد تاني،
ولا فكرت حتى.

كانت دايماً شايلة المسؤولية، ولما عزّلنا وبقينا ساكنين مع
جدتي وجدتي في نفس العمارة، بقت شايلة مسؤوليتهم وهُمّ
كبار في السن، وبتخدمهم، بالإضافة لشغلها ولولادها.
بعد وفاة أخوها، شالت مسؤولية ولاده، وبقت بتشتغل أكثر
عشان تسندهم، زائد أفراد تانيين كتير في العيلة برضه كانت
بتدعمهم بشكل أو بآخر.

إنت متخيل إني كل ده باتكلم على واحدة ست؟
متخيل يا مان؟

أعتقد إن ده برضه، أثر عليّ! بأشكال كثيرة جدّاً، منها إني
عشت أغلب عمري مع أُمِّي، فاتعودت إني أكون ضحية زيها
لسبب ما، اتطبعت بيها، ده كان الوضع الطبيعي بالنسبة ليّ.
كان بشكل أو بآخر عادي إني أسيب حد يظلمني، وما أخدش
حقي منه، عشان شايف ده قدامي طول الوقت!

بتفرق جدّاً للطفل أو الشاب، إن يكون في حياته فيه مثل
أعلى قوي، يستمد منه قوة لشخصيته. مهم جدّاً لأي طفل إنه
يشوف القيم اللي تخليّه يقدر يعيش ويحارب في الحياة، في
أقرب الناس إليه... أهله.
ده جزء.

الجزء التاني يمكن إحساسي بالذنب تجاه أُمِّي، خلّاني دايماً،

أو يعني، دايماً لحد الكتاب ده، باختار نوع ست معين ومحدد
أوي أحبه، وأحاول أبدأ معاه علاقة جادة.

النوع ده كان عبارة عن: مُطلّقة، معاها ولاد، بتشتغل، وغالبًا
جوزها كان بيأذيها.

والحمد لله الذي بنعمته تتم الصالحات، بسم الله ما شاء الله
يعني، كل مرّة كنت بافشل، فشلاً ذريعاً!
ما كانش بينفع!

وبعد سنين طويلة من البحث داخل الذات، وخارج الذات،
وورا الغسالة، وتحت شلثة الكنبه، وفي جيب البنطلون الكحلي،
اكتشفت أخيراً سبب مهم أوي لاختياري المميز ده، ألا وهو:
إني باحاول أنقذ أمي، في كل الستات اللي باحبها.

كانت لحظة ثقيلة أوي، لحظة إدراك ووعي مش سهلة
خالص وغريبة، والأغرب منها إنك تكتشف إن اختيارك كل
مرّة ما كانش مبني على إحساس قلبك، ولا تفكير عقلك،
ولا عينيك حتى.

كل دول كانوا عطلانين!

كان مبني بكل بساطة، على طفولتك، اللي إنت شفته، واتربيت
عليه، وأثر فيك، وبتحاول تغيره.

أنا حببت كل أمي شفتها في واحدة تانية.

حب عمرهم ما كانوا هيقدروا يفهموه، وفعلياً عمرهم
ما فهموه، عشان أنا نفسي ما كنتش فاهمه، ولا عندي أدنى فكرة.

في نفس الوقت حبيت كل واحدة تانية حسيت إنني لو كنت
شخص طبيعي وقت ما قابلتها، وفاهم الكلام المكتوب فوق ده،
كانت هتبقى أحلى حاجة في حياتي، وكانوا فعلاً، بس ما كنتش
قادر أشوف.

الشخص الوحيد اللي ما عرفتش أحبه كان... نفسي.
مش مركز مع نفسي، مش مهتم بنفسي أصلاً، نفسي مين
يا معلم، أنا عندي قضية، هدف، تارجت.

كنت بابص لأي واحدة فيهم بنظرة واحدة: إنت لازم
أنقذك، حتى لو إنت مش صح لي وأنا مش صح ليك، حتى
لو هاخسر واحدة تنفعني بجد، حتى لو هاخسر مستقبلي
وحياتي كلها! إنت محتاجة أساعدك، وهيّ طبعا مش فاهمة،
ومش حاسة إنها محتاجة مساعدة، ومستغربة ماله الجحش
ده عايز ينقذني من إيه، ما أنا حلوة وزبي الفل أهو (بصوت
علاء ولي الدين).

مفيش واحدة فيهم للأسف فهمت إنني كنت باحبها حب فوق
الوصف، وأكبر من أي حب في الدنيا!
عشان من خلالها، كنت باحب أمي! وده أعظم حب في
الدنيا، حقيقي يعني!


أنا فعلاً باحبك يا مديحة (اللي هيّ أمي يعني) حب ضيعت
فيه سنين باحاول أنقذك، عشان اتوجعت لما شُفتك بتتوجعي،
وبقى هدفي في الحياة أنقذ أي واحدة شبهك!

دلوقتِ، بعد ما فهمت، وتصالحت مع الموضوع ده، عايز
أقولك إني آسف إني ما كنتش عازف أفرحك بيّ عشان كنت
باحاول أساعدك بطريقة غير مباشرة!

أعتقد إني دلوقتِ لما فهمت، أقدر أحب بجد، حب ينفعني،
ويريحني، ويخليني لأول مرّة من ٣٤ سنة يا أمي، أبقى مبسوط
وسعيد في حياتي مع الشخص المناسب ليّ.

أتمنى إنك تشوفي ده بشكل إني فعلاً ما قصرتش معاك،
ويخليك تفهمي أنا باحبك أد إيه، وما تزعلش مني، وسامحيني
على كل يوم شقا سُفتيه في حياتك! عشان لسبب ما حاسس إني
مسؤول، وكان لازم أحملك، بس كنت طفل، وكنت بانضرب
أنا كمان، بس دلوقتِ الحمد لله بمجهودك بقيت راجل أهو،
وأقدر أحملك بجد!

أحملك إيه؟! دا أنا أفرم اللي يبجي جنبك فرم!!
إهداء إلى كل اللي حبيتهم غلط، وكل اللي جبوني صح.
آسف إني كنت حمار، بس آديكو شايفين يعني، ما كانش
قصدي والله!



37#

لما فقدت الأمل

أنا شخص يحب البوس، باقدره حقيقي، له مكانة خاصة في قلبي. وكشخص يحب البوس، مكان البوسة دائماً يفرق معايا، ومش قصدي المكان مكان في جسم البنت يعني، قصدي موقع البوسة الجغرافي، الإحداثيات.

الحمد لله، حياتي مليانة بوس في أماكن مميزة. يعني مثلاً، أكثر بوسة مميزة في حياتي كانت لما بوست صاحبتني الروسية داخل غرفة مقبرة الملك خوفو في الهرم الأكبر، بوسة مستحيل أنساها، ومستوى الأكسجين كان ضعيف فده أثر على مخنا، وزود استمتعنا بيها بطريقة لا يمكن تصورها. دي كانت بوسة للتاريخ، حرفياً، التاريخ كان مدفون جنبنا وقاعد بيتفرج.

بوسة تانية كانت من أكثر البوس سينمائية وأحلاه، بوسة

صاحبتني الأمريكية في محطة مترو أنفاق نيويورك، باحب أسميها «بوسة الـD Train». كانت بوسة قدام الناس كلها بدون ذرة خوف أو خجل، أكثر بوسة متحررة في حياتي، والكادر فعلاً كان جميل، كنا اتنين بيحبوا بعض وبيبوسوا بعض بكل حرية، والمتروهات تعدي من جنبنا وشعرنا إحنا الاتنين يطير من اندفاع الهوا (معلش كان شعري طويل وقتها).

مشكلتي إني ما باعرفش أنسى البوسة المميزة، أي حاجة مميزة بصفة عامة، بس البوسة بصفة خاصة! زي البوسة في شوارع لندن، البوسة تحت برج إيفل في باريس، هوّ عامة أي بوسة في باريس إن شا الله في باركينج كارفور هناك، باريس فيها حاجة بتخلّي البوس تلقائي وحلو ونضيف ومريح نفسياً، هيّ حتى اسمها «فرنش كيس»، يعني بلد المنشأ. البوسة في تلفريك بيروت قصة، وعلى جبل بيروت متعة، والبوسة في زيوريخ في الشتاء عظيمة، المهم بس محدش فيكو تكون مناخيره سايبه عشان هتبقى مأساة، البوسة على بحر نوبيع في ليلة كلها نجوم مزيكا، والبوسة جوه بحر نوبيع نفسه دي حاجة تانية خالص، خالص يعني، مش ممكن، مش ممكن، مش ممكن (بصوت مدحت شلبي). دايمًا هيكون ليكو ارتباط خاص بيها مهما افترقتموا.

بس مش كل البوس حلوا! البوسة في الطائرة مثلاً دي حاجة قدرة جدًّا لأسباب كتيرة أوي، أولها إن الهوا متفلتر ومتعاد توزيعه، وفيه ريحة غازات طول الوقت، بسبب الحمّام، أو

ريحة الأكل وهو بيتسخن اللي أصلاً ريحته شبه الغازات، أنا كل مرة باركب طيارة باتلخبط بين اللحظات اللي باب الحمّام يفتح فيها ولما بيسخنوا الأكل، الاتنين عندي متشابهين تمامًا! آسف إني فصلتكو، الموضوع كان معصبي بس. خلّيني أرجع للبوس المميز، وسامعكو وإنتو بتقولوا: «بوس إيه وخرا إيه بقى خلاص»، بس معلش.

على الرغم من كل الأماكن دي، فيه أماكن عادية للبوس، بس مهما حصل هتفضل هيّ الأساس في التميز البوسي... الأسانسير الفاضي مع واحدة لسه مش محدد معاها شكل علاقة، ولسه بتستكشفوا بعض، وتحصل لو حدها، دي بوسة مميزة.

لما تفتح الباب وتلاقيها قدامك، وتدخّلها وتقفّل الباب، ولسه بتقولها إنك مبسوط إنها جت، تبوسك بوسة واحدة إنت واحشها ومش قادرة تستنى، دي برضه بوسة في قمة التميز. يمكن أحلاها بالنسبة ليّ، وأكثرها تميزًا، هيّ البوسة اللي بتتخطف في وسط خناقة ووسط كلام كثير، وحد فيكو شايف إن الكلام خلاص ما بقاش مفيد، هيّ البوسة اللي هتحل كل حاجة. عامة، أول بوسة دي بتقول كل حاجة، وما بتتنشيش، عشان كده عمرو دياب بيقول في الأغنية «كنت أول كل حاجة»، أول كل حاجة دي كلمة كبيرة جدًا لو تعلمون.

في ثانوية عامة كنت باحب بنت جميلة أوي من المعادي،

وهيَّ كانت بتحبني أكثر، ومستعدة تعمل أي حاجة علشاني، هيَّ قالتها لي. كنا بنحب بعض لدرجة إننا مش قادرين نبطل نلمس بعض، ميكس حب على هرمونات لذيذ وخطر، وكنا بنحاول نبوس بعض دايمًا في المكان اللي بنخرج فيه على طول، جراند كافيه المعادي، وطبعًا فشلنا، عشان طبعًا إحنا كنا في جراند كافيه المعادي، مكان عام فشخ، موضوع بديهي يعني. وعمرنا ما بوسنا بعض للأسف!

أول بوسة حقيقية ليَّ كانت في ستر تعليمي في أول سنة جامعة، كنت باحب بنت جميلة بناخد مع بعض كورس في الستر ده، كنت باحبها وهيَّ كانت بتحبني، في يوم من الأيام كنا بنراجع بعض المواد المتعلقة بالكورس مع المعيد بتاع المادة في مكتبه بعد ساعات المحاضرات الرسمية، خلصنا مراجعة، وخرجنا من الأوضة، لقينا نفسنا في الستر لوحدنا، وكأن الكون والستر والسيكيوريتي كانوا كلهم مجتمعين على إننا نبوس بعض، أو ممكن حتى كان عندهم طموح أكبر من كده، بس كنت أخاف أقلع في الستر بصراحة، المهم يعني، أول ما أدركت ده بصيتها، لقيتها بتبصلي، رُحت شاددها من ذراعها على كلاس مفتوح، وقعدنا نبوس بعض حوالي رُبع ساعة!

ما كانتش بتعرف تبوس للأسف! كانت ضامة شفايفها وسايها ملي كده كأنهم رف في الحمام، أعلق عليهم الفوط، أبوسهم، أخبط كوعي زي مصارعين الـ «WWF» وأنزل عليهم

سوبر سوفليكس، هيّ ما كانش فارق معاها، هيّ خدت الوضع
وسابتني أنطلق!

أنا قعدت أحاول بكل ما أوتيت من قوة إني أفتح بّقها عشان
البوسة تبقى زي بوسات الأفلام، وهيّ مفيش، تمساح قاعد
قدامي! كانت بتبوس زي عماد حمدي في الأفلام الأبيض
وإسود، لما بيثبتوا شفايفهم على شفايف بعض كده بدون هدف
أو حركة، لحد ما يبجي الحكم ينزل جنبهم يعد ثلاث عدّات
وتخلص.

أنا بقي كنت باحاول أحاكي كل خبرتي السينمائية في البوس،
وأقلّد كل العظماء: «وارين بيتي»، و«بول هينريد»، و«ليوناردو
ديكابريو» حتى في «تايتانيك»، وفشلت معاها عشان ما لقيتش
استجابة، لو كنت بابوس درفة دولاب كانت فتحت معايا!

الموضوع ده ما وقفنيش، بعد البوسة دي بقينا بنبوس بعض
كل ما بنلاقي فرصة، لو ما كانش فيه فرصة كنت باخلق فرصة،
حتى في مكتبة الستتر، كنا نخش ندوّر على كتب في آخر المكتبة
خالص ناحية الكتب اللي أصحابها نفسهم ما قروهاش، ونقعد
نسرح في شفايف بعض، ونخلص ونرجع كل واحد بكتاب
ملوش لازمة، هيّ معاها كتاب عن بدايات الكمبيوتر في
الخمسينيات، وأنا معايا كتاب عن الكسور - لا مؤاخذة - العشرية.
كنت باحبها أوي وعازب أتجوزها، في نفس الوقت اللي كنت
باحب فيه بنت سمرا جميلة ومحترمة وعازب أتجوزها برضه، بس

دي كانت ضد البوس، فكنت أحب دي، وأبوس دي، أكلم دي
في التلفون، وأمسك إيد دي!

عيل صغير معلش!

كل ده خلاني أكتشف أد إيه أنا باحب الحب، ولما العلاقتين
دول انهاروا، حسيت إنني ما أقدرش أعيش من غير حب!
فتحت على نفسي أبواب الحب، وما قدرتش أقفلها، وكنت
باهرب من علاقة لعلاقة، ومن بنت لبنت!

بدأت هنا رحلة «ارسيلك على قارة» (بصوت فؤاد المهندس).
حببت الأمريكية والإيطالية والكويتية واللبنانية والفرنسية
والمغربية والهولندية والأمريكية تاني وتالت، والإنجليزية
والسعودية والكورية والماليزية والروسية والمجرية والأسترالية
والمكسيكية والأردنية والتونسية والمغربية والفرنسية تاني،
والمسيحية واليهودية والبوذية والملحدة بجد والملحدة ترويش.
كنت ماشي باقلب الطوب وأبص تحتيه، حب حياتي هنا؟
لأ؟ تمام.

فضلت أحب على نفسي، وكل واحدة أقابلها أفكرها حب
حياتي، لحد ما أفوق من سكرة انبهاري بيها، وأكتشف إنه
ما ينفعش، ما ينفعش.

كنت باحب على طول، وبسرعة تكاد تفوق سرعة الصوت،
كنت باحب أسرع من محمد صلاح ما بيعجري.
كنت على طول باحب من أول نظرة.

كنت باحب أول كل حاجة.

باحب أول لمسة إيد، والكهربا بتاعة أول لمسة إيد، وأول بوسة، ولحظة انهيارنا في أول حضن لنا لبعض.

باحب اللحظة اللي بتبقى عينينا اتفتت خلاص هنعمل إيه دلوقتٍ من غير ما نقول.

باحب نظرات عينين الست وهي بتقول أنا دلوقتٍ هابقي واحدة تانية، بتاعتك بس.

باعشق فكرة إنك تصحى من النوم تلاقي جنبك حد بتحبه، فرحان إنه جنبك وفرحان بيك.

باحب كل ده من زمان، وباحبه مع شخص باحبه ومرتبط بيه، الحاجات دي ملهاش لازمة مع حد ما تعرفوش، آه والله، ملهاش طعم.

جربت كثير، أكثر مما ينبغي.

الموضوع أخذ مني عدد مهول من العلاقات علشان أكتشف نفسي من خلالها، وأعرف أنا باحب إيه وما باحبش إيه، نفسي في إيه، محتاج إيه بصفة دائمة ومحتاج إيه أحياناً، إيه الحاجات اللي لا يمكن أقبل بيها، وإيه الحاجات اللي ممكن أعديها، إيه الحاجات الأساسية، وإيه الحاجات اللي مش فارقة أوي.

عايزها إيه؟ ذكية، ولأ غبية؟ علمية، ولأ أدبية، ولأ ميكس؟

عايزها فنانة في نفسها، ولأ شخصية عملية بحتة؟

عايزة جريئة، ولأ وش كسوف؟

عايزها سافلة، ولأ مؤدبة وأنا اللي أعلمها كل حاجة؟

عايزها لعبية، ولأ هادية؟

عايزها متدينة، ولأ كافرة، ولأ بتصلي ساعات؟ ولأ بتحب

الزبادي؟ ولأ بتحشش؟ ولأ بتشرب ميرلوت مع اللحمية

وشاردونه مع السمك؟

بتسافر لوحدها، ولأ مستقلة، ولأ معتمدة عليك؟

دلوعة، ولأ مسترجلة؟

بتحب الانتباه، ولأ بتتفاداه؟

مليون سؤال، اختيار شخص تحبه وتعيش معاه ده مش سهل،

مش سلق بيض زي ما بيحصل عندنا، مش يلاً نيش وسفرة وطقم

خشاف وادخلوا نطوا على بعض وهاتوا طفل تاني مش فاهم

نفسه للعالم!

لو إنت لسه ما ارتبطتش اسأل نفسك برضه الأسئلة دي، عشان

إجابات الأسئلة دي كلها حاجة واحدة: إنت إيه؟

إنت!

لو عرفت إنت إيه، هتعرف إنت عايز إيه، إنت إجابة كل

الأسئلة!

لما تبقى إنت عارف إيه، هو هيجيلك لوحده، رحلة طويلة

متعبة بس آخرها حلو.

لك كامل الحرية تصدقني أو ما تصدقنيش، كل مرة من دول

كان بيبقى نفسي تبقى هي، تبقى دي، وتبقى كل حاجة باتمناها،

وعمره ما كان بيحصل، نيفار إيفار إيفار، حتى في أكثر العلاقات
جدية في حياتي، والسبب الرئيسي دائماً وأبداً، إني كنت باحبهم
على مستوى في قمة السطحية، منجذب لمميزات بسيطة في
الشخصية مع شكل أو جسم، وفاكر مشاعري دي حب، بالتالي
كنت مع الوقت بابتدي أكتشف كل شوية حاجة ما باحبهاش
في البنت اللي قدامي، كل يوم، كل أسبوع، وفي بعض الأحيان
كل عشر دقائق.

عمري ما كنت باعرفهم كويس، عمري ما خدت الوقت
الكافي إني أكتشف خفة الدم والوش الجميل والجسم الأجمل
دول بيحملوا في طياتهم روح عاملة إزاي، وهل إحنا متوافقين
فكرياً ولألاً!

كنت باخد منهم مميزات بسيطة، وأكمل أنا حب من عندي،
عشان كان عندي فائض من الحب مش عارف أوديه فين،
وأفكر إنه هيخليني أستحمل، بس عمره ما بيكون كفاية،
صدّقني في دي.

لحد ما قابلت الإنسانية العظيمة اللي في حياتي، اللي أقدر
أقول عليها «حب حياتي» باقتناع، واللي أنا متأكد إني قابلتها
قبل كده، حتى لو في حياة أخرى، الإنسانية الوحيدة اللي ممكن
أقولها: «You are the love of all of my lives».

أحد أصدقائي الراحلين الله يرحمه، كان قالي في مرة إن
الموضوع كله بيتلخص في: «هل دي تنفع أم لأولادك ولألاً؟»،

وكنت لما بافتكر جملته دي باقف في وسط العلاقة، وأقيّم الأنثى
اللي قدامي من أول وجديد، وأغلبهم كانوا ييفشلوا!

مفيش شك إنه الله يرحمه كان عنده حق، بس إلى حد ما،
عشان الموضوع مش كله «أم العيال»!

الحياة أكبر من أم العيال، وأكبر من الانجذاب، والكيميا
والفيزيا ومنهج علمي رياضة كله.

الموضوع في حاجة واحدة بس، ربنا سبحانه وتعالى قال:
«وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا لِتَسْكُنُوا إِلَيْهَا».

حسيت معاها بالسكون، وهي كلمة عظيمة أوي، هي اتصال
دائم، عاطفي وفكري وجسدي، وارتياح!

حسيت إن روعي ارتاحت وهديت في وجودها.

حسيت باتزان نفسي وعقلي وعاطفي.

حسيت إن ممكن روعي يتقابلوا، ولقاؤهم ده يبقى نقطة
الهدوء في مشوارهم.

حسيت إنني متطمئن معاها زي ما هي متطمنة معايا.

حسيت بتكافؤ، ولا مادي ولا اجتماعي ولا الهبل ده، تكافؤ

اتنين بني آدمين.

حسيت إنني كنت باجري كتير أوي، ومش محتاج أجري

تاني خلاص.


حسيت كل تفصيلة فيها، من شعرها لصباع رجلها، حب مش

إعجاب.

حببتها زي ما هيّ، من غير ما أبقى عايز أغير حاجة.
حببت فكرة إنها موجودة في الدنيا، حتى لو هيّ مش معايا.
حببتها بدون أي صوت في دماغى بيحاول يقولي لأ.
حببتها عشان هيّ كانت حلم في دماغى بقالي سنين باجري
جري الوحوش عشان أوصله.

بالنسبة ليّ، هيّ هدية من ربنا، وإثبات لوجوده في الدنيا.
هيّ مش حب عمري، هيّ عمري نفسه!
أنا كنت حمار لما فقدت الأمل!
عشان يؤسفني أقولك إن فيه أمل، فيه فعلاً، بس تمنه غالي،
الأمل عزيز أوي!

إنك تلاقي لحظة سكون في وسط الدنيا دي بصراعاتها
بالمها، دي نعمة عظيمة، احمد ربنا واشكره عليها!
أدعو ربنا الملك يرزقكم كلكم بيها!



39#

لما افكرت إن مفيش حُب

لما بتتوالى عليك الصدمات بيتكون عندك نوع من أنواع الغشاوة على عينيك وبصيرتك ونظرتك للحياة، بتكون بمثابة كوندوم رمزي يمنعك من الإحساس الحقيقي بالدنيا، وألوانها ومشاعرها، ورؤية نفسك والآخرين على حقيقتهم.

هذه الغشاوة قد تدفعك لأفعال مش حقيقية، مش إنت، مش شخصيتك، مش أخلاقك، بس بتعملها لمجرد إن مفهومك للحياة أصبح مشوه بعض الشيء، بتنجرف، بتتحول.

أنا على مدار التمان سنين اللي فاتوا، اتحولت مرتين تحول حاد في الشخصية، المرتين دول ظروفهم كانت متشابهة، وكل مرّة فيهم قلبت حياتي رأسًا على عقب.

يمكن كنت دايمًا بافتكر إن التحول اللي بيحصل في شخصيتي ده تحول مفاجئ، بس فعليًا كان بيبقى مبني على حاجات كثيرة

شفتها في السنين اللي قبله، بترسب وتتراكم جوايا من غير ما آخذ بالي، وبيكون ليها حافز بس، «trigger»، حافز بيخلي كل حاجة تضرب في وشي فجأة.

أنا شفت حاجات كثيرة، شفت كل حاجة تقريبًا، بس مش كل حاجة شفتها، كان ليها نفس التأثير.

أخطر وأوحش وأسوأ حاجة ممكن تحصل في علاقة ما بين اتنين، هي الانفصال بخناق وتجريح، وخناقات الانفصال، خصوصًا لو مع شخص بتحبه أوي، وكنت شايف في وقت من الأوقات إن هو ده اللي هتقضي معاه بقية عمرك. مش بتسيبك، الخناقات دي بتفضل معاك، بتتسلى عليك وإنت قاعد لوحدك، وكل كلمة قالها الشخص الثاني بتفضل ترن في ودنك سنين طويلة أوي، وكل كلمة إنت قلتها حتى برضه بتفضل فاكرها، ولو الكلمة قاسية، ولو إنت شخص حساس شوية، وبتحس بالندم. الانفصال ما بين اتنين كانوا بيعجبوا بعض كأنه ماتش اتلعب وخسرته، وبتفضل تتفرج على الإعادة بتاعته مرارًا وتكرارًا، وتلوم نفسك على كل باصة مقطوعة، وكل فاول عملته، وكل شوطة ما جاتش جون، وكل ما كان حجم حبك للشخص كبير، زادت مرّات الإعادة.

الانفصال بخناق وتجريح ده شيء مؤلم جدًا للطرفين، هوّ شبيه جدًا بخناقات فيلم «إبراهيم الأبيض»، كله بيخرج متعور، وهدومه متقطعة، وهياخد وقت طويل أوي عقبال ما يعرف يرجع لصورته الأصلية ويتعافى من جروحه.

الكلمة، كويسة أو وحشة، من شخص بتحبه، بتفرق معاك
أوي وبتأثر فيك، وصورتك قدام شخص بتحبه ممكن تتفوق
في بعض الأحيان ولحظات الضعف على صورتك قدام
نفسك.

بعد الجواز كنت فاكِر إننا خلاص اتجوزنا وارتبطنا ارتباط
مقدس، بس كانت مفاجأة غريبة جدًا بالنسبة ليّ إن الجواز
ممكن ينتهي، اللي هوّ إزاي؟ دا أنا متجوز عن حب! هوّ ينفع؟
مش الأفلام بتقول إن اللي بيتجوزوا عن حب دول خلاص
مع بعض للأبد؟! معقولة الأفلام كانت بتكذب؟! آه يا كدابين
يا ولاد التيت!

فترة ما بعد الطلاق بقي، كنت حرفيًا باكره إني قاعد مع
نفسي، كاره نسخة مني فشلت في الشعور بالاكتمال، يمكن
عشان شخص باكره الفشل في أي حاجة، يمكن عشان كنت
باحبها أوي، يمكن عشان كان حلمي من وأنا صغير إني أبقى
متجوز من حب حياتي وأنا عندي ثلاثين سنة، وافكرت إني
حققت الحلم ده، واتفرّجت عليه وهوّ بينهار قدامي، أو يمكن
كل ما سبق بالإضافة لحاجات تانية فهمتها مع الوقت وهتلاقيها
أغلبها في الكتاب ده برضه.

كنت في قاع الاكتئاب، ويمكن تحتيه بشوية كمان، وكنت
محتاج أشوف أي حد أو أنزل أخرج وأشوف ناس، عشان
أحصل على أي نوع من أنواع التأكيد الاجتماعي، كعادة أي حد

مُطلق، عايز أحس إني ممكن أتحب والموضوع مش صعب،
مش شخص بغيض، مش مكروه، وإن الناس بتحبني وتتقبلني،
وإني مش وحش زي ما بقيت أنا شخصياً شايف نفسي من كل
اللي سمعته عني من الشخص اللي باحبه، إني كويس زي ما كنت
طول عمري شايف نفسي، وصحابي وأهلي شايفيني، أو بمعنى
أصح، مش زي ما هيّ شايفاني.

اللي كان مخليّ الفترة دي أصعب، إني سبت وظيفتي بعد
الطلاق، وانفض كل من كان حولي تقريباً من أغلب الناس
اللي كانوا بيعشقوني وأنا فوق وناجح ومهم وباعمل إعلانات
ناجحة، طبّالين الزفة، باقة كبيرة من الذين كنت أعتبرهم -مخطئاً-
أصدقاء، بعضهم ممن يحبون أن يحيطوا أنفسهم بأشخاص
ناجحين، أو بمن يعملوا في الميديا، وهم كثير من محبي
رفقة من هم تحت الأضواء.

فجأة لقيت محدش بيرد على مكالماتي!

ضلمة يا معلم!

كان مُولد واتفض بسرعة مفاجئة ومخيفة!

كنت بدون دخل، ملتزم للبنك بقروض وأقساط، مفلس
ومديون كمان، بدون زوجة، أو وظيفة، أو أصدقاء يُذكرون إلا
القليل، أغلبهم من الأصدقاء القدامى!

قاعد لو حدي في البيت، ومش بانزل إلا قليل لما يجيلي قرش
من هنا، أو شغلانة سريعة هنا، ساعتها تلاقيني نزلت وانتشرت!

كنت فاكِر إنها طَبَّلت خلاص، وجابت آخرها ودي أوطى
نقطة في حياتي، بس كنت حمار برضه، أو برضك!
عشان أول ما افكرت كده خدت على دماغي جامد، الموقف
اللي كان نقطة تحول بالنسبة ليّ، أول تحول...

كل اللي فات كان كوم لوحده، ولما اكتشفت إن كان عندي
طفل، وراح، من غير ما أعرف إنه كان موجود، أو إنه هيروح،
كان كوم تاني أبشع بكثير!

أقل ما يُقال عني إني ساعتها اتكسرت مليون حته!
في الوقت اللي كنت فاكِر فيه إني خسرت كل حاجة، اكتشفت
إن فيه أبعاد جديدة للخسارة!

لما بتخسر كل حاجة فجأة، وفي وقت قصير، بتفقد إيمانك
بكل شيء، بس أنا ما فقدتهوش!

أذكر جيدًا إني بصيت للسمما يوم لما عرفت، وقلت لربنا
بالحرف وأنا بابكي: «إنت لازم تعوّضني عوض كبير عنه».
ما أعرفش ليه كنت باحب الطفل ده، مع إني ما شفتوش،
بس كنت باحبه أوي، وباحب ذكراه أكثر من أي حاجة وأي حد
في حياتي!

في الحقيقة ما كنتش عايز طفل، ما كانش في دماغي حتى
إني عايز طفل، في العادي ما باحبش الأطفال أوي، وباحسهم
صداع وفرهدة ومسؤولية والجو ده كله، ما كنتش أعرف حتى
إني ممكن أحب حاجة ما شفتهاش قبل كده! الفكرة كلها إنك

لما بتعرف إنك هتبقى أب بتفرح فرحة عارمة، ولما بيروح منك طفل بتحزن حزن عظيم، أنا بقى خدت الاتنين دول في نفس اللحظة، في نفس الوقت اللي حياتي كانت زي ما بتقول كده بتنهار فيه، حسيت بألم مش هاعرف حتى أوصفه في كتاب لوحده، كنت عارف خلاص في اللحظة دي إني مش هابقي كويس لفترة طويلة.

ابتديت عملية تحول تدريجي في شخصيتي، ابتديت أبقى شخص بيحاول يستعيد كل اللي كان عنده واختفى في لحظة، كنت واحد بيدور على أي علاقة ويحاول يعمل بيها محاكاة لتجربة الجواز السابقة، عشان أرجع كل اللي خسرت، نفس الحزن، نفس التفاصيل، نفس النفس.

ما كانش عندي أي مشكلة في الموضوع، الستات - الحمد لله يعني - بيحبوني لسبب ما، أو بيشفوا حاجة كويسة جوايا ما أعرفش هيّ إيه، هُمّ ليهم نظرة معينة وإحساسهم عالي، أعلى مننا كرجالة بكثير.

بس غصب عني في الفترة دي كنت شخص لا بيحس ولا يشوف!

هيّ مين بقى؟ عايزة إيه من العلاقة أو من الدنيا؟ نفسها في إيه؟ «كَمَنَّا» أو حاجة تانية، ما أعرفش، ومش مهتم أوي.

يمكن أكثر أنواع كنت باجذبهم في الفترة دي، اللي لسه مفركشة وعايزة تنتقم من صاحبها بتكلمني، اللي عايزة تقضي

وقت لطيف بتكلمني، اللي مش عايزة حاجة حتى وقاعدة زهقانة
بتكلمني تلعب معايا شوية وتنكش، أو حتى المؤدبة اللي عايزة
تحس إنها على حافة الخطر ومجنونة ومش بيهمها حاجة، كانت
تكلمني تتفق معايا على ميعاد نزل، وتخاف وتجيّب ورا وتختفي
شوية من الكسوف.

كنت الفك المفترس، مشيها فك يعني!
عايش بالطول وبالعرض، وبارقص على تراييزات الـ «clubs»،
وآخر واحد بيروّح من البارات، وباجرب أي حاجة ممكن
تتجرب، وأي حد!

نوع من أنواع الأمل الأهل الشبيه بلعب القمار، بس كنت
بالعب بحياتي من غير ما يكون معايا ورق، بادخل «All in» وأنا
معايا خمسة وتلاثة مثلاً.

وعلى التوازي، كنت دايمًا من خلال الإنترنت، أو حتى
البرنامج، باحاول ألحق الناس، أضحكهم، أو أنصحهم، أو
الاتنين.

كان بيدّيني قوة الموضوع ده، إحساس إن فيه شخص
ممكن ألحقه من اللي أنا فيه ده وأبعده عنه، كان بيحسّسني إنني
ممكن أكمل، وإن لسه لي هدف في الدنيا، حاجة تصبرك على
الوجع اللي إنت فيه. كنت باقع كل يوم ميت مرّة، وأقف تاني
زيهم، صحيح كانت وقفة مهزوزة، بس أهو، كنت باقف يعني
الحمد لله.

طول عمري مهما باقع باقف تاني، دي أكثر حاجة أنا شاطر
فيها بفضل الله، رب الكون ميزنا بـ«ميسة».

فضلت مُغَيَّب، مش مُدرك، ومستني إن أي واحدة هاقابلها
هتبقى حب حياتي الجديد، حرفياً باتشعبط في أي حاجة،
وأصدق الفكرة جدًّا، بغض النظر عن هيّ مين أو قابلتها إزاي
وفين وحياتها شكلها إيه، وأحاول أُغَيِّر أسلوب حياتي عشانها،
وأصلح أي حاجة غلط باعملها، مؤمنًا إيمان باهت إن دي
فرصتي إنني أصلح كل حاجة حصلت، بس كنت باكتشف دايمًا
إن الأستاذة السنيورة الجديدة مش عايزاني أُغَيِّر حاجة، خالص،
لأ دي هيّ جاياي عشان كده، عايزة كده، عاجبها بايظ كده!
رايحة «دريم بارك» وعايزة تركب الصاروخ، جاية للـ«باد بوي».
مستغرب؟ ما تستغربش، كنت شيء مبهر جدًّا بالنسبة ليهم
في الوقت اللي أنا فعليًا فيه باهرب من ألمي! وبعدين ما هو
واحد عاش في ألم ومش في وعيه طول الوقت، هيقابل إيه؟
بطلة أوليمبية؟

كنت التجربة المثيرة في حياة كثير من اللي حياتهم كلها
رتابة وملل!

وأنا من جوايا باتعامل مع العالم من منطلق «مفيش حد فيكو
موجوع أدي»!

تعبان، وباحاول ما أبينش، وده كان بيفشخني زيادة، عشان
بيسهل للناس إنهم يحكموا عليّ.

أنا ما كنتش باحاول حتى أحسن صورتني في أي حاجة،
ما كنتش مركز أوي، كنت بادور على حاجة معينة مش شايف
غيرها، ومش مهم أي حاجة تانية.

والناس ما بتصدق تتكلم، ما بيصدقوا يلاقوا واحد واقع ويطلعوا
يحكموا عليه من منصة أخلاقية، حتى لو هُهم فعلياً ما ينفعش يقفوا
تحت هذه المنصة، حتى لو هُهم ما ينفعش يبقوا تحت السجادة
اللي عليها المنصة أصلاً، بس عادي، عشان بس يحسوا بالتفوق
والـ «superiority»، يحسوا إنهم مش وحشين زي ما حد تالت
خلّاهم يحسوا! أصل هي الدنيا كده، كلنا ضحايا لضحايا آخرين!
في وسط دوامات العك دي كلها، كان دايمًا بتظهرلي كل
شوية حورية، ملاك...

واحدة لو كنت في ظروف الطيبعية كنا هنبقى أسعد اتنين
في الدنيا، كانت بتبقى زي هدية كده من عند ربنا، عشان
يفكرني إن الدنيا لسه فيها حاجة كويسة، عشان ما أقعش
أوي ممكن.

واحدة فيها شوية نور كده، تلحقك من الضلمة اللي إنت فيها.
دايمًا كانت بتبقى جميلة جمال لا يوصف، قلبها أنصف من
غرفة جراحة متعقمة، وعندها درجة من الإحساس نادرة الوجود،
زي الملايكة من الآخر يعني.

كانوا دايمًا شايفين في حاجة كويسة حتى لو كل اللي حوالي
أقنعوني بالعكس، وكانوا بيقرّبوا مني، ويحاولوا يساعدوني،

يفوقوني، يخرجوني من دائرة الألم المفرغة، وخليني أشرحها
دي بالتفصيل...

اللي هيّ دائرة الـ «self-loathing».

إنت بيحصلك حاجة، موقف، حدث، أي حاجة بتأثر فيك
بحزن أو ألم، بعدها تبتدي تحس إنك ما بتحبش نفسك، ومش
راضي عن نفسك أو عن الحياة، ومش قادر تتقبل الوضع ده،
وبتكون قاسي جدّا مع نفسك، خصوصًا لو اتربيت بقسوة، فبالتالي
بتدور على أي حاجة تعملها عشان تنسيك، حتى لو غلط، حتى لو
ضد مبادئك كلها، وبمجرد إنك تعملها، ضميرك، أو بوصلتك
الأخلاقية، أو أيّا كان الشيء اللي جواك اللي بيحاسبك على كل
حاجة، بيصحى، إنت، أو الشيطان يعني، ممكن تكون نجحت
إنك تعطله شوية، أو تتحايل عليه، أو تقوله بص العصفورة وتروح
عامل كارثة، بس هو لازم بيصحى، لازم هيصحى، وهي جيبيك
ويقولك إنت بتعمل حاجة غلط ويوريها لك، فتزعل زيادة،
وما تحبش نفسك زيادة، وما تبقاش راضي عن نفسك زيادة،
وتقسو على نفسك زيادة، فتدور على حاجة تانية تعملها عشان
تنسى تاني، فتغلط تاني، ودوخيني يا لمونة...

دائرة مفرغة، ودوامة اتجاهها لتحت بس، مش هتسيبك غير
لما تنزل تلمس أرض البحر وتبلع ميه ورملة.

الدائرة دي دائمة وأبدًا ما بيكونش ليها غير حل واحد، مخرج
واحد بس لا غير، حرفين بس: حُب.

حب من شخص جميل، حب من صديق وفي، حب من أهل، حب من أصدقاء، حب نفسك، والأهم، حب من ربنا، تفتكر وتصدق إنه مش قاسي زي ما صورولك كل الشيوخ اللي دمرُوا إحساس أمة كاملة بحب ربنا، لما تفصل كل القرف اللي سمعته منهم، وتفتكر إنه بيحبك وبيقدّر وبيسامح، ولو هيحاسبك هيحاسبك وهو بيحبك، لو هيدفعك تمن غلطة هيعمل كده عشان بيحبك، حب خالص مهيمن غير مشروط بدون أدنى ذرة كراهية. أي كلمة أو فعل فيهم نسبة كراهية، بيخلقوا نسبة كراهية جديدة لميزان الطاقة بتاع الدنيا، وهتفضل تلف لحد ما ترجع لمصدرها الأساسي.

والعكس صحيح وأهم، أي كلمة أو فعل فيهم حب، بيخلقوا نسبة حب جديدة تُضاف لميزان طاقة الدنيا حواليك، وهتفضل تلف برضه لحد ما ترجع لمصدرها الأساسي.

مممكن أحكي حاجات كتيرة أوي، مشاهد ما تتوصفش، بس مش هاقدر أوصف جمال كل لحظة كانت في حضرة جمال وحب ست ملهاش وصف غير ملاك.

كل اللي مممكن أقوله، إننا كنا دايماً بنهرب من عيون الناس، وعيون الناس كانت بتجري ورانا.

دي كانت نقطة التحول الثانية: إنني لقيت حب، لقيت حب كافي يمسح كل الكره الأسود اللي اتوزع عليّ بالتساوي من كل اللي كان حوالِيّ، ويبدله بأبيض، بنور، بسعادة. وجه في صور

كثيرة أوي، ابتدئ بالمصدر الأساسي الدنيوي اللي بيفرق معايا
في حياتي كلها... الست.

بدأ معايا عملية غسيل للروح واسعة النطاق، ابتدت بحب
ست جميلة، وانتهت بحبي لنفسي.

وصلت لنقطة اتزان عكس التحول الأول، ويمكن حتى
نقطة اتزان أعلى بكثير من أي نقطة كنت وصلتها في حياتي
قبل كده، وده يخليني شاكر وممنون جدًا للرحلة اللي مررت
بيها، وشاكر لربي شكر عظيم، وشاكر كل الشكر لأجمل ستات
في الدنيا اللي ساعدوني، سواء بمجرد وجودهم، أو تقبلهم، أو
صداقتهم، أو حبهم، واللي فعلاً شايفهم مظهر من مظاهر وجود
ربنا في الدنيا، وشاكر لربي جدًا إني لقيت حب حياتي، وأي حياة
سابقة عشتها...

الهورية اللي أنا متأكد إنها كانت زوجتي في الجنة!

نصف روعي الآخر إن لم يكن ثلاثة أرباعه!

اللي بانام وأنا فاتح صورتها وواخدها في حضني!

اللي فكرتني أد إيه ربي عظيم عظيم!

اللي فكرتني بكل حاجة حلوة نسيته!

اللي فكرتني إن الحب ده أكثر المشاعر إلهية، وأقواها في

الانتصار على أي مشاعر تانية!

اللي فكرتني إزاي أحب زي العيال الصغيرة!

اللي فكرتني إن طريقة حبي مش غلط، كل واحدة قابلتها قبلها

هيّ اللي كانت غلط، أي واحدة مش هيّ كانت غلط، عشان هيّ
الصح الوحيد!

اللي فكرتني بمقامات الحب الحداشر اللي كان نفسي أكتبها:
الفرحة برؤياه، الشوق في غيابه، الرغبة في إسعاده، التسامح في
ذنبه، الذكرى، السكون في حضنه، الجنون في لمستته، الاطمئنان
بوجوده، السهر على خياله، اليقين بالتقاء الروحين من قبل، الترفع
والاستغناء التام عن غيره وأي غيره فهو دونه!

اللي عمري ما هاقدر أديها حقها وحق جمالها وحق روحها،
بس اللي ممكن أقوله إنني لو قضيت بقية عمري ساجد مش
هاكون شاكر لربنا كفاية!

اللي اسمها على مسمى، اسم شفته في السما، اسم خلّاني
لأول مرّة في حياتي أحس بالرضا!

أنا كنت أكبر حمار، لما افكرت إن مفيش حب!
ربنا هوّ الحب، في صور كثيرة أوي في الدنيا دي!

41#

لما افكرت اني اتجنت

يمكن مش كل حاجة عرفت اكتبها في الكتاب ده، اللي هو رحلة خمس سنين أغرب من بعض، ومش عارف أقولك حصل فيها إيه تحديداً، عشان مش كل حاجة ينفع تتحكي، وفيه أوقات كنت باحس إن كل يوم بيعدي فيلم لو حده.

أصل هاقولك إيه؟ هاقولك اني شفت ربنا سبحانه وتعالى بمليون شكل في حياتي؟ مش هتصدق.

هاقولك اني شفت الشيطان، وبصيت في عينيه، وشفت حواجه الرفيعة والنار اللي جواه؟ برضه مش هتصدق.

أنا فعلاً شفت حاجات كتيرة أوي وأغلبها ما يتصدقش، وفيه أوقات كتيرة كنت على حافة الجنون، أو الانتحار، أو الاتنين.

أنا شربت كل حاجة، وجربت كل حاجة، وعملت كل

حاجة ممكن تتخيلها، وحاجات تانية كتيرة صعب تتخيلها،
مش تقليل منك، بالعكس، أنا نفسي ما كنتش أعرف إنها
موجودة، عملت كل حاجة بالذوق وبالحب وبالضغط
وبالعافية والإكراه.

رُحْتُ في حَتَّ عمري ما كنت أتخيل حد في حياتي ممكن
يروحها، مش أنا حتى.

فيه أوقات كانت الحاجة الوحيدة اللي بتخليني أصدق اللي
باشوفه، إن فيه أصدقاء أو صديق موجود في حياتي وشايف
هو كمان اللي أنا شايفه، شايف اللي بيحصل ما بين خير وشر،
معجزات وابتلاءات، ما بين سحر وأعمال وعالم ما وراء الطبيعة،
ومحاولات لا حصر لها لمجرد إنني أبقى كويس.

حروب في السر وفي العلن، أنا طرف فيها، وساعات مش
طرف.

إيمان قوي، وفي ساعات قلب متردد.

خسائر بالطن، ومكاسب بأطنان مضاعفة.

سنين عمر غالية، وشباب وأطفال من صلبى ربي ما أرادش
إنهم يشوفوا نور الحياة، وصحة وفلوس، وحب كنت فاكره
حب، وجواز كنت فاكره جواز، وصحاب كنت فاكرهم صحاب،
وهاقولك إيه ولأ إيه!!

يمكن مش كل حاجة عرفت أكتبها في الكتاب ده، بس اللي
أقدر أكتبه، واللي عايز أكتبه، واللي عايزك تقراه وإنْت في عربيتك

أو مواصلتك أو في سريرك أو حتى على البحر، إن الثابت الوحيد بالنسبة ليّ كان دائماً ربنا، في صورة إشارة، في صورة بشر، في صورة معجزة، في صور كثيرة أوي ما تتعدش، بيسمع كل حاجة، وييشوف كل حاجة، ومفيش دعاء بيفوته، حتى لو اتقال مرّة واحدة.

اللي أقدر أقول لهولك إن مفيش حاجة اسمها خسارة طول ما إنت مع ربنا. كل حاجة في إيده، وكل حاجة بترجع مضاعفة، طول ما إنت شايله في قلبك وعامله حساب، طول ما إنت مدرك إن الدنيا دي مجرد لعبة «3D» ما تسواش، وهوّ المهيمن عليها، هوّ اللي حاطط تصميمها بكل حاجة كبيرة وصغيرة، بأدق أدق التفاصيل اللي جوه اللعبة، بالمفاتيح اللي مستخبية، بالناس اللي هتقابلهم، باحتمالاتك كاملة اللي إنت شايفها واللي إنت حتى مش شايفها.

الخدعة اللي بيحاول يخدعك بيها الشيطان، هوّ إنه يحاول يقنعك إن ربنا سايبك في الدنيا بطولك، عايزك تفتكر إن ربك العظيم الرحيم عمل الدنيا دي وخرج وسابها تاكل في بعضها وقعد يتفرج، وعايزك تفتكر إنك صغير، ومش مهم، ومش محور الكون، ومش فارق مع حد، وعايز يقلل منك بأي شكل، زي صاحبك اللي بتكرهك في بيتك وجوزك، وصاحبك اللي بيقلبك على مراتك، وزميلك في الشغل اللي بيجرحك لما تبقى شاطر، وأنتيمتك اللي بتحسك

إنها أحسن منك، كل اللي بيحاولوا «يعلّموا عليك» دول،
دول الشيطان!

جروح صغيرة، ما تاخدش بالك إنها حصلت، بس مفتوحة
وبتنزف نزيّف بسيط أوي، عشان هوّ واللي باعوله نفسهم يمصوا
دمك منها، يدخلوك منها، يسحلوك منها، يعطلوك عن هدفك
الأساسي، الـ«purpose»، زي المشهد اللي في فيلم «The
Matrix»، عايزين يشفطوا طاقتك، روحك اللي ربنا كرّمك
بيها عليه.

في إحدى الروايات العبرية، اللي للأسف متدارية عننا، فيه
جزء مكتوب فيه ما قبل القصة القرآنية، جزء بيقول إن ربنا خلق
جسد آدم العظيم، جسدك ده، بعقله بعينيه بشعره بفكره بخياله
بمشاعره بنوره، والشيطان افكر إن هوّ اللي هياخده، افكر إنه
معمول عشانه، لمجرد كبرياء زايقة وغرور مَرَضِي، بس رب
العالمين نفخ فينا من روحه هوّ، كرّمنا، فرحان باللي هوّ خلقه،
فخور بينا، خالق فخور بخلقه، وقاله يسجدلك، وده اتجنن،
ورفض، والغيرة كلت قلبه، وحلف إنه يكرّهك في نفسك وفي
حياتك، ويبعدك عن طريقك اللي ربنا راسمهولك، اللي في
الأول فيه جنة، وفي الآخر فيه جنة.

مريض، مريض هتشوفه بيطلعك من كل ناحية، ويعمل
نفسه صاحبك وحبيبك وصديقك، أو حتى حب حياتك، عشان
يوقعك بس، عشان ما توصلش، عشان ما تاخدش مكانتك

الحقيقية اللي ربنا عايزك تاخدها عشان بيعحك وعشان إنت منه .

إنت أقرب شيء للإله، مكانة، وروح، واتصال...
إنت أعظم مخلوقاته، اللي قال للملايكة عشانك ملكوش
دعوة، أنا عارف أنا باعمل إيه، أنا عارف أنا خلقت إيه كويس
أوي، أنا عارف اللي نفخت فيه مني ده هيعمل إيه، أنا عارف،
إني أعلم ما لا تعلمون.

أنا باقولك أهو، لو احترمت تفكيري في أي وقت، لو قلتك
حاجة صح في أي وقت، لو حسيت إن دماغى شغالة بطريقة
سليمة في أي وقت، صدّقني، أنا مفيش ليّ أي مكسب من ورا
الكلام ده غير وجه الله.

ربك موجود جوه الدنيا دي بنفسه، وحواليك بمليون
شكل، حتى لو مش بتدور عليه، هو جنبك أوي، حتى لو مش
في بالك، هو واخذ باله منك، ويحاول يكلمك بمليون طريقة
وإشارة وعلامة، سايبلك مليون مفتاح لباب ما بيتقفلش،
وباعتلك مليون رسول يفكروك بس إنه موجود، حتى لو
استيكر على ضهر ميكروباص، دي إشارة من ربك بتفكر
إنه موجود.

أقسم لك بكل ما هو مقدس، حتى التفاصيل دي في إيدته!
دي لو لعبة كمبيوتر أو موبايل مفيش بيكسل جرافيك موجود
فيها عبث، ما بالك بالدنيا والخالق العظيم؟

لو نسيت ده يا قارئ العزيز، هتفتكر إنك اتجننت، وده للأسف
اللي الشيطان عايزه، عشان تبقى لعبة في إيدته!
أنا كنت حمار لما افتكرت نفسي اتجننت!
بس الحمد لله، لقيت ربنا!
هو موجود، حتى لو مش بتدور عليه!

43#

لما كنت باهرب

أهم سؤال كان لازم أسأله لنفسي وأنا باكتب الكتاب ده: هو أنا باكتب الكتاب ده ليه؟ عايز إيه؟ عايز أوصل لإيه؟ هاستفيد إيه؟ هل هيّ مساحة جديدة عايز أجربها؟ ممكن.

أنا جربت أقدم برامج، وأكتب وأمثل وأخرج، ممكن عايز أكتب كتاب عشان أجرب عندي الموهبة ولا لأ؟ ما أظنش.

ولا تكونش كبرياء، إيجو، عايز يبقى اسمي «عندي كتاب في السوق»؟ أشك، مش مهتم أوي بصورتني قدام الناس على أد ما أنا مهتم إنني أبقى كويس.

يمكن شايف إنني عندي قصة عايز أحكيها، ويمكن شايف إنني ممكن أساعد حد بالقصة دي، أحسسه إنه مش لو حده، أو أقوله حاجة يمكن، يمكن، تخرجه من حالة معينة هوّ فيها، أو حتى ألحق حد من إنه ياخذ قرار مش صح؟ ممكن جدّا، كل

ده حقيقي فعلاً، ودي نيتي قدام ربنا، حتى وأنا باعري نفسي للجميع.

بس في الأساس، بعد ما ابتديت أكتب بشوية، وأمسخ، وأكتب، وأبطل كتابة، وأرجع أكتب تاني، وأقرأ اللي كتبتة، فهمت إن المشكلة كلها في إني بكل بساطة، باحاول أواجه نفسي، باحاول أكون مهيمن على حياتي، بامسك نفسي من راسي وأحط نفسي قدام المرآة: أهو، ده إنت، ده اللي حصلك، واللي عملته.

وده كان لازم يحصل عشان مریت بحاجات كتيرة أوي نستني شوية أنا مين وعايز إيه، وغيّرت مفهومي ومنظوري وهدومي حتى، وحاجات تانية ما كنتش مُدرك حجم تأثيرها عليّ وماشي ومكّمل وبتعامل في حياتي طبيعي جداً، أو يعني، فاكر إني طبيعي ومش شايف.

كان لازم أقف وأفهم إيه اللي بيحصل.
بعدت عن نفسي بشكل رهيب، وكأني خرجت بره نفسي تماماً.

الألم بيعمل كده، والحزن بيعمل كده، والإحساس الدائم بالذنب بيعمل كده.

المواجهة شيء صعب جداً جداً.
صدّقني، أنا تعبت أوي أوي فيها، وبتبقى أصعب وأصعب لو متأخرة، في حالتي أنا اتأخرت سنين.

سألت نفسي في يوم من الأيام: هوّ أنا ليه باحاول أبقي
كوميدي وأنا جوايا كل اللعبة دي؟
واكتشفت بعد سنين إني كنت باهرب، معروفة يعني! هاكون
يعني مولود في مستشفى الجلاء للولادة الكوميديّة؟ أكيد باتنيل
على عيني وياهرب!

بس السؤال كان: من إيه؟ إيه الشيء اللي باهرب منه واللي
مخلّيني في عملية بحث دائم عن الضحك والإفيه ورضا الناس
وحبهم من خلال ضحكهم وانبساطهم؟
والإجابة كانت بسيطة.

لحظات السعادة في طفولتي كانت محدودة، ولما كبرت
شوية ودخلت جامعة، ولما اشتغلت، ولما اتجوزت، وفي
أغلب حياتي بصفة عامة. وده كل الناس مش أنا بس، السعادة
وأي حاجة حلوة عامة، بتبقى نادرة شوية وبتيجي في جرعات
صغيرة، زي الأحجار الكريمة، زي البلوتونيوم، زي الحشيش
النضيف، اللي عمري ما جربته طبعًا ولا أحب أجربه، بس من
اللي باسمعه يعني.

لما بصيت على مصر كلها اكتشفت حاجة مهمة جدًّا: الحياة
بصفة عامة مش سهلة، وعندنا هنا مش أسهل حاجة خالص، دي
لوحدها كده من غير أي مشاكل شخصية لسه، لسه من غير أي
إضافات أو مواد حافظة.

من العدل إننا نقول إن المصري بيتعب في حياته أكثر من

أغلب الشعوب الثانية، بس في نفس الوقت من الناحية الثانية خالص، المصري معروف برضه إنه ابن نكتة ودمه خفيف.

عندنا هزار، وتهريج، ونكت، وإفيه، وقلش، وقلش رخيص. بتهزر كنوع من أنواع المداعبة.

عشان كسر حدة موقف معين.

عشان تتعرف على حد.

عشان تدافع عن نفسك.

عشان تاخذ حقتك.

عشان تلتطف الأجواء، أو تخرج من أزمة.

عشان تنسى.

وأحياناً حتى، لمجرد التسلية.

هيّ دي طريقتنا للتعايش، بنهزر عشان نعيش، وأنا واحد منكوا

مش أكثر... باحاول.

كنت حمار لما حاولت أهرب من نفسي!

عشان مفيش حاجة أهرب منها!

عشان إحنا قوتنا في قوة تحملنا!

المواجهة حلوة أوي، أوي يعني، لو حابب تبقى سعيد في

حياتك، بس خلّيك رحيم بنفسك وإنّ بتعملها.

مؤخرة

سوري في الكلمة.
متشكر أوي أوي أوي يعني إنك اشتريت الكتاب ده وقريته.
شكر حار جدًا.
شكر واجب.
من كل قلبي.
لو حد زعلته، فأنا آسف.
لو حد زعلني، فأنا مسامح.
كانت رحلة غريبة وجميلة!
ده مش معناه بأي شكل من الأشكال إنني مش هاغلط تاني،
أو مش هابقى حمار تاني، بالعكس، الحمورية دي غالبًا هي
رسالتي في الحياة، بس على الأقل، هديت شوية، وبقى عندي
شوية إدراك.

«إدراك»، دي كلمة في غاية الجمال!

شكر خاص وواجب

مجموعة الناس دول حابب أوجهلهم شكر حقيقي من قلبي:

حسن حامد

طارق رجائي

محمد جاد

حتيرة

مراد

ليلي صدقي

أحمد شعبان

أحمد أبو خليل

صالح أبو خليل

عز الدين

أحمد مراد

عمرو دياب

سورية صغيري

لما

رانيا عمر

طارق حسني

وائل فخراني

أحمد عباس

أحمد الدفراوي

محمود مرسي

مروة مصطفى

هشام السيد

أميرة الجمل

إنجي المقدم

إسعاد يونس

نورهان الهجرسي

مزاهر

عمرو مصطفى

إسماعيل نجيب

محمد عبد القدوس

شوشة كمال

محمد جمال بسيوني

عمرو يوسف

خالد الحلفاوي

وليد الحلفاوي
نبيل الحلفاوي
كريم العسال
محمد بناني - مي
آية سماحة
أحمد زكي
عصام نصار
كريم فتحي
أحمد السبكي
توتة السبكي
حسن الرداد
معتز فتيحة
هشام عبد الخالق
عمر عبد الخالق
محمد حفطي
توبة
ندا أكرم
مي زين الدين
منى عيسى
تامر حبيب
مصطفى يلمز

مسار إجباري
هاني الدقاق
تامر عطا الله
محمود صيام
أحمد حافظ
أيمن مسعود
كايروكي
أمير عيد
تامر هاشم
شريف مصطفى
آدم

هواري

أحمد نبيل (مصمم الغلاف)

طارق العريان

موسى عيسى

محمود رمضان

سيفين سامي

أشرف - ساندي - سراج

كريم الجمال

بيريهان الجوهرى

طارق الأنصاري

نور والي

وليد ندا

كريم كوتة

عادل مجدي

محمد كريم أبوالمجد

محمد عماد

أحمد فاروق

هيثم أبو النصر

محمد نیاز

هشام علي

هادي سالم

أمانی مرجان

سيلفيان (سلمی) كورجو

رانیا عمر

نادین

باسم صبري

Steve Gooch

Nicola

Juditta Salem

دفعات يحيى الرافي ٢٠٠١،

أكاديمية بحرية ٢٠٠٦، أورانج ٢٠٠٨:

متشكر على حبكو ودعمكو والأيام الجميلة في وسطكو.

ماما، ومحمد، ورشا، وإبراهيم، وفريدة، وعمرو، وحلا:

إنتو أهلي وإخواتي وولادي، ربنا يخليكو للي.

المحترم النبيل سيف سلماوي:

أعجز عن شكرك، وشرح مدى امتناني وعرفاني بالجميل،

لصبرك العظيم، وتشجيعك، واحتمالك. جزاك الله كل خير.



معز مسعود على اليمين، ومحمد دياب على الشمال، واللي في النص

ده أنا، بعد محاولة انتحار مبسوط إنها ما نجحتش، مدين ليكم بكتير

أوي، شكرًا، ألف شكر



وأنا طفل صغير كان حلمي إني أكتب كتاب أحكي فيه
قصص زي اللي باقراها، بس وقتها ما كانش عندي أي
حاجة أحكيها غير قصص سلسلة ملف المستقبل ورجل
المستحيل وأفلام الكارتون اللي شفتها.

لما كبرت، اكتشفت إن حياتي ما كانتش بعيدة أوي عن
الأفلام دي، وطلعت أكبر فيلم كارتون فيها.

ده أول كتاب ليّ في حياتي، أتمنى عزيزي القارئ إنك تتقبله
قبول ميريام فارس في مدرسة طبري الحجاز بنين، أو قبول
ميريام فارس بصفة عامة، ويكون حلو كده وخفيف على
قلبك، وتستفيد منه أي حاجة.

هسّام فنصور